




Mex Re de l'arbonnières



NOVVELLES OBSERVATIONS -ET CONIECTVRES SVR J. Bunard

LIRIS;

Parle Sr DE LACHAMBRE, Conseiller du Roy en ses Conseils & son Medecin Ordinaire.



A PARIS, Chez PIERRE ROCOLET, Imprimeur du Roy, au Palais, en la gallerie des Prisonniers, aux · armes de la Ville.

M. DC. XXXXX. AN 1650 AVEC PRIVILEGE DV ROY.

Carry Pickers Researched to the Company of the Research of the Research of the Research of the Company of the C

ALBE BUILDING DE NOV



AVROY.



IRE,

Quand vous sçaurez que l'Iris est le subjet de cét Ouurage, vous jugerez bien qu'elle ne pouuoit paroistre au iour sans la lumiere du Soleil; & que pour se laisziii

EPISTRE.

ser voir aux yeux des hommes, elle deuoit auparauant estre esclairée des Rayons & des Regards de vostre Majesté. Vous verrez bien encore que cet Arc merueilleux ayant seruy de Couronne au Roy des Roys, & deuant estre le Throsne où il fera esclater sa gloire & sa puissance, ie ne pouvois sans prophaner cette illustre marque de la supreme Royaute, la presenter qu'au plus grand Roy de la terre. Enfin apres l'auoir considerée comme le Portrait de Vostre Majeste par les merueilles de sa naissance, par l'excellence de sa beaute, & par l'admiration & l'esperance qu'elle donne à tout le monde; il ne m'estoit pas permis de la dedier à d'autres qu'à vostre Majesté, sans alterer cette parfaite ressemblance & sans faire quelque sorte d'injure aux deux plus belles choses de l'Uniuers. Mais quand ces

EPISTRE.

raisons n'excuseroient pas ma Hardiesse, l'opinion dont ie me suis flatte d'auoir reissi dans le dessein que i ay entrepris, & dauoir enfin decouuert vn secret qui a esté caché à la connoissance de tous les Hommes, me fait croire que mon Trauail ne vous sera pas desagreable, & qu'il n'est pas mesme tout à fait indigne de vostre Majeste. Ouy, SIRE, il est de la gloire è de la felicité de vostre Regne, que les sciences y fassent autant de nouuelles conquestes que vos armes, qu'il n'y ait rien d'impenetrable à l'esprit ny à la valeur de vos sujets, & que dans les Triomphes qui honoreront vos victoires, l'Ignorance se trouue au rang des Ennemis que vous aurez surmontez. Aussi quand cet beureux temps sera venu, les Lettres que vous aurez protegées consacreront vostre Nom & vos Vertus à l'immortalité, &

EPISTRE.

apres vous auoir fait de plus nobles & de plus esclatantes Couronnes que ne sont toutes celles du Soleil, elles publieront par tout, que si l'Iris a esté la Merueille des siecles passez, Vostre Majesté le sera sans doute de tous ceux qui sont à venir. Ce sont les vœux, SIRE, de celuy qui est

DE VOSTRE MAIESTE's

Le tres-humble, tres-o beissant, & tres-sidelle sujet,

LA CHAMBRE.



OBSERVATIONS ET CONIECTVRES

SVR LA NATVRE

DE L'IRIS.



Vo y qu'il n'y ait rien dans la Nature qui ne soit admirable, & que les plus petites choses qui s'y trouuent portent auec elles les marques & les traits de la San

gesse incomprehensible de celuy qui les a faites: Il y en a pourtant quelques-vnes qui attirent plus generalement l'admiration des hommes, & qui ne se peuuent iamais presenter à leurs yeux qu'elles ne jettent l'estonne-

ment dans leur esprit. Mais il faut aussi confesser qu'il ny en a point qui ait esté si souuent & si iustement admirée que l'Arc que le Soleil peint dans les nuës, ayant passé dans tous les siecles parmy les sçauans, aussi bien que parmy les ignorans, pour le plus merueilleux ouurage & pour le plus rauissant object qui pouuoit estre exposé à la veuë des hommes. On peut mesme dire que Dieu a confirmé la creance qu'ils en ont euë quand il l'appelle le fidelle tesmoin de sa magnificence; & quand pourse rendre plus auguste, il s'ensert de couronne, & en fait le thrône de sa gloire: comme s'il n'auoit rien trouué dans l'vniuers qui nous peust faire conceuoir l'esclat & la grandeur ineffable de sa Majesté, que cét admirable enfant de la lumiere. Aussi a-t'il cet auantage qu'en rauissant l'esprit par les merueilles de sa naissance, il charme les yeux par sa beauté; et que sans donner la terreur que d'autres pareils spectacles laissent ordinairement dans l'ame, il inspire vne joye secrete dans le cœur, & semble n'auoir esté fait que pour l'ornement du ciel & pour les delices de la terre. De sorte qu'il ne faut pas s'estonner si auec ces grandes qualitez il a fait naistre en toutes

Employons-y donc hardiment la nostre, & sans craindre le blasme d'auoir entrepris vn dessein qui est au dessus de nos forces, & sans nous flatter aussi de l'esperance d'y pouuoir mieux reüssir que les autres, joignons nos petits efforts aux leurs, & mettons de bonne soy dans le thresor public le peu que nous pensons auoir acquis dans la recherche d'vne chose dont la cognoissance est desirée de tout le mon-

fuccesseurs.

de, & qui est conuenable à la saison ou nous sommes; puisque l'on ne peut mieux parler de l'Iris qui est la messagere de la paix & de la serenité, qu'en vn temps d'orages & de troubles.



DE LA NATURE DE L'IRIS, 5

DV LIEV OV SE

FAIT L'IRIS.

CHAPITRE PREMIER.

A premiere & la plus importante question que l'on puisse faire sur l'Iris, est de sçauoir le Lieu ou elle se fait : car comme ce n'est autre

chose que la lumiere du Soleil qui se teint en diuerses couleurs, & qui se termine en Arc dans les nues qui luy sont opposées; il est impossible de conceuoir comment elle prend cette sigure, ny comment elle souffre vne si grande alteration, si on ne sçait precisement l'endroit ou ces changemens se sont: et s'il est vray, comme ie pretends monstrer, qu'il a esté ignoré jusques icy de tous ceux qui ont escrit de ce merueilleux Meteore; il s'ensuit par necessité que tout ce qu'ils en ont dit est inutile, & ne nous sçauroit apprendre le secret de sa naissance, ny la verité de sa nature.

A iij

6 DE LA NATURE DE L'IRIS,

Or quoy qu'il y ait eu en general deux opine se fait nions differentes sur ce subjet; les vns ayant creu que l'Oeil est le lieu ou l'Arcanciel se forme; les autres que c'est la Nuë où il paroist. La premiere ne merite pas d'estre examinée, n'ayant aucun fondement raisonnable qui la puisse soustenir. Car elle suppose que l'Iris n'est qu'vne vaine apparence & vne tromperie de l'œil, lequel se figure des couleurs dans les nuës qui n'y sont point effectiuement, & qui n'ont point d'autre existence que celle qu'il leur donne en luy-mesme: Sans auoir consideré, non seulement que l'Arcanciel se voit dans les miroirs & dans toutes les choses qui ont la vertu de representer les objets; mais encore que ses couleurs sont de mesme nature que celles que le Soleil jette contre les murailles quand sa lumiere passe au trauers des triangles de chrystal ou des verres pleins d'eau. Car ces deux experiences font voir éuidemment que l'Iris n'est point vne feinte & vn pur ouurage de l'œil, & qu'elle doit estre mise au rang des autres objets sensibles qui ont leur existence propre & indépendante de l'operation des sens, comme nous monstrerons plus amplement cy-apres. Nous n'auons donc qu'à examiner l'autre

opinion qui est la plus communement receuë, & qui tient que l'Arcanciel se fait dans la Nuë ou nous le voyons paroistre. En effet il semble qu'il n'y ait point d'autre endroit où il se puisse faire que celuy-là; et si l'Iris des fontaines se forme au lieu où on la void, il y a grande apparence qu'il en doit estre de mesme de celle du Ciel. Mais il est facile de répondre à ces raisons, & nous en auons de plus fortes qui jointes à l'observation que nous auons faite du lieu veritable ou se fait l'Arcanciel, monstrent éuidemment qu'il ne se forme point dans la nuë où il paroist.

Premierement il est certain que les Iris Que l'Iris qu'on nomme artificielles, comme font celles qui se font par le moyen des verres pleins nueononlu d'eau & des triangles de chrystal, ne se font point ou elles paroissent : car c'est vne chose indubitable que les murailles ny tous les autres subjets ou elles se font voir, ne sont point capables de donner à la lumiere les modifications qui sont necessaires pour la changer en tant de couleurs, & que c'est dans le verre mesme ou elle prend cette teinture qu'elle porte apres sur ces corps-là. Or si cela est veritable, c'est vn grand prejugé, que l'Iris Celeste ne se fait pas

8 DE LA NATURE DE L'IRIS,

au lieu ou elle paroist non plus que les artisicielles, estant composée des mesmes especes de couleurs, dependant de la mesme cause & ayant tous les mesmes accidens qu'elles ont.

En second lieu on voit souuent des arbres & des edifices au de là des cornes de l'Arcanciel qui paroissent teints de ses couleurs : ce qui est vne preuue conuaincante, non seulement qu'il ne se fait pas dans les nuës qui ne sont point là & qui ny peuuent estre; mais encore qu'il est soustenu dans l'air qui est entre ces arbres & les yeux de ceux qui le regardent. Et à ce propos ie me souuiens qu'estant à Lyon dans vne maison bastie sur le Rhosne, ie vis sur les quatre heures apres midy du mois de Iuillet 1624. vn Arcanciel dont vne des cornes s'auançoit jusques sur le milieu de la riuiere qui n'estoit pas esloigné de moy de cent cinquante pas, & qui passant sur la prairie & sur les arbres voisins les faisoit paroistre tous peints de ses couleurs quoy qu'affoiblies & beaucoup moins éclattantes que celles qui estoient sur la nuë. Or en cette observation il n'y avoit rien qui peust tromper mes yeux, ny aucun soupçon qu'il y eust des nuages sur la riviere & sur la prairie; et partant ie puis asseurer que du

du moins vne grande partie de cette Iris ne se faisoit & n'estoit pas sur les nues.

Mais ce que l'on n'a point à mon aduis obserteore & que l'on n'a point à mon aduis obserué; c'est qu'outre qu'il portoit plus de la moitié de son cercle, vne de ses cornes estant bien plus proche de moy que l'autre, il paroissoit couché obliquement & ne tomboit pas droit sur l'orison comme il semble que les autres font tousiours: Et quand les yeux ne m'eussent pas asseuré de ceste situation la raison me la deuoit faire croire; car le corps de la nuë qui en soustenoit la principale partie estant sort auancé vers l'Orient, il falloit de necessité que puis qu'vne de ses cornes s'estendoit jusques sur le milieu de la riuiere, l'Arc biaisast pour atteindre jusques-là.

En troissesse lieu, on void souuent que l'Arcanciel ne rompt pas son cercle quoy que les nucis qui le soustiennent viennent à manquer, & on ne laisse pas de le remarquer aux endroits ou la nuci ne paroist point, du moins où elle est si foible qu'il n'y a pas d'apparence qu'elle ait toutes les conditions que l'on demande pour la production de l'Iris.

Dailleurs il arriue souuent que l'Arcanciel se

forme tout d'vn coup dans vne nuë qui estoit dés long-temps auparauant opposée au Soleil, & qui auoit toutes les conditions pour le pouuoir produire; tout au contraire, il disparoist souvent la mesme nuë ou il auoit paru demeurant tousiours en sa mesme constitution: d'où vient donc qu'il ne se faisoit pas auparauant, & pourquoy cesse-il apres, puisque les mesmes dispositions se trouuent dans le subjet où il se doit former? Asseurement, il faut que ce desfaut vienne d'ailleurs que du Soleil & de cette nuë.

Enfin ceux qui vont dans les montagnes voyent souuent l'Iris estendu sur la terre, il y en a mesme qui ont marché dessus comme il m'est arriué deux ou trois sois; et ç'a esté vne opinion receuë de tout temps & qu'Aristote a consirmée, qu'il y a de certains arbres qui deuiennent plus odorans quand l'Iris tombe & s'arreste sur eux: Or si cela est ainsi, l'Iris ne se fait pas où elle paroist, puis qu'il est indubitable qu'elle ne se fait pas sur la terre, ny sur les arbres.

Mais quand ces experiences ne nous perfuaderoient pas cette verité, il ne faudroit que considerer la maniere dont on veut que l'Iris se fasse dans la nuë ou l'on la void, pour iuger que ce ne peut estre le lieu de sa naissance. Car elle ne peut s'y former que par Reflexion ou par Refraction; ce ne peut estre par vne simple reflexion, parce que la reflexion toute seule ne change point la lumiere en couleur comme nous monstrerons cyapres; et que la nuë n'est pas capable de faire reflechir les rayons auec tant de force & d'yniformité comme il seroit necessaire pour faire paroistre l'Iris de si loing que nous la voyons; parce qu'elle est transparente, molle, & inégale, et qu'vne forte reflexion ne se peut faire que sur des corps opaques, durs & dont les surfaces sont vnies.

Outre qu'il faudroit qu'elle fust caue pour quelanne reflechir la lumiere en arc, quoy que les n'est point yeux n'ayent iamais remarqué cette cauité pretenduë; Et que mesme il est impossible qu'elle s'y trouue, les vapeurs n'estant pas susceptibles de cette figure; et quand elles le seroient, la parfaite rondeur venant à leur manquer comme il pourroit souuent arriuer, il faudroit que l'Arc perdist aussi la parfaite rondeur de son cercle, & qu'il prist de differentes figures que l'on n'a ia-

mais obseruées. Ioint que dans toutes les Iris artificielles qui sont circulaires, il n'y a aucune cauité qui se r'encontre en leur production.

Que l'Iris ne se forme point das les gouttes depluye.

Pour remedier a ces inconuenients on a dit, que la nuë doit se fondre en gouttes d'eau pour former l'Iris, & que ces gouttes estant de la nature des miroirs r'enuoyent vers nous la lumiere du Soleil. Mais outre qu'il faudroit que ces gouttes fussent disposées en arc comme l'Iris, & qu'il n'y en eust point aillieurs que dans l'estenduë du cercle qu'elle fait, autrement celles qui seroient hors de cet espace reflechiroient la lumiere & formeroient des couleurs comme les autres, ce qui chocque la raison & l'experience; outre que l'Iris se void sans qu'il pleuue en aucune part, & par consequent sans que les nuës soient chargées de gouttes d'eau: Il est certain que ceux qui ont mis cela en auant n'ont point consideré, ny la maniere dont se fait la veuë, ny comment les gouttes de pluye se forment.

Car les objects ne se voyent point que quand leurs images font vn angle sensible

dans l'œil, & si l'angle est trop petit ils ne se voyent point du tout : c'est pourquoy les choses fort esloignées ne se peuuent apperceuoir que par le moyen des lunettes d'approche qui en eslargissent les angles; et c'est vne erreur de croire qu'vn rayon de lumiere puisse toucher la veuë s'il n'a quelque l'argeur; parce que si ce n'est qu'vne ligne, il ne fait point d'angle & n'est receu que comme vn point, qui non plus que les autres choses indiuisibles ne peut estre sensible.

Cela presupposé. Il est impossible que la lumiere qui se reslechist sur ces gouttes pretenduës puisse faire vn angle sensible dans l'œil estant si esloignées & si petites qu'elles sont: Car il ne faut pas croire que les gouttes de pluye soient si grosses dans la nuë qu'elles nous paroissent quand elles tombent; ce ne sont que comme des atomes qui s'vnissent apres en tombant & sont des gouttes plus ou moins grosses selon qu'elles tombent de plus ou de moins haut. En esset ceux qui sont dans les montagnes & qui passent a trauers les nuës qui se changent en pluye, ne remarquent que ces petites gouttes, & à mesurequ'ils descendent dans

les vallées la pluye se grossit; c'est pourquoy l'Hyuer quand les nuës sont fort basses les gouttes sont tousiours fort menuës, & l'Esté elles sont plus grosses, les nuës estant

alors plus esleuées.

Si cela est ainsi, comment la lumiere qui se reflechit sur ces atomes, peut elle faire vn angle fensible dans l'œil? Et quand mesme les gouttes seroient aussi grosses que nous les voyons tomber, comment dans vn si grand esloignement, ses rayons ayans vne si petite base & s'approchant incessamment l'vn de l'autre, pourroient ils se porter iusques aux yeux auec l'estenduë qui est necessaire pour estre visibles? Et c'est la raison pour laquelle l'Iris des fontaines ne se peut voir que dans vne certaine distance qui est incomparablement plus petite que celle de l'Arcanciel. Enfin les experiences que nous auons apportées cy-deuant, destruisent toute cette reflexion pretenduë; car l'Arcanciel ne paroist pas tousiours sur la nuë, & toutes les Iris artificielles se font plustost par refraction que par reflexion comme il est aisé à juger.

C'est ce qui a obligé la pluspart des

CHAPITRE I, Vac or

Philosophes à dire que l'Arcanciel se formoit par refraction, les rayons de la lumiere se rompant dans la nue & se changeant en des couleurs plus ou moins claires selon qu'ils penetrent des parties plus ou moins opa-

ques.

Mais les mesmes difficultez qui destruisent l'opinion precedente destruisent encores celle-cy; car ou la refraction se feroit dans le corps de la nuë, ou dans les gouttes de pluye qui s'y forment; et de quelque façon que ce fust, il faudroit que l'Arc ne se vist que dans la profondeur de la nuë; parce que les rayons qui se rompent quoy qu'ils perdent la premiere rectitude qu'ils auoient, vont toussours en auant; cependant on le remarque souuent au deuant de la nuë, & ses cornes en sont quelquefois si essoignées qu'elles paroissent plus proches de nos yeux que d'elle. Et cette seule observation rend vaines toutes les. autres pensées que l'on a euës sur la production de l'Iris dans la nuë où elle paroist comme sont celles de Cabeus, & d'autres escriuains de ce siecle.

Toutes ces raisons m'ayant souuent passé par l'esprit, & voyant que dans l'Iris des 16 DE LA NATURE DE L'IRIS,

triangles & des verres pleins d'eau, il y auoit tousiours trois corps, assauoir, le Soleil qui jette la lumiere, le triangle & le verre où elle se teint en couleur, & la muraille où elle se fait voir; ie iugé qu'il falloit de necessité que la mesme chose se trouuast dans l'Iris celeste, & qu'outre le Soleil & la nuë ou elle paroist, il y eust vn troissesme corps qui sist le mesme effet que le triangle & le verre, & au trauers duquel les rayons du Soleil passant, y souffrissent la mesme alteration qu'ils prennent en les trauersant.

Que l'Ivis ne seforme poins dans lesvapeurs qui sont demant la nuë,

Ie sçauois bien qu'Albert le Grand qui auoit eu la mesme consideration, croyoit qu'il y auoit toussours deuant la nuë ou paroist l'Iris, vn air pluuieux ou des vapeurs grossieres a trauers lesquelles la lumiere venant à passer se changeoit en couleurs, comme elle fait en trauersant le verre plein d'eau, & que la nuë qui estoit derriere les receuoit tout de mesme que la muraille fait celle des triangles & des verres. Mais cela ne satisfaisoit pas a mes doutes, puisque l'Iris paroist souuent quand l'air est serein de toutes parts, qu'elle se void aillieurs que sur la nuë, & qu'il doit y auoir vn grand essoi-

gnement

CHAPITRE PREMIER. gnement entre le lieu où elle se fait & le lieu où elle paroist, pour faire que l'Arc paroisse si grand qu'il est. Car l'experience nous apprend que plus le verre plein d'eau est proche de la muraille plus les cercles de l'Iris sont petits, & que quand on esparpille l'eau deuant le Soleil, l'Arc qu'il produit est fort estroit, parce que les rayons n'ont pas la liberté de s'estendre & de s'écarter jusques où il faudroit pour former vn plus grand cercle; tout de mesme que lors qu'ils passent par vn trou, la figure du Soleil qu'ils portent auec eux est plus grande où plus petite selon que la muraille où ils s'arrestent est plus proche où plus esloignee du trou. De sor+ te que si ces vapeurs estoient deuant la nuë, elles séroient trop proches d'elle pour y former vn si grand Arc; & si elles en estoient fort esloignées, les couleurs ne se pourroient pas porter si loing auec la viuacité qu'elles ont; parce que ces vapeurs n'auroient pas assez de corps pour faire la Refraction qui est necessaire à cette viuacité: c'est pourquoy l'Iris des fontaines n'a pas des couleurs si viues que celles des triangles ou des verres pleins d'eau, parce que les gouttes

DE LA NATURE DE L'IRIS, 18

n'ayant pas vn corps continu ne font pas vne Refraction si vnie comme elle se fait dans

vne plus grande masse.

Ces raisons me firent donc penser qu'il falloit qu'il y eust vn autre corps plus espais que les vapeurs & plus continu que les gouttes de pluye; en vn mot ie me figuré d'abord qu'il falloit qu'entre le Soleil & le lieu où se void l'Arcanciel, il y eust vne nuë ou ce merueilleux changement se fist.

l'Iris paroift.

Qu'il y a Et certe ma conjecture s'est trouvée convne nuc en-tre le Soleil forme à l'experience, n'ayant iamais depuis Gle lieu ou remarqué aucune Iris où ie n'aye obserué vne nuë deuant le Soleil; jusques l'a qu'il m'est souvent arriué de predire la naissance de ce meteore en considerant les nuës qui deudient passer deuant cét astre, lesquelles apparemment auoient la consistance necessaire à sa production. Enfin, i'ay fait la mesme observation dans l'Iris de la Lune, car en l'année 1625, pendant vne nuict tres-sereine, cette planette estant montée sur l'orison à la hauteur de 45. degrez où enuiron, elle me fit voir son Iris dans vne nuë qui luy estoit opposée vers le couchant, en ayant vne autre plus proche d'elle où vray semblable-

ment sa lumiere prenoit les trois couleurs qui forment ce Meteore. Car bien qu'elle ne m'ostast pas la veuë de la Lune, il estoit aisé à iuger qu'elle estoit entre elle & la nuë opposée, comme il arriue souuent en celle où se fait l'Iris du Soleil, laquelle tantost le cache à nos yeux & tantost le laisse voir en toute liberté selon qu'elle se rencontre dans le rayon visuel qui le porte à nos yeux, où selon

qu'elle en est esloignée.

Il faut pourtant remarquer que lors que nous disons que pour former l'Arcanciel il faut qu'il y ait vne autre nue que celle où il paroist, cela ne se doit pas prendre à la rigueur: car quoy que pour l'ordinaire ces deux nues soient differentes & separées l'vne de l'autre, il peut arriuer quelquefois que la nuë sur laquelle on le verra sera si grande qu'elle s'estendra iusques deuant le Soleil, & en ce cas ce ne sera veritablement qu'vne nuë, mais qui aura diuerses parties, dont l'vne seruira à le former & l'autre à le receuoir; mais ces deux parties peuuent passer pour les deux nuës dont nous parlons.

Enfin, ce qui confirme merueilleusement cette opinion, c'est que lors que l'Iris paroist

DE LA NATURE DE L'IRIS. sur la nue, s'il pleut entre le Soleil & elle, on void dans les gouttes de pluye les couleurs de l'Iris qui respondent à l'Arcanciel qui est dans la nuë; soit qu'ayant le dos tourné vers luy nous le voyons dans la pluye qui est au deuant de nous; soit qu'il pleuue entre nous & luy, comme nous auons souuent obserué. Car c'est là vne marque euidente que la lumiere s'estant modifiée dans la nuë qui est deuant le Soleil, porte les couleurs qu'elle a prises, sur tous les corps qui sont dans l'air & qui sont capables de les soustenir; et que les mesmes rayons qui forment l'Arc qui est dans la nue passant à trauers les gouttes de pluye qui sont entre deux, y font paroistre les mesmes couleurs; tout de mesme qu'en exposant vn triangle au Soleil on void son Iris sur la muraille & sur la fumée que l'on fait esleuer entre luy & elle.

Apres tout si l'on veut considerer que par le moyen de cette hypothese, on rend si facilement raison de la figure, de la disposition des couleurs, & de toutes les autres apparences les plus extraordinaires de ce Meteore ou les autres opinions trouuent tant de peine & si peu de satisfaction comme nous se-

Voyez la figure page rons voir cy-apres; on sera contraint d'auouer que ce fondement est tout à fait necessaire à la Nature pour le produire, & à la Philosophie pour en comprendre le secret.

Cette nuë est donc le lieu veritable & comme le sein où le Soleil forme les couleurs de l'Iris qu'il respand apres dans l'air & les compasse en arc sur les nuës & sur les autres corps qui peuuent seruir de sonds pour les soustenir; car il leur arriue la mesme chose qu'à celles que produisent les verres pleins d'eau & les triangles de chrystal, lesquelles ne peuuent estre veuës quand elles sortent hors d'eux, si elles ne sont recüeillies & appuyées sur vne muraille où sur quelque autre corps opaque.

Si cela est ainsi, il est inutile de demander tout cét appareil que l'on s'est imaginé deuoir estre dans la nuë ou paroist l'Arcanciel; il n'y faut point rechercher cette concauité qu'on s'y est figurée, ny toutes ces gouttes de pluye qui doiuent seruir comme l'on croid dautant de miroirs pour representer le Soleil, ny tous ces diuers angles de reslexion ou l'on dit que se font les

C iij

DE LA NATURE DE L'IRIS,

couleurs; Car si l'Iris ne se fait point en cette nuë là, quand toutes ces dispositions s'y trouueroient elles ne seruiroient de rien à sa production; et si elles y estoient necessaires, il faudroit qu'elles fussent dans celle qui est deuant le Soleil, puis que c'est la seule ou se fait l'Arcanciel. Mais celle-cy n'a besoin que d'estre transparente pour donner passage aux rayons du Soleil, soit qu'elle se change en gouttes d'eau comme il arriue souuent, soit qu'elle demeure dans la simple consistance de vapeur sans se changer en pluye; pouuant en cét estat former les couleurs, comme on void dans les couronnes qui se font alentour des astres & des chandelles. Quant à celle où paroist l'Iris, il suffit qu'elle soit opaque & obscure pour arrester la lumiere & les couleurs qui se respandent sur elle.

Comment II ris des fontaines se fait.

Il est donc certain que l'Iris celeste ne se fait point où elle paroist: Et si l'on dit que celles des fontaines se forme au mesme lieu où elle se fait voir, on se trompe & l'on ne prend pas garde que les gouttes d'eau où la lumiere se teint en couleur ne sont pas les mesmes où elle paroist; car apres qu'elle s'est

modifiée dans celles qui sont les premieres exposées au Soleil, elle réjallist sur les autres & y fait paroistre les couleurs dont elle s'est chargée, de la mesme façon qu'elle fait fur la nuë.

Ce n'est pas pourtant à dire qu'il n'y ait paroissement des Iris qui paroissent au lieu où elles se for- lieu on elles ment; on void celles que la lumiere pro- se forment. duit dans les gouttes de rosée, dans les diamants & dans les couronnes qui se font alentour des astres & des chandelles quand l'air est fort humide; et quand on regarde les objets à trauers le triangle de chrystal on les y apperçoit peints des mesmes couleurs de l'Arcanciel; et mesme quand les rayons du Soleil en passant par les triangles forment l'Iris sur les murailles, si on place les yeux vers le lieu où elle paroist on l'apperçoit dans le triangle. Mais il ne s'ensuit pas de là qu'il en soit de mesme de l'Iris des fontaines; Et la maniere dont elle se fait voir en est vne preuue conuaincante: Car pour la remarquer il faut estre entre le Soleil & elle, & auoir le Soleil à dos; au lieu que pour voir toutes les autres qui se font où elles paroissent, il faut qu'elles soient entre le Soleil

C iiii

24 DE LA NATURE DE L'IRIS, & celuy qui les regarde & qu'on ait le Soleil en face.

Et la raison en est que l'Iris ne se peut voir dans les subjets où elle se fait que par les rayons, qui apres s'estre rompus dans ces corps là se portent aux yeux; de sorte qu'il est necessaire qu'elle soit entre le Soleil & nous, & que nous ayons le Soleil en veuë; parce que les rayons qui sont rompus, quoy qu'ils perdent leur rectitude par la Refraction qu'ils souffrent, vont tousiours en auant & ne retournent pas en arriere comme ceux qui sont reflechis; c'est pourquoy il faut que les yeux soyent exposez au Soleil pour les receuoir. Mais quand l'Iris paroist où elle ne se fait pas, elle ne se peut voir que par des rayons reflechis qui ne peuuent se porter aux yeux qu'on ne tourne le dos au Soleil, si ce n'est qu'il y ait vne double reflexion: D'où il s'ensuit que l'Iris des fontaines est de cét ordre la puis qu'on ne la peut voir qu'en cette scituation.


Il y a deux flexion.

Mais il faut encore remarquer qu'il y a sortes de re- deux sortes de Reslexion, l'vne qui se fait sur les corps dont la surface est polie & sans aucune inegalité; l'autre qui se fait sur des **fuperficies**

superficies inégalles & raboteuses; La premiere r'enuoye tous les rayons à angles esgaux & vniformes & ne permet pas qu'ils se portent aux yeux que dans les aspects qui respondent à ces angles; hors d'eux ils ne frappent point la veuë & ne laissent voir aucun des objets dont ils portent l'image; comme on remarque dans les miroirs. Mais quand les surfaces sont inégales tous les rayons qui tombent sur elles ne retournent pas comme les precedens, la plus part se couppent par les inégalitez de la surface & retombent sur elle en mille endroits; de sorte qu'ils y laissent l'image de l'objet comme emprainte & comme si elle y estoit adherente, la laissant voir en toutes sortes d'aspects où la surface peut estre veuë: Aussi quoy qu'en effet il y ait là vne vraye reflexion, on dit neantmoins qu'elle se void par vne veuë directe comme les autres couleurs fixes. Or comme l'Iris peut souffrir ces deux sortes de Reflexions, elle peut estre aussi apperceuë en ces deux manieres; en effect celle qui paroist sur les murailles par le moyen des triangles & des verres pleins d'eau, se void en toutes sortes d'aspects & en quelque si-

DE LA NATURE DE L'IRIS. tuation que l'on se mette, parce que la muraille est vn corps dont la surface est toute inégalle qui ne peut faire de reflexion vniforme: Telle est encores l'Iris qui paroist sur la nuë, car quoy que l'on en veuille dire elle est veuë en toutes sortes d'aspects, & autant d'yeux qui la regardent, la voyent en mesme lieu & en mesme situation comme nous montrerons cy-apres. Mais il n'en est pas ainsi de l'Arcanciel qui paroist sur la pluye, ny de l'Iris des fontaines: comme l'vn & l'autre tombe sur des gouttes d'eau dont les surfaces sont esgales & qui sont de la nature des miroirs, on ne les peut voir qu'en certaines lignes & foubs certains angles hors lesquels on ne les apperçoit plus.

Le lieu où se forme l'Arcanciel estant à mon aduis solidement estably par toutes les raisons & les experiences que nous auons apportées, il faut maintenant tascher de découurir ce qui s'y passe & voir s'il est possible ces secrets ressorts qui changent la lumiere en couleurs & qui luy sont prendre la figure circulaire dans les nuës opposées.



DES COVLEVRS

DE L'IRIS.

CHAPITRE SECOND.

o mme c'est vne grande auance pour ceux qui ont à chercher vn thresor d'auoir trouué le lieu où il est caché, nous pouuons dire aussi qu'ayant à d'escouurir la Natu-

re de l'Iris qui est toute composée de rubis, d'emeraudes & d'amethystes, nous n'auons pas peu fait d'auoir rencontré la mine où le Soleil forme toutes ces riches pierreries; et que nous auons vn grand a-uantage sur ceux qui s'imaginent de la pou-uoir trouuer aillieurs, n'ayant point à perdre le temps qu'ils employent à vne vaine recherche, & n'estant point arrestez par mille dissicultez qui les embarassent & dont ils ne sçauroient iamais sortir. Il est vray que

28 DES COVLEVES DE L'IRIS. nous ne laissons pas d'en auoir d'autres à surmonter, & que pour parler de la naissance de ce merueilleux Meteore, il nous faut aller iusques à la source de la lumiere, qui comme dit le Sage est toute couuerte de tenebres, & qui esblouyt incomparablement plus l'esprit qu'elle ne sçauroit iamais faire les yeux: Il nous faut montrer quel est cet admirable changement qui la fait passer en tant de Couleurs differentes; Quelles sont les mesures & les degrez dans lesquels elle se partage à chacune; en vn mot il nous faut faire voir des choses que l'on peut dire n'auoir encore esté apperceuës que des yeux du Soleil & de ceux de la Nature.

A sçauoir si les couleurs de l'Iris sont de veritables Couleurs.

ARTICLE PREMIER.

A Premiere difficulté qui se presente sur les Couleurs de l'Arcanciel est de sçauoir si ce sont de veritables Couleurs : l'Eschole est cause du doubte qu'on en peut a-

uoir; car ayant diuisé les Couleurs en Reelles & Apparentes, elle propose pour exemple de ces dernieres, les Couleurs de l'Iris; de sorte que les Couleurs Apparentes estant opposées par cette diuision à celles qui sont Reelles, il s'ensuit que les Couleurs de l'Iris ne sont pas Reelles & par consequent qu'elles ne sont pas veritables.

Mais outre que les sens ne peuuent estre touchez que par des choses reelles & positiues, & que par consequent les Couleurs de l'Iris qui frappent les yeux doiuent estre de cét ordre-là; il est certain que tous les objects qui se voyent dans les miroirs y doiuent enuoyer leurs images, & que tout ce qui produit son image doit estre reel & effectif. De sorte que les Couleurs de l'Iris se pouuant voir dans les miroirs, y doiuent aussi enuoyer leurs especes & par consequent estre de veritables couleurs.

Mais ie dis bien dauantage, il n'y à au- 11 n'y a cune Couleur qui se presente à l'œil qui ne Point de soit reelle & veritable, non pas mesme cel- ne soit Reelle qui nous fait paroistre le Ciel & les paisages esloignez, de couleur bleuë: car bien que ces corps-là ne soyent pas effectiuement

30 DES COVLEVES DE L'IRIS, bleus; si est-ce que l'œil void vn bleu veritable, parce que ce n'est autre chose que la lumiere qui est ainsi modifiée par la profondeur de l'air, & qui se porte à la veuë auec cette modification : de sorte que la lumiere ainsi modifiée estant une chose reelle & positiue, il faut que cette couleur le soit aussi. Il en est de mesme de l'Iris que les yeux humides & chassieux voyent alentour des chandelles: car bien que ses couleurs ne soyent pas au lieu où elles semblent estre; ce sont neantmoins de veritables couleurs que la lumiere prend en passant au trauers des humiditez dont les yeux sont chargez, y souffrant les mesmes refractions qui produisent les couleurs des autres Iris. Ainsi l'on peut dire que le Ciel & les paisages reculez sont apparemment bleus; mais non pas que le bleu dont ils semblent estre colorez, soit vne couleur apparente: Et s'il y en a quelqu'vne qui puisse estre appellée ainsi, c'est la noirceur des tenebres; parce que ce n'est point veritablement vne couleur & qu'elle n'est visible que par accident comme nous dirons cy-apres.

Les Couleurs de l'Arcanciel sont donc des Couleurs veritables & non point Apparentes:

se n'est qu'on voulust donner ce nom à celles qui ne se voyent qu'en certains aspects, comme quelques-vns ont pensé: Mais cette suitte est inutile puis que celles de l'Iris que les triangles de chrystal & les verres pleins d'eau font paroistre sur les murailles se voyent en toutes sortes d'aspects: Car puis qu'elles sont de mesme nature que celles de l'Arcanciel estant produites par les mesmes causes & par les mesmes moyens, celles-cy ne sont pas plus apparentes qu'elles & sont toutes aussi reelles & essectiues que les autres qui se remarquent sur tous les corps visibles.

S'il falloit donc rectifier la diuision que l'Eschole a donnée où en substituer vne autre en sa place qui sust plus reguliere, il faudroit dire qu'il y a des Couleurs Fixes qui sont attachées & adherentes à leurs subjects, et d'autres qui sont Mobiles & qui n'y tiennent point comme sont celles qui se sont par la lumiere exterieure; et que de celles-cy les vnes ne se voyent que sous certains angles & en certaines veuës; & les autres en toutes sortes d'aspects selon que la lumiere se reslechit sur des corps polis où raboteux. Mais cecy suppose des connoissances que nous examinerons cy-

DES COVLEVES DE L'IRIS, apres, il faut premierement voir si toutes ces Couleurs sont de differente Nature.

A sçauoir si les Couleurs' de l'Iris sont de mesme espece que les autres.

ARTICLE DEVXIESME.

fortes d'objets.

Ilyadeux DOVR decider solidement cette question, I il faut presupposer que les sens ont deux sortes d'objects, l'vn qui est propre & particulier à chacun d'eux ; l'autre qui est commun à tous où à plusieurs. Ainsi la couleur est l'object propre de la veuë par ce qu'il n'y à que la veuë qui puisse connoistre la couleur, tel est le son à l'esgard de l'ouyë, la saueur à l'esgard du goust, &c.

> Mais la figure, la grandeur, le lieu, la distance, le nombre & le mouuement sont des objects communs, par ce que l'œil ne iuge pas tout seul de la figure & de la grandeur des choses, mais encore le toucher; il n'en connoist pas seul le mouuement & la distance, mais l'oreille en peut aussi donner

son iu gement & ainsi du reste.

Or l'object propre a cet auantage qu'il ne trompe iamais le sens, & s'il y a de l'erreur elle vient des objects communs : car l'œil qui void vne Couleur peut bien se tromper pour le lieu où elle est, pour la grandeur & pour la figure qu'elle a; mais il ne peut iamais errer dans l'espece & la difference sous laquelle elle luy paroist; et il saut de necessité qu'il la reçoiue telle qu'il se la figure, parce que la nature des sens est purement representatiue, & qu'ils ne peuuent representer que ce qu'ils reçoiuent; et par consequent il saut que l'œil reçoiue effectiuement la couleur bleuë s'il voit effectiuement cette couleur.

Puisque l'œil ne se peut donc tromper dans le iugement qu'il fait de son object propre, s'il arriue qu'il ne reconnoisse aucune difference entre deux Couleurs pour ce qui concerne la nature de la Couleur, il faut de necessité qu'elles soyent de mesme espece : Or est-il qu'il n'en remarque aucune entre celles de l'Iris que le Soleil peint sur la muraille où dans la nuë & celles que le peintre couche sur la toile quand il en fait le pourtrait, & par consequent elles sont de mesme espece.

34 DES COVLEVES DE L'IRIS,

Daillieurs, ces sortes de Couleurs que la lumiere produit augmentent & fortisient les Couleurs naturelles qui leur sont semblables, et si elles tombent sur d'autres qui ne le soient pas, elles en sont paroistre de nou-uelles qui sont toutes pareilles à celles qui naissent du messange des seules Couleurs si-xes; Or c'est vne maxime auoiiée de toute la Philosophie que les qualitez qui s'augmentent & se fortisient l'yne l'autre sont d'yne messange.

Enfin ces Couleurs mobiles touchent le sens de la mesme façon que celles qui sont fixes, elles réjouissent où blessent les yeux comme celles-cy, elles dissipent où ramassent les esprits comme elles; en vn mot elles ont les mesmes effects & les mesmes proprietez, & par consequent elles sont de mesme nature; mais il faut voir en quoy consi-

se cette Nature.

Quelle est la Nature de la Couleur.

ARTICLE TROISIESME.

E que nous auons de plus euident en vne matiere qui est si obscure & si difficile à descouurir, & qui est autant cachée à nostre esprit qu'elle est sensible à nos yeux, c'est que la lumiere entre dans la nature & dans l'essence des Couleurs qu'on appelle Apparentes: car tout le monde est d'accord qu'elles ne sont autre chose que la lumiere mesme qui est alterée & modifiée d'vne certaine maniere, & qui par cette modification prend toutes les diuerses apparences de couleurs que nous y remarquons. En effect quand la lumiere du Soleil est receuë dans vn triangle de chrystal & qu'elle fait paroistre vne Iris sur la muraille, c'est la lumiere mesme qui penetre le triangle & qui se porte sur la muraille; dautant que la lumiere ne peut s'arrester dans le triangle estant transparent comme il est, il faut qu'elle passe outre & qu'elle suiue le mouuement naturel de

36 DES COVLEVES DE L'IRIS, ses rayons. Or les Couleurs de cette Iris se voyent au mesme endroit ou tombent ces rayons, & par consequent il est necessaire où que la lumiere se messe auec la couleur, où qu'elle mesme se change en couleur : or il n'y à rien là qui puisse produire la couleur comme vne qualité distincte de la lumiere; parce que ce seroit où le triangle qui n'a point de couleur, où la muraille qui ne fait rien que la receuoir, puis qu'auant que l'Iris tombe sur elle elle est dans l'air & dans le triangle mesme. Il reste donc que la lumiere se change en couleur, & que la Couleur ne soit rien autre chose que la lumiere modifiée de la façon que nous dirons cy-apres: Et partant nous pouuons conclure que la lumiere entre dans l'essence & dans la nature

des Couleurs qu'on appelle Apparentes.

Si cela est ainsi & que ces sortes de Couleurs soient de mesme espece que les autres qui sont sixes & adherentes à leurs subjects comme nous venons de montrer; il sensuit que la lumiere est de l'essence de toutes les Couleurs & que toutes celles qui se presentent aux yeux ne sont que des lumieres di-

uersement modifiées.

Certainement on ne sçauroit considerer la ressemblance qu'il y a entre la Blancheur & la lumiere sans estre persuadé que cette couleur est vne lumiere affoiblie & diminuée; car elle blesse la veue & dissipe les esprits comme elle; elle éclaire les lieux sombres & sert pour donner jour aux maisons qui sont obscures; elle se multiplie comme la clarté des estoiles & des chandelles; c'est pourquoy les extremitez des choses blanches paroissent doubles dans les miroirs, & ceux qui ont la veuë foible, les voyent par tout aillieurs de la mesme sorte : ce qui n'arriue point aux choses qui sont noires, parce qu'elles ne contiennent pas tant de lumiere que celles-là. Mais ce qui est encore tres considerable c'est que les choses lumineuses paroissent blanches & que le noir qui est contraire à la blancheur, a l'apparence des tenebres qui est la priuation de la lumiere; de sorte qu'on peut dire que tout l'object de la veuë s'estend comme sur vne ligne qui part de la lumiere & passe par la blancheur & par les autres couleurs qui la suiuent, & se termine dans les tenebres.

Enfin qui considerera la nature des espe-

38 DES COVLEVES DE L'IRIS,

ces visibles qui se respandent en vn moment comme la lumiere, qui se reslechissent comme elle à angles esgaux, qui sont subjectes aux mesmes restractions qu'elle souffre, qui se messent si estroitement auec elle & qui en vn mot ont toutes les mesmes proprietez qu'elle a; sera contraint d'auoüer que ce sont des esfusions & des écoulemens de quelque lumiere qui se multiplie dans l'air comme celle des astres & des autres corps lumineux.

Mais pour joindre à ces raisons qui sont sensibles celles de la plus haute Philosophie: Elle nous apprend qu'vne seule puissance ne peut auoir qu'vn seul acte & vne seule forme, & que le sens de la veuë ne peut par consequent auoir qu'vne seule forme qui luy serue d'objet propre, ny juger exactement que d'vne seule qualité; de sorte que s'il connoist la lumiere & la couleur, il saut que toutes deux ne fassent qu'vn seule acte & qu'vne seule qualité & ainsi que la Couleur soit vne lumiere.

Daillieurs à proprement parler chaque sens ne iuge que d'vne contrarieté entre les extremitez de laquelle est renfermée toute l'estenduë de son objet, ainsi l'ouye iuge du fon & du silence, le goust de la saueur & de ce qui est insipide; et par la mesme raison l'œil ne peut iuger que de la lumiere & des tenebres qui est la seule contrarieté qui comprend toute l'estendue de son object: de sorte, que s'il connoist les Couleurs, il faut que ce soit ou comme lumieres, ou comme tenebres; et puis que ce ne sont pas des tenebres, pour les raisons que chacun sçait, il faut de necessité que ce soient des lumieres.

A quoy il faut adjouster qu'il y a mesme rapport entre ce qui est visible & ce qui est inuisible, qu'entre ce qui est coloré & ce qui n'est pas coloré; et par consequent par la maxime des proportions qui se changent de l'vne à l'autre, il y a aussi mesme raison entre ce qui est visible & ce qui est coloré, qu'entre ce qui est inuisible & ce qui est coloré, qu'entre ce qui est inuisible & ce qui est entre ce qui est visible & ce qui est coloré est fondée sur ce que la couleur est visible, il faut donc que ce qui n'est pas couleur soit inuisible; et partant la lumiere est vne couleur & la couleur est visible.

40 DES COYLEVES DE L'IRIS,

Ces raisons nous peuuent donc faire croire auec certitude que toutes les Couleurs font des lumieres : mais elles ne decident pas le point le plus important en cette matiere; A sçauoir si toutes les Couleurs ne sont comme les apparentes que des lumieres empruntées du Soleil & des autres corps lumineux, en sorte qu'à l'exemple de celles-là, elles s'esuanouyssent quand ces corps là disparoissent; et pour le dire en vn mot selon la pensée du Poëte, que la nuict oste la couleur à toutes les choses & que le retour du Soleil la leur redonne. Ce qu'il faut soigneusement examiner puis que les plus grands esprits qui se sont voulu sauuer des erreurs de l'eschole sont tombez en celle-cy comme nous allons faire voir.

trades de incada sobildina da ma calacida. Habitante a constituida de insulación a contrata

100 1 78 - 0 17

A sçauoir

A sçauoir si toutes les Couleurs se font de la lumiere du Soleil & des autres corps lumineux, comme les Apparentes.

ARTICLE QUATRIESME.

dans les Escholes, que les Couleurs procedent des premières qualitez, s'est trouué si mal fondée qu'elle n'a plus de partis'allioit esgalement auec le chaud & auec le
froid comme dans la chaux & dans la neige;
Et auec l'humide & auec le sec comme dans
le laict & dans la cerusse, & ainsi de toutes
les autres especes de couleur; c'est auec rais'allion qu'on a abandonné des sentimens si peu
raisonnables & qu'on a eu recours à la lumiere pour descouurir la nature d'une qualité
qu'on auoit couuerte de tant d'obscuritez.

Et certainement on ne pouvoit considerer cette agreable varieté de couleurs dont elle forme les Iris & les Couronnes; ce rouge esclatant dont elle peint les nuës au leuer DES COVLEVES DE L'IRIS, & au coucher du Soleil; ny ce bleu celeste dont elle couure toute la surface des Cieux; on ne pouuoit dis-je remarquer toutes ces choses qui sont des effects indubitables de la lumiere que les astres respandent dans l'air, sans tomber dans le soubçon que toutes les autres Couleurs procedent de la mesme source.

Mais on ne s'est pas contenté de ces premieres conjectures, on a cherché des raisons pour les appuyer, & les apparences se sont trouuées si fauorables à cette opinion qu'elle passe maintenant pour la plus vray-semblable, du moins pour la plus ingenieuse. Elle asseure donc qu'il est non seulement inutile de mettre la Couleur pour vne qualité distincte de la lumiere exterieure, puisqu'auec celle-cy on rend raison de tout ce qui concerne les Couleurs: Mais encore qu'il est necessaire de la reconnoistre pour le principe & la forme qui constitué toute leur essence; par ce que sans elle on ne sçauroit marquer les causes ny les moyens qui seruent à les produire & à les conseruer, à les changer & à les destruire. Par exemple si on veut chercher vne autre cause qui produise

la blancheur de la neige, il la faut trouuer dans la substance où dans les accidens de la neige; ce ne sera pas dans sa substance, par ce qu'elle n'en à point d'autre que celle de l'eau à laquelle la blancheur n'est point naturelle; ce ne sera pas aussi dans ses accidens puis que les premieres qualitez ne seruent de rien à la production des Couleurs comme nous auons montré, et qu'il ny en a aucune parmy les secondes qui ait ce pouuoir-là, n'ayant pas mesme la vertu de produire aucune chose comme toute l'eschole enseigne. Mais quand la neige vient a perdre cette blancheur en se fondant, il y a encore plus de peine à dire d'où vient ce changement, la neige fonduë n'estant differente en aucune chose de ce qu'elle estoit auparauant, que dans la diuerse situation & consistance de ses parties, où l'on ne peut trouuer la cause de deux couleurs si opposées si on n'a recours à la lumiere qui tombe & se reflechist diuersement sur elle.

Daillieurs les Couleurs fixes de toutes ortes d'objects paroissent differentes selon qu'elles sont esclairées, comme on peut voir dans les peintures qui selon le iour qu'on 44 DES COVLEVES DE L'IRIS,

leur donne, selon quelles reçoiuent la lumiere à plomb où de biais, ont au jugement des yeux vn coloris different: Le drap mesme le plus noir paroist au Soleil de couleur rougeastre: Et quand l'eau qui n'a aucune couleur brunit le papier, le succre, le linge & toute autre sorte de teinture, cela ne peut venir que de la lumiere qui se reflechit d'vne autre façon sur ces subjects là qu'elle ne faisoit auant qu'ils fussent mouillez. Apres tout s'il y a des Couleurs fixes qui dependent absolument de la lumiere exterieure, il n'y a pas de raison pour laquelle on doiue tirer les autres qui sont de mesme genre, d'vne autre source & d'vn autre principe : or il est certain que l'escume est naturellement blanche & que sa blancheur est du mesme ordre que celle du succre, du papier & des marbres, estant fixe & permanente comme la leur. Cependant l'escume ne prend cette couleur que de la reflexion de la lumiere: C'est pourquoy celle qui se fait sur l'ancre, fur le sang & autres semblables liqueurs, paroist blanche nonobstant la couleur naturelle quelles ont. En effect comme ce n'est qu'vn amas de petits globes formez de l'air &

CHAPITRE II. 45 de quelque humeur qui se messent ensemble, il n'y en a aucun qui ne renuoye les rayons qu'il reçoit, & plus ils sont petits plus les rayons s'approchent l'vn de l'autre & portent aux yeux la lumière toute pure fans aucune interruption & fans aucun meslange d'obscurité, d'où naist la Blancheur: Et parce qu'vne chose ronde n'a aucun point qui ne puisse reflechir les rayons comme on peut iuger par les miroirs conuexes qui representent les objects en toutes sortes d'aspects, tout au contraire des plats & des concaues; de la vient que la blancheur de l'escume se void aussi en toutes sortes de veuës & semble luy estre interieure & adherente. Or si cela est veritable il y a grande raison de croire que tous les autres corps que nous sçauons estre composez de la mesme façon, n'ont point d'autre cause de leur Blancheur que celle qui nous la fait paroistre sur l'escume; de sorte que la neige, la farine, le laiet caillé, la craye, la cendre & toutes les choses qui sont calcinées estant

composées d'une infinité de ces petits corps spheriques comme on peut juger par les lu-

nettes d'approche; il faut que la lumiere F iij y fasse la mesme cheute & la mesme restexion & en suitte la mesme apparence de couleur. C'est pourquoy elle se perd dans la neige quand elle vient à se sondre, parce que la figure ronde des parties dont elle est composée, s'aplanit & ne peut plus faire les restexions qu'elle faisoit auparauant.

Que si le sens nous montre ces veritez dans les choses dont il peut estre le juge, la raison doit faire le reste en celles où il ne peut atteindre, & conclure que toutes les choses blanches sont composées de ces petites parties spheriques qui causent vne plus ample & plus forte reslexion & que cette reslexion qui porte à la veuë la lumière plus

pure fait paroistre la Blancheur.

Cette verité se peut confirmer par la confideration du Noir qui estant opposé à la blancheur vient aussi d'une cause toute contraire; car les choses où la lumiere ne se reflechit point, paroissent noires comme sont celles qui sont profondes, celles qui sont fort essont principalement hors les lignes où se fait la reslexion; et c'est de là que l'eau, les miroirs, & les diamans paroissent de couleur brune & obscure. Tels sont encore les corps composez de parties aiguës & principalement de triangulaires qui sont celles où il se fait moins de reflexion; c'est pourquoy le charbon est noir, toutes ses parties estans de cette figure non seulement par le jugement des yeux qui les remarquent par le moyen des lunettes d'approche; mais encore par celuy du toucher qui le sent rude & inesgal soit qu'il soit entier soit qu'il soit broyé. De sorte que la cause generale de la Blancheur & de la Noirceur de tous les corps ausquels elle semble estre adherente, ne vient que de la figure des parties dont ils sont composez les vnes estans rondes & les autres triangulaires.

Et ce principe est si conforme à la raison & à la nature qui ne multiplient point les causes sans necessité, que les Saueurs en tirent
leur origine: car celles qui sont acres & aiguës procedent de ces petites parties qui sont
pointuës dans leurs angles & qui picquent
par consequent la langue: Au contraire, la
douceur vient des parties rondes qui ne la
peuuent penetrer & qui coulent dessus auec
facilité. C'est pourquoy toutes les graisses

DES COVLEVES DE L'IRIS, qui sont espaissies, sont blanches & douces & sont mesmes agreables au toucher, n'ayant au cune pointe qui le blesse où qui l'irrite: Au contraire les eaux fortes noircissent & le vitriol entre dans la composition de l'ancre, leur saueur acre estant une marque de la figure aigue & perceante des petits corps dont ces liqueurs sont composées. C'est encore pour cela qu'entre les pierres celles qui sont noires, sont plus rudes & inesgales que les blanches, comme on peut juger par le marbre noir qui à plus d'asprete au toucher & moins de pesanteur que le blanc. Et entre les metaux le fer est plus noir que pas vn autre à cause de ces parties angulaires que l'on y remarque non seulement par la veuë, mais encore par cet esprit penetrant que l'on en tire par le feu. Enfin qui voudroit venir au detail de toutes les choses ausquelles ces deux premieres Couleurs sont comme adherentes, n'auroit pas peine à y appliquer les causes dont nous venons de parler, & à satisfaire ainsi à toutes les difficultez qui ne semblent pas se pouvoir resoudre dans les autres opinions.

De vouloir apres cela descendre dans le particulier de toutes les autres Couleurs

ce seroit vne chose superfluë, puis qu'estant toutes composées du blanc & du noir, elles doiuent auoir les mesmes principes, & se peuuent rapporter aux differentes figures des subjects où elles paroissent. Car s'ils ont des parties qui reflechissent la lumiere & d'autres qui ne la reflechissent pas, il s'y fait vn meslange de clartez & de tenebres qui selon les differentes proportions qu'elles ont ensemble font aussi diuerses especes de Couleurs. Par exemple si ces deux sortes de parties se suiuent immediatement l'vne l'autre en sorte qu'apres vne reflexion il y ait vne interception de lumiere & puis apres vne reflexion & ainsi de suitte, tout l'object paroist rouge; dautant que le Rouge est justement au milieu du blanc & noir & doit participer esgalement de l'vn & de l'autre, & par consequent il doit y auoir vne partie qui reflechisse la lumiere & l'autre qui l'a retienne. Mais s'il y a deux parties qui la reflechissent & vne qui ne la reflechisse point, & que la mesme proportion se garde en toutes les autres, de là naistra le Iaune qui est au milieu du rouge & du blanc & qui par consequent à deux portions de blanc & vne de noir. Tout au

contraire s'il y a deux parties qui ne reflechissent point & vne qui reflechisse, elles produisent le Bleu qui tient le milieu entre le rouge & le noir, & qui par consequent a deux portions de noir & vne de blanc, & ainsi de toutes les autres Couleurs selon les diuers messanges de ces parties qui sont obscures & lumineuses & pour le dire plus precisement qui sont spheriques où angulaires.

Or elles prennent ces sortes de figures, premierement par la nature des principes qui entrent en leur composition, car il y a des corps qui sont naturellement ronds, d'autres qui sont cubiques, sexangulaires comme les sels, les chrystaux & autres semblables. Secondement par la rencontre de diuerses figures qui s'vnissent & en forment de nouuelles : Ainsi de plusieurs triangles se fait l'Icosaëdre où autre pareille qui approche de la spherique. Et de là vient que diuerses substances acres de leur nature deviennent blanches & douces estant messées ensemble comme l'huyle de Tartre & celuy de Vitriol; par ce que les triangles dont leurs parties sont formées s'vnissent ensemble & font des figures spheriques lesquelles sont cause de la Blan-

cheur & de la Douceur comme nous auons dit. En troisiesme lieu par la contrainte qu'elles souffrent en passant à trauers d'autres corps qui les pressent & qui corrompent leur figure naturelle; car c'est ainsi que les sucs dont les pierres sont formées prennent diuerses figures selon qu'ils se filtrent & se criblent s'il faut ainsi dire à trauers des terres spongieuses où solides, rudes où polies où d'autre pareille consistence. C'est ainsi que l'humeur qui monte dans les fleurs, estant contrainte de passer par les destours innombrables des fibres & par les destroicts des nœuds qu'elles font en mille endroits, prend toutes les figures qui causent cette admirable varieté de couleurs dont elles sont embellies. Enfin c'est ainsi que le plumage des oyseaux, les peaux des bestes & les humeurs mesmes qui se trouuent en tous les corps des animaux prennent toutes ces differentes teintures que nous y remarquons; les petites parcelles dont tous ces corps sont composez prenant diuerses situations & diuerses figures selon les lieux par où elles passent, où selon que la coction les transporte du centre à la circonference où de la circonference au centre & comme parle Hippo-

G ij

DES COVLEVES DE L'IRIS, crate des tenebres à la lumiere, & de la lumiere aux tenebres.

Ce sont là les fondemens & les raisons generalles dont on se peut seruir pour montrer que la Couleur n'a point d'autre principe que la lumiere exterieure du Soleil ou des autres corps lumineux, & qu'en leur absence il n'y a aucune couleur. C'est à nous maintenant à les bien peser, & à voir si elles sont conformes à la verité & à la nature des choses.

Que la Couleur Naturelle des corps ne procede point de la lumiere exterieure.

ARTICLE CINQVIESME.

Bien considerer tout ce grand enchainement de raisons dont l'opinion precedente est composée, on peut dire que de toutes celles qui sont venuës iusques à nous, il ny en a point qui nous approche si prés de la verité ny qui nous en essoigne dauantage. Car comme les choses qui sont oppo-

sées se discernent facilement & que l'on confond celles qui se ressemblent; on se peut bien plus aysément sauuer de l'erreur des autres opinions qui sont essoignées de la vraysemblance que de celle-cy qui a toutes les apparences de la verité & où le vray & le faux sont si delicatement messez ensemble qu'il est impossible d'abord de les reconnoi-

stre & de les distinguer.

En effect on ne luy sçauroit contester que la lumiere exterieure ne soit la cause de toutes les Couleurs apparentes; Qu'elle ne fasse encore de grands changemens sur toutes les Couleurs fixes & naturelles selon le biais qu'elle tombe sur elles : Que mesme elle ne forme toute seule la Blancheur qui est fixe & permanente en quelques subjects comme celle du verre & du chrystal en poudre & peut-estre encore de l'escume & de la neige. Enfin on ne sçauroit nier qu'il n'y ait beaucoup de choses blanches qui sont composées de petites parties rondes & d'autres qui sont noires où l'on en remarque de triangulaires. Mais de tirer de là des consequences generales pour toutes les autres choses & pour toutes les autres Couleurs; c'est ce que la verité

G iij

DES COVLEVES DE L'IRIS, ny la raison ne peuuent souffrir; et quand on promet de resoudre par ces principes toutes les difficultez qui se rencontrent en cette matiere, on promet seulement de monstrer que cette opinion est la plus ingenieuse, mais non pas la plus veritable; comme il arriue aux Systemes du Monde de quelques Astronomes qui tous faux qu'ils sont, rendent plus facilement raison des Phenomenes que les autres qui sont les plus certains.

Quoy qu'il en soit il y à mille experiences

qui la peuuent conuaincre de faux; et s'il est vray comme elle dit que les Saueurs & les Couleurs procedent d'vne mesme cause, il La saueur ne faut que luy opposer l'arsenic, & le laict leurne vie- des tithymales qui auec vne parfaite blan-

cheur ont vne extreme acrimonie. Car si l'acrimonie vient de la figure pointuë qu'ont les petites parties qui composent ces corps là, il faudra que leur blancheur ne procede pas de la figure ronde comme elle suppose; où bien ces petites parties seront en mesme temps rondes & angulaires. On en peut dire autant de la Noirceur puis qu'il y a quantité de choses noires qui n'ont aucune sa-

ueur comme le charbon; qu'il y en a mes-

o la Counent point d'une mesme canfe,

me qui sont douces comme la casse: Et partant si les figures triangulaires produisent leur noirceur, il faudra qu'en mesme temps elles soient rondes pour faire qu'elles soient douces où infipides : qui sont des contradictions manifestes.

Mais quand elle se voudroit restraindre à Lassgure la seule Couleur sans y faire interuenir les sa-ronden est ueurs, comment peut elle soustenir que la se de la figure ronde produise le Blanc, puis qu'il n'y a qu'vn endroit du globe qui puisse renuoyer la lumiere aux yeux & que tous les autres ne la reflechissent point. Car si les interruptions de la lumiere affoiblissent la Blancheur & la changent en d'autres couleurs, comme cette opinion enseigne; ces petits corps spheriques feront paroistre tout autre couleur que le Blanc puis qu'ils doiuent plus causer d'interruptions que de reflexions. Daillieurs comment le succre peut-il estre composé de ces parties rondes estant si rude au toucher, faisant voir tant de pointes en sa surface, & ne se rompant iamais qu'en morceaux de figure angulaire. Que s'il faut s'en. rapporter aux lunettes d'approche, qu'on examine auec elles le sablon d'Estampes qui

DES COVLEVES DE L'IRIS, est le plus menu & le plus blanc qui se puisse rencontrer, il ne s'en trouuera pas vn seul grain qui soit de figure ronde.

Lafigure triangulaire n'est pas Noirceur.

Quant aux figures triangulaires quoy qu'elles ne soient pas si propres pour faire reflecause de la chir la lumiere, si est-ce qu'on peut mettre l'œil en telle situation qu'il receura les rayons qui tomberont sur elles; et alors il faudroit qu'elles ne parussent plus noires puis que le Noir est vne priuation de lumiere: Cependant la lumiere qui tombe sur les charbons rejallit aux yeux, & sans leur ofter leur noirceur, elle la fait seulement paroistre esclatante, la veuë discernant facilement l'esclat qui leur furuient dans leur couleur naturelle. Ie dis bien dauantage l'experience est tout à fait contraire à cette proposition : car la poudre du verre & du chrystal qui est toute composée de petites parties angulaires aussi bien que le charbon, paroist toute blanche : Et puis qu'il est certain que sa blancheur vient de la reflexion de la lumiere qui se fait sur elle, il s'ensuit non seulement que les figures triangulaires ne causent pas la Noirceur ou bien il faudroit que le chrystal en poudre fust noir comme le charbon; mais encore

que toute sorte de Blancheur ne procede pas de la lumiere exterieure, où bien il faudroit que le charbon puluerisé deuint blanc comme le chrystal en poudre, puis que la figure de leurs parties est toute semblable & qu'elle doit par consequent restechir esgalement la lumiere.

Mais ie voudrois bien sçauoir ce que deuiennent ces triangles quand le noir dont se seruent les peintres a esté broyé sur le marbre ? peuuent ils conseruer leur figure apres ce trauail opiniastre qui les a moulus & froifsez en tant de façons? Et puis que dans les plantes les destours des fibres & la rencontre des nœuds sont capables comme ils disent de corrompre la figure des sucs qui les colorent, comment celle-cy peut elle resister à la violence que le marbre, le mouuement & la main du peintre luy font souffrir? Que si elle l'altere & la corrompt, il sensuit que la Noirceur doit proceder d'vn autre principe & qu'elle ne despend point d'vne cause sans laquelle elle subsiste.

Ie laisse mille autres semblables absurditez que l'on peut remarquer dans ces figures pretenduës, pour abbatre tout d'yn coup le prin-

H

cipal fondement qui soustient cette opinion, car elle ne sçauroit mettre la figure que pour vne condition qui seroit à la verité necessaire à la production des Couleurs, mais qui n'a point de vertu productiue & qui ne sçauroit non plus entrer dans leur essence. C'est sans doute le Messange de la Lumiere & de l'Obscurité qui en est la cause principale & qui en fait toutes les différences: Faisons donc voir que cela est contraire à la raison. message de & à l'experience. Je sçay bien neantmoins que c'est le commun sentiment de la Philosophie ancienne & moderne, & qu'il n'y a pas vn de tous ceux qui ont escrit de cette matiere qui ne suppose comme vne verité euidente d'elle-mesme & dont on ne peut douter, que la Lumiere se messe auec l'Obscutité & que de la naissent toutes les especes de couleurs qu'on appelle apparentes. Mais comment est il possible qu'on ne se soit pas aduisé que le non-estre ne se peut messer auec l'estre, & que quand cela se pourroit faire. il ne s'en produiroit rien de nouueau? Qui a iamais ouy dire que le son se messaft auec le silence, ny que des deux il s'en pust faire.

vn tiers qui participast de l'vn & de l'autre?

Des Covleves de l'Iris,

Que les Conleursne wiennent point du la lumiero es de l'ob-Surité.

Retournons à nostre subjet & respondons à ceux qui nous pourroient objecter, Que

gard de la lumiere.

H ij

60 DES COVLEVES DE L'IRIS, le Meslange dont est question ne se fait pas veritablement dans les objets mais seulement dans la veuë, et quoy que les tenebres ne soient rien en effect que neantmoins elles laissent dans les yeux vne certaine apparence de noirceur laquelle se peut messer auec l'esclat de la lumiere qu'ils reçoiuent & former ainsi diuerses sortes de couleurs : Qu'en effect le Bleu des Cieux & des paisages esloignez vient de l'obscurité qui couure ces objects & de la blancheur de la lumiere qui se respand dans l'air, à trauers laquelle l'œil remarque la noirceur tenebreuse & la joint auec la clarté; et que de cette vnion n'aist cette espece de couleur. Mais s'il n'y auoit. autre chose, ce bel azur qui paroist dans toute la rondeur du ciel & sur les bords de l'orison ne se presenteroit iamais à nos yeux, nous ne le verrions que sous l'apparence des ombres, c'est à dire comme vne sombre lumiere; car ce que nous appellons ombre, n'est pas tousiours vne entiere priuation comme les tenebres, ce sont de foibles rayons qui se sont escartez du droit fil des autres & qui se cachent derriere les corps illuminez. Quoy qu'il en soit si l'air qui est au deuant

CHAPITRE SECOND. 61 d'vne chose fort obscure fest illuminé, il ne representera iamais la couleur Bleuë si la chose obscure n'est fort esloignée. Ce n'est donc pas le messange de la clarté & des tenebres qui la produit, mais elle naist de la couleur du milieu qui s'vnit auec la lumiere en certaine proportion: car outre que l'air est tousiours plein de vapeurs, quelque transparent qu'il soit il a quelque peu d'opacité dans sa composition, et cette opacité aussi bien que celle de vapeurs se rend sensible dans vne grande profondeur; par ce que la couleur des parties les plus reculées se joint auec celle qui est dans les plus proches & se ramassant toutes ensemble elles font à la fin vn noir assez fort pour arrester la veuë & pour souffrir le messange de la lumiere qui doit former le Bleu celeste.

Concluons donc que l'Obscurité ne peut iamais s'unir auec la Lumiere pour produire quelque nouuelle espece de couleur: et quoy que l'œil puisse en mesme temps voir la clarté en vn endroit & l'obscurité en l'autre, il ne s'en figure point d'autre apparence que celle qui conuient à l'une & à l'autre separement; c'est à dire qu'il ne void autre chose

62 DES COVLEVES DE L'IRIS, que clarté & obscurité; et si elles sont si proches l'vne de l'autre qu'il ne les puisse pas distinguer, il les peut bien confondre ensemble, mais il ne les apperçoit que comme vne sombre lumiere, où comme vne obscurité lumineuse, sans se former aucune autre image de couleur. Si cela est ainsi toutes ces reflexions & interruptions de lumiere dont l'opinion precedente compose toutes les differences des Couleurs, ne peuuent passer que pour des principes faits à plaisir & pour de vains fondemens qui ne peuuent. soustenir la verité que nous cherchons. Mais quand les raisons que nous auons apportées ne le feroient pas voir euidemment, il seroit aisé de le reconnoistre au mauuais ordre qu'elle a esté obligée de mettre dans toutes les Couleurs & dans le faux calcul qu'elle a fait des parties dont elle les a composées. Car elle a placé le Rouge justement au milieu du Blanc & du Noir; le Iaune entre le Rouge & le Blanc, & generalement elle les à toutes mises au milieu les vnes des autres; quoy que cela ne s'accorde point auec les proportions qu'elles ont communes auec les harmonies & qui en font toutes les differen-

ces comme nous montrerons cy-apres. Outre que cet ordre destruit le partage de lumiere & de tenebres qu'elle donne à chacune: Puis que si le Iaune est au milieu du Blanc & du Rouge il ne doit pas auoir deux portions de Blanc pour vne de Noir comme elle dit, mais il faut qu'il en ait trois pour vne; tout de mesme que le Bleu pour estre au milieu du Noir & du Rouge, doit par necessité auoir trois parts de Noir & vne de Blanc, comme on peut voir dans la figure suiuante où toute l'estenduë du Blanc & du Noir est par exemple de douze degrez. Car le Rouge estant au milieu de ces deux extremitez, le Iaune pour conseruer la place qu'on luy donne entre le Rouge & le Blanc, aura neuf degrez de Blancheur & trois de Noirceur c'est à dire trois portions de Blanc pour vne de Noir, tout au contraire du Bleu. Où si l'on veut considerer ce messange par vne composition de raison comme on l'appelle; et, que le Rouge ait six degrez de Blanc & six de Noir, en adjoustant trois degrez de Blanc pour faire le Iaune, il aura neuf portions de Blanc & six de Noir qui sont comme trois à deux, qui est vne proportion sesquialtere

Où d'vne fois & demie, & non pas deux portions de Blanc & vne de Noir comme ils disent qui est vne proportion double.

	Taune					Ronge				Bleu			
Blanc	12	II	Ю	9	8	7	6	5	4	3	2	I	
Noir		I	2	3	4	5	6	17	8	9	IO	II	12

Mais c'est trop long-temps combatre contre des ombres, arrestons-nous à des choses plus solides & concluons que la lumiere exterieure n'est point la cause des couleurs sixes & naturelles. Car bien que tous ceux qui ont tenu l'opinion contraire n'ayent pas specifié ces figures que nous venons de destruire & qu'ils n'ayent parlé que des diuerses cheutes & des diuerses reflexions que la lumiere fait sur les corps opaques; neantmoins, il faut de necessité qu'ils les presupposent; autrement ils ne pourroient dire pourquoy la lumiere tombe & se reflechist sur le laict & sur le marbre blanc d'une autre façon que sur l'ancre & sur le marbre noir. Car comme elle se reflechist tousiours à angles esgaux, si elle vient à tomber sur quelque corps & qu'elle ne se reflechisse pas à la mesme hauteur qu'elle y tombe, cela ne peut

ELSI CHAPITRE II. 28 (1 65

peut venir que de la diuerse figure du plandoù se fait sa cheute, qui l'oblige pour conseruer l'égalité de ses angles de porter ses rayons aillieurs qu'elle n'eust fait si le plan eust esté esgal & vnisorme. De sorte que si l'on tient que les Couleurs naissent des diuerses restexions que sousser la lumiere, il faut necessairement que l'on presuppose diuerses sigures qui soient cause de ces reslexions; et par consequent si ces sigures ne peuvent subsisser, il n'y peut auoir de reslexions disserentes n'y de diuerses couleurs: Ainsi apres auoir destruit ces sigures nous auons ruiné tous les partis que l'on peut prendre en cette opinion.

Qu'il y a vne Lumiere interieure en tous les corps & que cette Lumiere est leur Couleur naturelle.

The market of the late of the

ARTICLE SIXIESME.

SI nous auons bien prouué que toutes les Couleurs sont des Lumieres; et que celles qui sont fixes & adherentes aux choses ne

66 DES COVLEVES DE L'IRIS. se peuvent former de la lumiere exterieure qui decoule des astres & des autres corps lumineux, il s'ensuit par necessité qu'il y a dans tous les objects visibles une Lumiere interieure & naturelle, & que cette Lumiere est la Couleur fixe & permanente que nous y remarquons, A. F. oroinnal al extend sup and

Mais quand cette consequence ne seroit pas necessaire & euidente comme elle est, il ne faudroit que considerer la conformité qu'il y a entre les corps Lumineux & ceux qui sont Colorez pour se laisser persuader à cette verité. Car toutes les proprietez & toutes les vertus qui se trouuent dans les corps lumineux & tous les effects qu'ils produisent à l'esgard de la veuë, se trouuent esgalement dans les choses colorées.

En effect toutes ces Especes visibles qui sortent des objects & qui nous les font voir, qu'est-ce autre chose qu'vne Lumiere qu'ils respandent hors d'eux comme celle qui sort du Soleil & des astres? ne sont-elles pas de la lumie comme elle representatives de la couleur & especes vi- de la figure des corps d'où elles sortent & n'en portent-elles pas le charactere entier en toute l'estendue du diaphane qui les reçoit

I. Rapport re & des sibles.

& en chacune de ses parties ? Car c'est ce qu'il ne saut pas oublier à remarquer dans la Lumiere exterieure & dans ces Especes, que leur essence est composée de deux vertus disferentes, l'vne d'illuminer qui est propre à la clarté, & l'autre de representer qui est commune à toutes les especes sensibles : Et comme c'est vn droit qui est attaché à l'esfence, d'estre toute entiere dans le tout & toute entiere dans chaque partie, il ne saut pas s'essonner si ces deux vertus qui entrent dans l'essence de la lumiere & des especes visibles les accompagnent toutes en tout l'espace où elles sont respandués & toutes en chacune de ses moindres parcelles.

Or il n'est pas malaisé de montrer que la Lumiere & les Especes visibles ont essentiellement ces deux vertus; par ce que premierement on ne doute point que la lumiere n'illumine, & que les especes ne representent les objects; de sorte que s'il y a quelque dissiculté, c'est à faire voir que la Lumiere est essentiellement representative & que les Especes illuminent. Mais l'experience nous apprend l'vn & l'autre: Car si les rayons du Soleil passent par vn trou qui soit quarré où

DES COVLEVES DE L'IRIS, triangulaire', quoy que d'abord ils se conforment à la figure qu'ils r'encontrent dans le pafsage, ils se reduisent enfin à la figure ronde pour representer celle qu'a le Soleil. Et de fait quand il est ecclipsé, où qu'il y a quelque obstacle qui empesche que tout son corps ne responde à l'ouuerture du trou, ses rayons ne prennent plus en y passant cette figure ronde, mais celle qu'il paroist auoir en cet. estat; tout de mesme qu'il arriue à la clarté de la Lune qui passe par le mesme endroit prenant la figure ronde où couppée en demy cercle selon que la Lune est pleine où en son croissant: Ce qui est vne marque euidente que la Lumiere est comme les Especes visibles essentiellement representative de la couleur & de la figure des corps d'où elle decoule, & qu'elle en porte l'image entiere en toute sa circonference & en chacune de ses parties.

Quant à la vertu d'illuminer qu'ont les Especes visibles, outre qu'elle paroist assez dans la Blancheur qui éclaire les lieux sombres, dans la flamme qui sort de l'escarlatte & qui rougit tout ce qui est contre elle, en vn mot dans toutes les Couleurs hautes & voyantes

qui communiquent leur esclat à toutes les choses qui leur sont voisines; c'est vne chose certaine que si on est en vn lieu fort obscur, on verra mieux vn object pourueu qu'il soit éclairé, que si la clarté s'estendoit iusques aux yeux; et si l'on regarde quelque chose à trauers vn long tuyau, ce que l'on en verra paroistra plus clair & plus net que ce que la veuë toute libre en peut faire voir. Or si ce que toute la Philosophie asseure est veritable, qu'il faille que tout le milieu soit illuminé pour apperceuoir les objects, il s'ensuit qu'en ces rencontres où il n'y a que les especes visibles qui passent par le milieu, ce sont elles seules aussi qui l'illuminent & qui luy donnent cette disposition qui est requise à la veuë.

Voila donc la premiere conformité qui se trouue entre la Lumiere & les Especes visibles, qu'elles illuminent toutes deux, & qu'elles sont representatives de la couleur & de la figure des corps d'où elles decoulent.

Mais il y en a vne autre qui marque encore plus precisement l'identite de leur nature, re & des est
par ce qu'elle est fondée sur vn privilege qui peces.

I iij

70 DES COVLEVRS DE L'IRIS, leur est particulier & qui ne se trouue en aucune autre chose : c'est qu'encore que tous les accidens prennent leur vnité du subjet qui les soustient & qu'ils se multiplient à mesure qu'il se multiplie; il n'en va pas ainsi de la Lumiere & des Especes visibles qui ne suiuent pas le nombre des subjects où elles sont receuës, mais celuy des principes d'où elles partent: Car autant qu'il y a de corps lumineux qui esclairent en vn endroit, autant y a-t'il de lumieres differentes qui ne se confondent point l'vne auec l'autre & qui, bien qu'elles s'vnissent ensemble pour produire vne plus grande clarté, demeurent neanmoins distinctes entre elles & se peuuent separer sans souffrir aucune diminution où alteration. Cela paroist euidemment en opposant vn corps à plusieurs chandelles posées en diuers lieux, car il fera autant d'ombres differentes qu'il y aura de chandelles; et si elles esclairent vne muraille en sorte que toutes leurs lumieres soient reunies sur elle, si on vient à y faire vn trou pour les faire passer dans vn lieu obscur, toutes ces lumieres se diuisent & chacune enuoye ses rayons separement qui respondent en droite ligne à la

CHAPITRE II. chandelle d'où ils procedent. Toute la mesme chose se fait dans les especes visibles, & hors d'elles il n'y a peut-estre aucun accident dans la nature qui ait ce priuilege.

Elles en ont encore vn autre à l'esgard des port de la qualitez sensibles; car il n'y en a pas vne qui lumiere & soit si vnie à son principe qu'elles sont au leur; elles ne s'en peuuent separer sans se perdre & ne sçauroient estre vn moment priuées de son influence qu'elles ne perissent tout à fait : ostez le corps lumineux où l'object coloré, il n'y à plus de clarté n'y d'especes visibles dans le milieu où elles estoient. auparauant respanduës. Mais il n'en va pas ainsi des autres qualitez sensibles; car le son subsiste quelque temps apres le coup qui l'a causé, l'espece de l'odeur séjourne dans l'air quoy que l'on oste le corps odorant, & la chaleur se conserue apres que le feu est esteint. La lumiere & les Images ont donc cela de commun entre elles & de particulier à l'efgard des autres especes sensibles, qu'elles sont incessamment vniës à leur principe & qu'elles ne subsistent que par l'irradiation & l'influence continuelle qu'il leur depart.

72 DES COVLEVES DE L'IRIS.

Autres Rap ports de la desespeces.

Enfin ces Images demandent la mesme. lumiere & disposition dans le milieu par où elles passent qui fait la Lumiere; Elles le trauersent comme elle en vn moment & en droictes lignes; et si elles rencontrent vn corps opaque elles s'y reflechissent comme elle à angles esgaux; leur refraction se fait comme la sienne en s'approchant de la ligne perpendiculaire. quand elles passent d'vn milieu rare en vn plus espais, où s'en essoignant quand c'est d'vn plus espais en vn plus rare. Que diray-je dauantage? Elles prennent les mesmes Couleurs dont la lumiere se teint dans ses verres pleins d'eau & dans les triangles de chrystal. Et apres vne si iuste & si exacte ressemblance, pourra-t'on douter que ces Especes ne soient pas des Lumieres qui decoulent des objects; et que les Couleurs fixes ne soient pas aussi des lumieres interieures qui respandent ces especes comme autant de rayons & qui doiuent estre à tous les corps ce que la Lumiere est aux astres & aux autres corps lumineux ?

Certainement puis que toutes les autres La lumiere qualitez

qualitez sensibles se partagent inesgalement & qu'apres les premiers subjects qui les pos-mentpartasedent toutes entieres, il y en a d'autres qui gée. n'en ont que des portions; pourquoy n'en. fera-t'il pas ainsi de la Lumiere ? pourquoy ne se trouuera-t'elle pas en quelque corps aucc toute l'estenduë de ses degrez & de sa vertu, & en d'autres auec diminution & affoiblissement? tout de mesme qu'il y en a qui ont la chaleur au supreme degré & d'autres qui ne l'ont naturellement qu'au sixiesme où à vne autre semblable mesure. Il est donc de l'ordre de la nature que comme la Lumiere est dans les astres & dans les autres corps lumineux en toute sa plenitude, elle se trouue aux autres diuersement partagée & affoiblie; et par ce qu'il n'y a rien qui ait tant de rapport auec elle que les Couleurs, il n'y ait rien aufsi que les Couleurs où ce different partage se rencontre. De sorte que le Rouge & le verd qui sont fixes & adherens aux corps, sont des Lumieres qui leur sont autant interieures que la clarté l'est au Soleil & aux estoiles: et comme on peut dire de ces especes de couleurs, quand elles paroissent dans l'Iris, que ce sont de certaines portions de la

Lumiere exterieure qui s'est diminuée iusques à telle & telle mesure par les diuerses refractions & reslexions qu'elle a soussertes; aussi quand elles sont Fixes & permanentes on doit croire que ce sont des Lumieres interieures que les corps ont dans les mesmes degrez qui se trouuent en celles-là; la nature & la disposition de ces subjects là n'estant pas capables d'en auoir dauantage & saisant le mesme essect que le mouuement des rayons cause dans les Apparentes.

La Lumiere interieure & exterieure font de mefme espece. La difficulté qui pourroit naistre icy, seroit que puis que les Couleurs fixes & les apparentes sont de mesme espece comme nous
auons monstré, & que celles-là sont des Lumieres interieures & celle-cy des Lumieres
exterieures, il faudroit aussi que la Lumiere
Interieure & l'Exterieure fussent de mesme
espece, quoy que ce soit vne chose assez douteuse & qui n'est pas encore bien decidée
dans les Escholes. Mais pourquoy voudroiton douter d'vne verité si claire & que l'onne peut contester sans combattre la raison &
le sens; car il est constant que la Lumiere
Exterieure est l'effect de la Lumiere Interieu-

re; et puis que l'effect est tousiours semblable à sa cause s'il n'y a quelque empeschement, il faut que la Lumiere qui est la plus active de toutes les choses sensibles & qui n'a rien qui luy soit contraire, produise son effect parfaitement semblable a elle-mesme. Quoy! si la chaleur qui est bien moins noble & moins agissante qu'elle, en produit vne autre qui n'est pas de differente espece? si la vertu magnetique qui est dans l'aymant & celle qu'il communique au fer sont vne mesme chose: pourquoy la Lumiere qui est dans le corps lumineux sera-t'elle d'vne autre nature que celle qu'il jette dans l'air? Mais il ne faut point en cecy d'autres juges que les yeux qui ne reconnoissent aucune difference entre la clarté du Soleil & celle des planettes quant à la nature de la lumiere: Car puis qu'il est constant que la lumiere des planettes n'est autre que celle que le Soleil leur communique, comme tous les Astronomes en sont d'accord, c'est vne consequence necessaire qu'au jugement des yeux la lumiere qui est interieure au Soleil est de mesme nature que celle qui respand hors de soy. Et il n'importe que la clarté du Soleil soit trop grande en

DES COVLEVES DE L'IRIS, comparaison de celle des planettes pour en tirer cette consequence; car outre que cela. ne fait point diuersité d'espece, il y a des planettes qui sont à proportion aussi grandes au respect de quelques estoilles fixes : Quoy qu'il soit certain que la Lumiere de ces estoilles leur est essentielle & que celle des planettes n'est qu'estrangere; qui sont des differences purement accidentelles comme toute la Philosophie enseigne. Il faut donc conclure, que la Lumiere Interieure & Exterieure sont de mesme espece, tout de mesme que les Couleurs fixes & les apparentes le sont entre-elles. This and the first

Pourquoy les Couleurs pointdurant la nuict.

Mais si les Couleurs Fixes sont des Lumienese voyent res qui ne dependent point des autres corps lumineux, pourquoy ne se peuuent-elles voir d'elles-mesmes sans l'ayde de la Lumiere exterieure? pourquoy sont elles inuisibles durant la nuict? et pourquoy faut il qu'elles soient esclairées pour se presenter à nos yeux? Et ce qui augmente la difficulté, c'est que l'obscurité & les tenebres sont des priuations qui n'ont point d'action & qui ne donnent aucun empeschement à la lumiere pour

Petite qu'elle soit, non plus que le silence n'empesche point que le moindre bruit ne se puisse entendre; de sorte que si les Couleurs sont des Lumieres, il n'y a point de raison pourquoy elles ne se puissent voir durant la nuict quelques affoiblies qu'elles puissent estre. Tout au contraire puis qu'vne grande lumiere absorbe & engloutist celle qui est foible, il faudroit que les Couleurs ne parussent point au grand jour, si ce sont des lumieres affoiblies & diminuées.

Pour resoudre ces grandes disticultez, il faut premierement se resouuenir qu'il y a deux choses a considerer dans toute sorte de Lumieres Interieures; a sçauoir leur reelle Existence dans les corps & l'Essusion de leur image dans le milieu: la premiere est la cause principale & originelle de ce qu'elles sont visibles; la seconde n'est qu'vne condition pour les rendre visibles. Car si la veuë se fai-soit par vne application immediate du sens à l'object comme le goust & le toucher, la Lumiere se feroit voir par elle-mesme sans qu'il fust besoin qu'elle respandist son image dans le milieu, ayant en soy le principe & la

K iij

fource de la visibilité s'il est permis de parler ainsi. Or par ce que cette Essusion d'images est vne action qui est proportionnée à la force qui se trouue en sa cause, elle est grande où petite où manque tout a fait, selon que la lumiere interieure est plus forte ou plus soible; et celle-cy comme toutes les autres qualitez sensibles est plus forte où plus foible, selon qu'elle a plus où moins de degrez, où selon qu'elle est plus où moins reünie & ramassée.

Cela presupposé, il n'y a point de doute que les Couleurs qui ont toutes de tres-petites portions de Lumiere, laquelle mesme est esparse & des-vnie par le messange des corps qui luy sont ennemys comme nous montrerons; il n'y a pas dis-je lieu de douter que ce ne soient des causes tres-soibles pour agir & qu'il saut necessairement dans la soiblesse où elles sont qu'elles soient sans essect, où si elles en ont quelqu'vn, il soit imperceptible. En vn mot si on en excepte la blancheur qui se fait voir quelque peu dans les Tenebres, il n'y en a pas vne qui produise son imagessans le secours de la Lumiere exterieure, où si elle la produit, elle n'est pas assez sorte pour

toucher le sens. Car il n'est pas peut-estre. impossible que durant la nuict il n'y ait dans l'air quelques-vnes de ces Images, puis qu'il y en a le jour qui sont respanduës iusques sur nos yeux sans nous en faire voir les objects; et que durant la nuict la clarté de quelques estoilles, quoy qu'elle vienne jusques à nous n'est pas visible si on ne la reiinit par le moyen des lunettes d'approche. Apres tout les animaux qui voyent de nuict fortifient merueilleusement cette conjecture, car bien qu'il y ait beaucoup de lumiere dans leurs yeux, elle ne semble pas neantmoins assez forte pour se porter esficacement sur toutes les choses qu'ils voyent dans l'obscurité & pour en tirer les Images toutes seule; mais il faut qu'elles soient respanduës dans l'air & qu'elles soient fortifiées par cette lumiere qui leur est interieure.

Quoy qu'il en soit la verité que nous venons d'establir se peut confirmer par l'exemple des autres qualitez sensibles, qui se trouuent si foibles qu'elles ne se peuuent faire sentir si elles ne sont fortifiées & excitées par quelque cause externe; ne voyons nous pas que la chaleur naturelle, qui quelquefois està

So Des Covieres De l'Iris, demy - esteinte & qui alors n'a aucun mouuement ny aucune action, se r'allume par la chaleur du feu où d'vn autre corps estranger & reprend ainsi ses fonctions acconstumées. Il en est de mesme de la Lumiere des Couleurs, elle y est en si petite quantité qu'elle n'a pas la force de luire toute seule, Elle y est comme esteinte, & si celle des astres ne la vient r'allumer elle ne produit point ces flammes qui selon la pensée de Platon decoulent des corps & qui les rendent visibles. Comme elles sont dont toutes deux de mesme nature, il ne faut pas s'estonner si celle du Soleil s'vnissant auec elle. l'augmente, la fortifie & la met en estat d'agir: Et l'on peut dire qu'elle fait sur toutes les Couleurs le mesme effect que nous remarquons quand elle passe au trauers des vitres colorées; car comme elle se charge de la teinture qu'elles ont & la jette sur les murailles voisines; aussi venant à tomber sur les Couleurs qui sont dans les corps opaques, en se reflechissant elle les emporte auec soy dans l'air & les y respand plus ou moins selon la force de ses rayons où selon la quantité de lumiere dont elles sont pourueuës:

car c'est vne chose certaine que les viues & esclatantes qui en ont dauantage, estendent plus loing leurs especes que les brunes & les ternies.

Mais ie dis bien dauantage, comme ces Images ne sortent pas de la simple & derniere surface qui enuironne les corps, & qu'vne partie vient de la profondeur qui se trouue soubs elle; puis qu'il n'y a point de corps si opaque qui n'ait vn peu de transparence comme dit Aristote, & que c'est la raison pour laquelle on met diuerses couches d'vne mesme couleur pour la rendre plus forte: Il y a grande apparence que tout de mesme que la chaleur ouure les pores des corps odorans & donne passage à l'odeur qui y est enfermée; La lumiere aussi penetre les corps & donne issué à ces Images qui sont retenuës soubs la masse de leurs parties & qui n'ont pas la force de les percer; comme il arriue à la lumiere mesme des astres qui est souuent arrestée par l'espaisseur de l'air & des nuages.

Concluons donc que les Couleurs ne se voyent point durant la nuict par cé qu'elles ont vne lumiere si foible qu'elle n'a pas le

DES COVLEVES DE L'IRIS, pouuoir de produire ny de respandre dans l'air l'image qui est necessaire pour les rendre visibles; et que ce defaut ne vient point des tenebres & de l'obscurité qui les ternisse & les efface, mais de leur propre foiblesse qui les empesche d'agir.

Pourquoy lesCouleurs vour.

Il faut maintenant examiner pourquoy else voyent de les se voyent durant le jour, nonobstant que ce soient des Lumieres affoiblies, qui deuroient estre absorbées comme celle des estoilles par la clarté du Soleil: Car il ne faut pas s'arrester à la consequence que l'on tire que par cette raison ces Couleurs ne peuuent pas estre des Lumieres puis que tout le monde est d'accord que les Couleurs apparentes ne sont autre chose que des Lumieres modifiées & affoibliës, lesquelles neantmoins se font voir au grand iour & en la presence d'vne plus grande Lumiere : de sorte qu'il faut supposer cette verité comme indubitable & confirmée par l'experience & en chercher seulement la cause.

> On pourroit donc dire en vn mot que la Lumiere du Soleil & celle des Couleurs sont de differente espece, et que les grandes Lu-

mieres n'offusquent les petites que lors qu'elles sont de mesme espece, telles que sont sans doute celles du Soleil & des astres. Mais cela ne leue pas tout à fait la difficulté, par ce que si les Couleurs ne sont que des Lumieres affoibliës, elles ne different de celle des corps lumineux qui par le plus & le moins de Lumiere qu'elles ont : or cela ne cause point de differences essentielles ny par consequent de diuerses Especes.

De dire aussi que cette diuersité vienne de Lalumiere l'Opacité qui se messe auec la Lumiere, & que ne se messe la Couleur soit vne Lumiere opaque comme l'Opacité. c'est le sentiment le plus commun de la Philosophie: Il y a mille raisons qui rendent cette opinion suspecte. Premierement où l'Opacité est quelque chose de visible ou non: si elle n'est pas visible, elle ne peut alterer ce qui est visible; et quoy qu'elle fust tenebreuse, les tenebres ne se peuuent messer auec la Lumiere n'y l'affoiblir en aucune sorte comme nous auons montré. Que si elle est visible, il faut qu'elle ait quelque portion de Lumiere, & en ce cas le mesme inconuenient que nous venons de marquer se ren-

DES COVLEVES DE L'IRIS, contrera; car elle ne sera differente de la Lumiere des corps lumineux que par le plus & le moins, & en quelque façon qu'elles se messent l'vne auec l'autre, elles ne produiront iamais rien de differente espece.

En second lieu il n'y a aucune opacité dans les Couleurs apparentes, puis qu'elles se font de la Lumiere qui s'est veritablement affoiblie, mais qui demeure toute pure sans se charger d'aucune chose estrangere: Et il ne sert rien. de dire qu'en passant au trauers d'vn milieu plus dense & plus espais elle s'infecte & se charge de l'opacité quelle y rencontre & forme par ce meslange toutes les Couleurs que nous voyons dans les Iris. Car outre que la densité n'est pas tousiours accompagnée de l'opacité & qu'il y a des corps denses qui ne sont point opaques; il est certain que la Lumiere qui trauerse ces corps là à plomb & en ligne perpendiculaire ne se charge point de leurs qualitez & ne se change en aucune couleur; bien qu'elle le deust plustost faire que quand elle les trauerse obliquement comme estant alors plus forte; tout de mesme qu'en passant au trauers des vitres colorées elle emporte auec soy dauantage de la

couleur qu'elle y trouue, que lors qu'elle est

plus foible.

Daillieurs les triangles qui sont faits d'vnoverre plus obscur & plus opaque ne forment point d'autres especes de couleurs que ceux qui sont faits d'vn chrystal le plus pur & le plus transparent qui se puisse trouuer; ce n'est donc pas le messange de l'Opacité auec la Lumiere qui produit les Couleurs puis qu'il y a diuers degrez d'Opacité dans ces triangles sans qu'il se face aucun changement dans l'espece des Couleurs.

Enfin les Images de tous les objects qui font dans l'eau ne se laissent point infecter de l'Opacité qu'elle a; et quoy qu'elles la tra-uersent à plomb où de biais, elles ne prennent aucune couleur comme elles sont en passant par les triangles qui souuent sont moins opaques qu'elle. Ioint que si elles la tra-uersent en sortant d'vn milieu plus rare, elles prennent les Couleurs de l'Iris, bien que son opacité soit la mesme & qu'il n'y ait point de raison pourquoy elle les doiue alterer plustost en ce dernier passage qu'elle a fait au premier.

Que s'il faut descendre iusques aux Cou-

86 DES COVLEVES DE L'IRIS,

leurs fixes qui sont attachées à la matiere & comme enseuelies dans la masse des choses corporelles; quels doutes ne donneront-elles pas de la verité de ce meslange? n'y a-t'il pas des corps qui ont vne mesme opacité où l'on voit des Couleurs toutes contraires comme les marbres? ne s'en trouue-t'il pas qui en ont moins, comme les pierres precieuses qui sont transparentes, lesquelles ont les mesines Couleurs que celles qui sont tout à fait opaques? au contraire ne s'en voit-il pas qui ont dauantage d'opacité comme les metaux, dont les Couleurs sont plus hautes & plus claires? car il n'y à gueres de choses si denses ny si opaques que l'or & le vif-argent, qui pourtant ont des teintures qui ne sont point proportionnées à la mesure de ces qualitez-là.

Pour sortir de cet embaras & sans mettre en question si la Lumiere & les Couleurs sont de differente espece, & si le plus & le moins peuvent causer cette diversité; il y a deux choses qui peuvent resoudre la difficulté proposée. La premiere que les Couleurs estant des Lumieres qui à cause de leur foiblesse ne se peuvent voir que dans vne petite distance,

il n'y a point de si grande clarté qui puisse empescher l'œil de les discerner; et si les estoilles estoient proches de nous quoy qu'elles sussent aussi petites qu'elles nous paroissent, elles se laisseroient voir comme elles en plein iour de la mesme façon qu'on y void la slamme des chandelles quand elles ne sont pas fort essoignées. A quoy il faut adjouster que la figure & les autres accidens sensibles qui accompagnent les Couleurs aydent beaucoup au discernement que le sens en fait.

La deuxiesme & qui est la plus considerable, est que quand il n'y auroit aucune diuersité d'espece entre la Lumiere & les Couleurs considerées en elles-mesmes, il s'y en trouue neantmoins en quelque façon à l'esgard du sens qui est diuersement touché & csmeu par elles. Car comme vne tres-violente chaleur n'est pas de differente espece auec celle qui est moderée, si on les considere en elles-mesmes & comme qualitez qui sont d'vn mesme ordre; et neantmoins par ce qu'elles alterent diuersement l'animal & qu'elles y forment la maladie & la santé qui sont des accidens de diuerse & contraire nature, c'est auec raison qu'on les met toutes deux soubs

DES COVLEVES DE L'IRIS, 88 deux differentes especes: Aussi les Couleurs ne sont pas peut-estre de différente espece les vnes auec les autres, ny mesme auec la clarté du Soleil si on ne regarde que le differend partage de Lumiere qui s'y trouue; mais parce que ce partage fait diuerses Impressions dans l'ame, on peut dire qu'en cet esgard elles sont de differente espece, où du moins que cela suffit pour faire que le sens les distingue les vnes des autres. Or la principale & la plus considerable Impression qui se fasse en ces rencontres vient de la proportion où difproportion que ces objets ont auec le sens; par ce qu'alors ils luy paroissent agreables ou des-agreables. Et cela fait vne difference si notable entre eux, que le sens ne sçauroit manquer à la reconnoistre quand bien dail-

lieurs ils seroient de mesme espece, où quand leur nature mesme seroit tout à fait inconnuë. En essect nous ne discernons presque les odeurs que par ces deux disserentes conditions, & sans en connoistre les veritables especes nous sommes reduits à celles qui se tirent de l'agreement où de l'auersson qu'elles causent dans l'ame, n'en ayant point d'autre exacte connoissance sinon que les

vnes

vnes sont suaues & agreables & les autres mauuaises & fascheuses; toutes les autres differences estant prises des subjects où elles se trouuent lesquelles ne sont point essentielles à l'Odeur. Et peut-estre que la mesme chose arriue dans tous les autres objects sensibles; car le Son qui nous est le plus connu de tous comme nous montrerons cy-apres, ne nous donne presque point d'autres differences que celles qui font les harmonies & les discordances, c'està dire qui sont proportionnées où disproportionnées au sens; en vn mot qui sont agreables ou des-agreables. Mais cela. paroistra plus exactement dans l'Article où nous chercherons la mesure & la quantité de Lumiere qui entre dans toutes les Couleurs.

D'où vient le différent partage de Lumiere qui fe trouve dans toutes les Couleurs.

ARTICLE SEPTIESME.

A Vant que d'entrer en vne recherche si profonde & si difficile, il est bon de

principales conclusions que nous auons tirées des raisonnemens precedens, asin de voir le chemin que nous auons fait & prendre nos mesures pour celuy que nous auons encore à faire.

Nous auons donc montré que les Couleurs Apparentes sont des Lumieres Exterieures qui decoulent du Soleil & des autres corps lumineux: Que celles qui sont Fixes sont aussi des Lumieres, mais des Lumieres Interieures qui ne dependent point de ces corps-là & qui neantmoins produisent comme eux de secondes clartez qui sont leurs Images & que nous appellons Especes visibles: Qu'enfin la Lumiere Exterieure estant de mesme nature. que celle qui est Interieure, il faut par necessité que les Couleurs Fixes & les Apparentes qui se formeut de ces deux sortes de Lumiere, soient aussi de mesme nature. Et c'est là le progrez que nons auons fait iusques icy: Taschons maintenant de passer plus outre.

S'il est donc vray que les Couleurs Fixes & les Apparentes sont de mesme nature, il faut qu'il y ait vn mesme principe qui en fas-se toutes les differences & qu'elles ayent quel-

que chose de commun d'où chacune de leurs especes tire son origine; de sorte que si le verd de l'Iris consiste dans tel partage & telle modification de Lumiere, il faut que le mesme partage & la mesme modification de Lumiere se trouue dans le verd des esmeraudes & des autres choses qui ont cette couleur; puis que ces deux sortes de verd sont de mesme espece & de mesme nature comme nous auons montré.

Mais auant que de determiner quel est le partage & la modification qui fait chaque espece de couleur, il faut chercher les causes qui peuuent modifier la Lumiere & voir s'il y en a qui soient communes aux Couleurs Fixes & aux Apparentes, ou s'il n'y en a que de propres & de particulieres à chacune d'elles.

A ce dessein ie presuppose comme vne verité qui n'a besoin d'aucune preuue & qui est euidente au sens. Que si les Couleurs sont des Lumieres, ce sont des Lumieres affoiblies & diminuées; par ce que les yeux nous apprennent qu'elles ne sont pas si fortes que celle qui paroist dans les corps lumineux, puis

qu'elles n'illuminent pas si parfaitement que

92 DES COVLEVRS DE L'IRIS, celle-cy & qu'elles ne peuvent estre apperceues sans son secours.

Il faut neantmoins remarquer que toute sorte d'affoiblissement dans la Lumiere ne produit pas les Couleurs. Car celle qui est petite ou fort esloignée, esclaire moins qu'vne plus grande ou vne plus proche; mais elle ne forme aucune diuersité de couleurs par cette diminution: Au contraire celle qui trauerse les triangles ou les verres pleins d'eau, est souuent plus esclatante & esclaire dauantage qu'vne autre qui sera toute pure; et neantmoins elle se colore & non pas celle-cy. De sorte qu'il faut croire que comme la Lumiere ne peut passer en couleur que sa nature ne soit. en quelque façon alterée, l'affoiblissement qui cause cette alteration doit estre interieur & aller iusques à la vertu essentielle de la lumiere; et que tous les autres ne sont qu'exterieurs, estrangers & accidentels comme dit l'Eschole. Nous deuons donc parler du premier, chercher en quoy il consiste & quelles en peuuent estre les causes.

l'adjouste encore à cet aduis qu'il ne faut pas confondre les mots d'obscurité, d'opacité, de densité & de dureté comme quelques-vns

CHAPITRE SECOND. ont fait. Car il y a des choses obscures qui ne sont pas opaques, comme l'air durant la nuict; il y en a aussi qui sont opaques sans estre denses, comme les vapeurs; et de denses qui ne sont ny obscures ny opaques, comme le chrystal, ny dures comme le vif-argent. Aussi sont - ce des qualitez qui sont toutes de differente nature: car l'Obscurité n'est autre chose qu'vne priuation de clarté; l'Opacité empesche le passage de la lumiere; La Densité a beaucoup de matiere en peu d'espace; & la Dureté resiste au toucher, mais elles ne sont pas opposées les vnes aux autres, puis qu'il se trouue des choses qui sont obscures, opaques, denses & dures tout ensemble: Chacune en particulier a son contraire qui n'est point au nombre de toutes ces qualitez, car l'Obscurité est opposée à la clarté, l'Opacité à la transparence, la Densité à la rareté, & la Dureté à la mollesse.

Il faut encore remarquer qu'on se sert souuent du mot, Espais, pour celuy de Dense, quoy qu'il ait d'autres significations; car il se prend aussi pour Prosond, comme quand on dit que telle chose à deux doigts ou deux pieds d'espais; Quelquesois il signisse la mes94 DES COVLEVRS DE L'IRIS, me chose que Crasse ou Grossier & est opposé au Subtil: quoy qu'il en soit, nous nous seruirons ordinairement des deux premieres significations.

Apres cela qui voudra considerer toutes les causes qui peuuent affoiblir la lumiere, n'en trouuera point qui soient communes aux Couleurs fixes & aux apparentes que l'Obscurité & l'Opacité; par ce que tous les corps qui alterent la lumiere dans les Couleurs apparentes semblent auoir des parties obscures & opaques comme ceux ausquels les Couleurs sont naturelles. Aussi y a-t'il eu de tout temps deux partis dans l'eschole pour ce subject, les vns voulant que l'Obscurité se messe auec la Lumiere; les autres que c'est l'Opacité; et que par l'vn ou l'autre de ces deux messages la Lumiere se tempere & s'affoiblist & cause toute la varieté des Couleurs.

Mais comme nous auons cy-deuant deftruit ces deux opinions, ayant montré nonfeulement que la Lumiere ne se messe iamais auec l'Obscurité ny auec l'Opacité, & que quand mesme cela se pourroit faire, il ne s'en produiroit aucune espece de couleur; mais encore que l'Opacité ne se trouue pas tousjours dans la naissance des Couleurs Apparentes, & que par consequent ce ne peut estre vne cause commune à ces deux genres de couleurs. Il faut se reduire à chercher celles qui sont propres & particulieres à chacune d'elles. Commençons donc par les Apparentes qui semblent en ce point estre plus faciles à connoistre que les fixes.

Quelles sont les causes qui affoiblissent la Lumiere dans les Couleurs Apparentes.

ARTICLE HVICTIESME.

Toutes les causes qui peuuent affoiblir la Lumiere dans les Couleurs Apparentes se peuuent reduire à deux en general, l'vne qui se trouue dans la lumiere mesme, & l'autre qui se trouue dans les corps qui la reçoiuent. La premiere consiste dans le mouuement des rayons, qui au lieu d'aller en droite ligne iusques ou leur vertu se peut estendre, se replient à la rencontre d'vn corps qui les arreste, ou le trauersent en biaisant s'il

96 DES COVLEVES DE L'IRIS,

leur donne passage. Le premier de ces mouuemens s'appelle Reflexion ou repercussion, qui se fait sur les corps opaques lesquels renuoyent les rayons vers le lieu d'où ils partent; l'autre se nomme Refraction & se fait quand la lumiere passe par deux diuers diaphanes dont I'vn est plus rare ou plus dense que l'autre: car au lieu de les trauerser de droit fil, elle se detourne vn peu & fait vn angle qui luy fait perdre la rectitude qu'elle eust gardée sans cet obstacle. Or on ne peut douter que la Lumiere ne s'affoiblisse par ces deux mouuemens, puis que les raions reflechis&rompus sont plus foibles que les droits, comme l'Optique enseigne; et que nous experimentons que toutes les choses que representent les miroirs & celles que nous voyons à trauers l'eau, le verre & autres corps de semblable nature, nous paroissent moins nettes & plus obscures qu'elles ne sont en effect; et que souuent les rayons se changent par ce moyen en couleur laquelle indubitablement est vne lumiere affoiblie.

L'autre cause qui se trouue dans les corps qui reçoiuent la lumiere consiste dans les qualitez litez qu'ils ont & qui la peuuent alterer, comme l'Opacité, la Densité & la Figure; par ce qu'outre qu'elles causent la restexion & la restraction de ses rayons; elles sont capables de luy imprimer quelque chose de leur nature grossiere & materielle & de la rendre par consequent moins pure & moins esclatante: c'est pourquoy tous les objects que l'on void en l'eau parroissent plus grands & plus obscurs qu'ils ne sont en l'air.

Or comme la lumiere ne passe pas en couleur pour toute sorte d'affoiblissement qui luy arriue, il faut examiner lesquelles de toutes ces causes ont le pouvoir de la diminuer iusques à la mesure que la couleur deman-

de.

Premierement on pourroit croire auec quelques-vns que les Couleurs du triangle de chrystal ne procedent que de la diuerse Opacité que la figure triangulaire donne à ses parties: Car celles qui font les angles estant moins espaisses, sont aussi moins opaques & la lumiere passant à trauers se change en Jaune & en Rouge, qui sont les Couleurs les plus hautes de toutes; au contraire celles qui sont vers la base du triangle, comme elles sont

plus espaisses elles ont aussi plus d'opacité & forment le Bleu & le Violet qui sont les couleurs les plus brunes; comme celles du milieu produisent le Verd qui est aussi la couleur qui tient le milieu entre les autres. Ioint que c'est le sentiment commun de la Philosophie, que selon que les vapeurs & les nuës sont plus ou moins opaques, elles representent ces diuerses apparences de Blanc de Iaune de Rouge & de Bleu que l'on remarque souuent au leuer & au coucher du Soleil.

D'vn autre costé, il se trouue des corps transparens qui ne sont point opaques, lesquels neantmoins changent la lumiere en couleur: Car vn triangle de chrystal le plus pur & le plus net qu'on puisse trouuer, sera paroistre les mesmes Couleurs que s'il estoit d'vn verre plus obscur; et on ne peut rapporter cet essect qu'à la Densité qu'il a laquelle est cause de la refraction que les rayons sous fousfrent à sa rencontre. Aussi voyons nous que quand la lumiere passe d'vn milieu rare en vn plus espais, elle se rompt & prend ainsi les Couleurs de l'Iris.

La Figure fait aussi toute seule la mesme chose. Car si vn corps dense & transparent

n'est gueres espais & qu'il soit vniforme en toutes ses parties, comme seroit par exemple vne table de chrystal bien vnie qui n'auroit. pas plus d'vn doigt depaisseur; il ne s'y fait. aucune refraction ny aucun changement senfible dans l'espece de la lumiere: Mais si ses parties sont disposées de telle sorte que les vnes soient tenves, les autres espaisses, oubien qu'elles soient bossuës, creuses ou triangulaires, elles font tousiours vne refraction. manifeste & souuent elles colorent la lumiere: car vn triangle de verre quelque petit. qu'il soit fait paroistre les Couleurs de l'Iris. De sorte qu'en ces rencontres la Figure est plustost cause de cette alteration que la densité où l'opacité du diaphane.

Quant à la Reflexion, ça esté l'opinion. d'Aristote qu'elle estoit cause des Couleurs de l'Arcanciel: Et quoy que l'optique en ait sait voir la fausseté par quantité de raisons & d'experiences que l'on ne peut contester; si est-ce qu'il y a cent autres rencontres où la Reslexion toute seule change la lumiere en couleur: Car si on regarde le Soleil à trauers des arbres, principalement quand il est pro-

che de l'orison, tous ses rayons paroissent teints de rouge de verd & de pourpre, et on les void sortir d'entre les branches & se repandre en forme de pyramide toute peinte de couleurs de l'Iris.

Or on ne peut rapporter ce changement qu'à la seule reslexion que souffrent les rayons en passant à trauers tous ces corps. Car il est inutile de dire qu'ils se rompent en trauersant les vapeurs qui sont alors dans l'air, puis qu'ils ne paroissent point colorez aillieurs quelques vapeurs qu'il y ait : Et que la mesme chose leur arriue quand ils passent au trauers des plumes & de plusieurs petits poils: Car si on les regarde de prés, les vns paroissent rouges, les autres verds & les autres violets; le Soleil mesme donnant sur yn seul fil d'araignée le peint de toutes ces Couleurs; Et ce qui est de plus estrange il les fait paroistre sur la baue que le limaçon laisse sur ses traces. Or il n'y a point de cause de tous ces effects qui nous soit connuë que la Reslexion.

Et il semble qu'on n'en puisse douter, si on considere que la lumiere tombant sur des vases destain bien polis, sur les nacres de perle, sur les rayes que l'on fait sur l'argent & sur les bouteilles qui se font auec l'eau sauonnée, produit la mesme varieté de couleurs; car il semble qu'on ne puisse rapporter cet esfect qu'à la reslexion qu'elle souffre sur ces corps-là.

Enfin il y a mille experiences qui nous apprennent que la Refraction est la cause la plus ordinaire des Couleurs apparentes; et que toutes les qualitez des corps transparens comme l'opacité, la denfité, la figure ne seruiroyent de rien à leur production si elle ne s'y rencontroit. C'est par elle que les verres plein d'eau & les triangles nous font paroistre les Couleurs de l'Iris sur tous les objects; c'est par elle que les diamans & les gouttes de rosée jettent ces beaux feux qui esclatent aux yeux; c'est enfin par elle que se font les couronnes alentour des astres, l'Arcanciel dans les nuës & tous ces autres Meteores qui sont remarquables par la varieté de leurs couleurs: du moins est-ce l'opinion que tous les sçauans suiuent maintenant en cette matiere.

On pourroit donc conclure de toutes ces observations, qu'il n'y a pas vne de toutes les causes que nous auons proposées qui ne soit.

N-iij

capable de diminuer la lumiere iusques à la mesure que la couleur demande.

Mais il y a bien des considerations à faire auant que de pouuoir decider vne chose si difficile. En premier lieu ce que l'ona dit des Couleurs du triangle, qu'elles se diversifient selon que la lumiere passe au trauers des parties plus où moins opaques, n'est point veritable. Car outre que l'on confond l'Opacité auec la Densité, les triangles faits d'un chrystal bien. pur & bien net, n'ayant pas leur transparence differente de celle de l'air par l'Opacité, mais par la seule densité; Il est certain que la lumiere trauerse souuent toute la profondeur du triangle sans se teindre en couleur; et quelque grande qu'en soit l'espaisseur, elle ne change point l'espece des Couleurs qu'vn plus petit & moins espais fait paroistre : de sorte que si dans vn grand triangle les rayons qui passent par la partie qui est espaisse d'un doigt produisent le Rouge, dans vn plus petit ils feront naistre le Bleu dans sa base qui sera de la mesme espaisseur: et par consequent ce n'est n'y l'Espaisseur ny l'Opacité qui sont cause de la diuersité des Couleurs; puis que vne mesme Espaisseur & vne mesme Opacité en produisent deux differentes especes & qu'au contraire, la mesme couleur se trouue auec l'vne & l'autre en quelque degré quelles puissent estre.

Mais sans insister dauantage sur l'Opacité que nous auons excluse cy-deuant de tout le mesnage des Couleurs, qui voudra considerer la Densité toute seule, verra que d'elle-mesme elle ne sert encore de rien à leur production. Car sans parler des rayons perpendiculaires qui passent au trauers de quelque corps dense que ce soit sans s'alterer; on en void qui le penetrent obliquement lesquels se reflechissent auec toute la pureté de lumiere qu'ils peuuent auoir, comme lors qu'on void l'image du Soleil dans vne riuiere. Et il ne faut pas dire que la Refraction se doit joindre auec elle pour former les Couleurs: car si on jette dans l'eau quelque chose de Blanc, & mesme qu'on y fasse descendre vne chandelle allumée, ce que l'on peut faire dans l'eau de vie, elles paroissent de la mesme couleur qu'elles ont dans l'air, quelque refraction que leurs Images y puissent souffrir. Enfin si la Densité contribuoit quelque chose à la forme des Couleurs, il faudroit qu'elle en changeast les especes selon qu'elle seroit plus grande ou plus petite; cependant la lumiere qui passe à trauers l'eau qui est moins dense que le chrystal & le diamant, produit les mesmes especes qu'elle fait en les trauersant.

Apres tout si l'on veut prendre garde à ce que l'Opacité la Densité & la Figure font pour les Couleurs, on trouuera qu'elles n'y contribuent rien si ce n'est par la reslexion ou par la refraction qu'elles causent: Et comme ce sont des qualitez steriles qui ne produisent iamais rien, elles ne concourent à ces deux actions que passiuement, c'est à dire que ce ne font pas elles qui reflechissent & qui rompent les rayons, mais c'est la Lumiere mesme qui se reflechist & se rompt à la rencontre des corps qui ont ces qualitez-là. De sorte que ce ne sont que des conditions ou des causes fort esloignées de la production des Couleurs où il ne faut pas s'arrester; et s'il y en a qui soient considerables c'est la Reslexion & la Refraction.

Aussi à les bien considerer ce sont les seules causes qui à mon aduis peuvent alterer interieurement

terieurement la lumiere: Car comme sa nature 11 y a deux est d'aller en droictes lignes, il n'y a que la sortes d'af-Reflexion & la Refraction qui luy fassent per- foiblissedre cette rectitude: Et cette rectitude luy est la lumiere. tellement essentielle, qu'outre qu'elle ne la peut perdre sans s'affoiblir comme l'experience nous apprend, elle ne peut iamais reparer la perte qu'elle y souffre comme elle fait dans ses autres Affoiblissemens. Car i'en conçois de deux sortes: Le Premier dont nous venons de parler, quand les rayons perdent leur rectitude : L'autre, quand ils se des-vnissent & se separent les vns d'auec les autres: Et ce dernier se fait en deux façons, à sçauoir quand les rayons s'essoignent de leur source, & quand ils passent à trauers quelque corps opaque. D'autant que le corps lumineux estant le centre d'où ils partent & alentour duquel ils se respandent en forme spherique, il faut qu'ils loient fort serrez & fort vnis quand ils en sont proches, & qu'a mesure qu'ils s'en essoignent. ils se separent & se des-vnissent de plus en plus. Il en est de mesme quand ils trauersent quelque corps opaque, par ce que l'Affoiblissement qui leur arriue ne vient que de leur desvnion, la pluspart ne le pouuant trauerser

foit par ce qu'ils sont plus foibles, soit par ce qu'ils sont plus grossiers comme nous montrerons cy-apres; et les autres qui se font passage se trouuent ainsi separez des premiers. Or en quelque sorte qu'ils se des-vnissent, on peut les r'assembler & les rendre aussi clairs qu'ils estoient auparauant, soit par les miroirs concaues ou par quelque autre corps qui ait la mesme vertu: Mais il n'en va pas ainsi quand ils ont perdu leur rectitude, il n'y a plus de moyen de leur redonner la force qu'ils ont perduë & passant en couleur ils perdent la pureté qu'ils auoient qu'on ne peut plus restablir.

On peut donc dire que cet Affoiblissement est interieur & essentiel & que la Lumiere souffre alteration en sa nature & diminution dans sa vertu; mals quand les rayons se des-vnissent elle paroist bien plus soible, mais cet Affoiblissement est exterieur & ne touche point sa vertu interieure qui ne souffre aucune diminution en elle-mesme.

Ie ne parle point de l'Affoiblissement qui luy peut suruenir par le progrez qu'elle fait en s'essoignant de son principe, tel qu'il arriue aux autres qualitez sensibles; par ce que ie tiens pour certain & le pourrois prouuer par quantité de raisons, que le rayon conserue toute sa vertu & porte sa clarté toute entiere. iusques à la derniere extremité qui le termine, & s'il paroist plus foible c'est pour les causes que nous auons apportées.

Il n'y a donc que la Reflexion & la Refraction qui puissent changer la Lumiere en Couleur; par ce qu'il n'y a qu'elles qui puissent alterer sa nature, & qu'il faut qu'elle change en quelque façon de nature pour passer en

cette qualité.

Mais certes quelques experiences qu'elles ge pas la luayent en leur faueur, elles ont leurs difficultez & leur doutes comme les autres: Car si elles ont la vertu de produire les Couleurs, pourquoy ne le font elles pas tousiours? pourquoy y en a-t'il qui ne changent iamais s'il faut ainsi dire la face de la lumiere ny l'espece qui la distingue des autres Couleurs.

En effect on peut faire reflechir les rayons du Soleil ou d'vn autre corps lumineux, sur plusieurs miroirs & quoy qu'ils s'affoiblissent à chaque reflexion, iusques à n'en pouuoir plus souffrir apres la septiesine comme quelques-

La Reflexion nechan-

108 DES COVLEVES DE L'IRIS. vns ont obserué, neantmoins on ne verra iamais naistre aucune couleur de pasvne d'elles. S'il estoit donc vray que la Reflexion eust le pouuoir de changer la Lumiere en Couleur; pour quoy toutes celles qui se font sur ces miroirs n'en font elles paroistre quelqu'vne? et pourquoy dans ce long progrez ou la Lumiere souffre toutes les diminutions & tous les affoiblissemens dont elle est capable, ne trouue-t'elle la mesure & la proportion qui est necessaire pour en produire quelque espece. Ie veux bien que les rayons du Soleil en pafsant à trauers les arbres prennent les Couleurs de l'Iris, mais pourquoy faut-il que ce soit au leuer & au coucher de cet astre plustost qu'a son midy, puis que les mesmes reflexions se peuuent faire en ce temps-là comme en l'autre ? Ie veux bien qu'en tombant sur vn filet d'araignée ils le peignent diuersement, mais pourquoy n'en fait-il pas autant sur vn cheueu où sur vn filet de soye? pourquoy sur vne raye d'argent, plustost que sur celle de marbre ou de diamant? pourquoy sur des vales d'estain plustost que de porcelaine? Et pour quoy enfin sur des bouteilles de sauon plustost que d'vne autre matiere? asseurement il

faut qu'il y ait quelque autre chose que la Reflexion qui soit cause de toutes ces diuerses apparences.

L'on en peut dire autant de la Refraction NylaRefrapuis qu'elle porte souuent aux yeux l'image Elion, des objects qui sont dans l'eau sans changer leur couleur naturelle : Car si l'on met vne piece d'argent au fond d'vn vase & que l'on s'en esloigne iusques à ce que l'on ne la voye plus, si on vient à le remplir d'eau, la piece se presente à la veuë; et il faut necessairement que ce soit par Refraction, puis qu'il ny a point de ligne droite qui puisse estre tirée de la piece d'argent iusques à l'œil; cependant cette Refraction ne change point la couleur de la piece. Il en est de mesme d'vn baston droit qui paroist comme s'il estoit rompu quand il est enfoncé à moitié dans l'eau & qu'on le regarde de costé; car cela ne peut proceder que de la Refraction, qui pourtant n'en altere point la couleur. Et sans aller chercher d'autres exemples, les lunettes ne font leur effet que par la Refraction qu'elles causent dans la Lumiere & dans les Images sans apporter aucun changement à la O iii

couleur naturelle des objects. Et il est inutile de dire que toute Refraction ne colore pas veritablement la Lumiere, mais qu'il faut quelle fasse de tels & tels angles pour produire cet essect; car quelques grands ou petits qu'on les demande pour cela, il s'en peut trouuer de semblables dans la Ressexion qui ne changeront point la lumiere en couleur.

Ie sçay bien que l'on dit que la Refraction toute seule ne peut colorer la Lumiere; et qu'il faut non seulement quelle soit deuancée par des rayons qui ne soient point rompus & qui passent d'vn milieu rare en vn plus espais, comme quand ils viennent par l'air & qu'ils trauersent apres l'eau où le chrystal, dans lequel ils se rompent; mais encore que cette Refraction doit estre suiuie d'vne autre, les rayons passant de ce milieu dense où ils se sont rompus dans vn plus rare où ils souffrent vne autre Refraction: Et qu'ainsi pour produire les Couleurs il faut que la Lumiere & les Images ayent trois mouuemens differens, le premier en ligne droicte & les deux autres en deux diuerses Refractions.

Mais il est certain que si l'on regarde le Soleil dans l'eau, sa lumiere souffre ces trois mouuemens sans s'alterer; car la premiere cheute des rayons se fait en ligne droite, apres ils se rompent dans l'eau, & puis ils repassent dans l'air auec vne nouuelle refraction. Pourquoy ne se changent-ils donc pas en Couleur, puis que toutes les conditions que l'on de-

mande s'y rencontrent?

Daillieurs cette seconde Refraction ne sert de rien à la production des Couleurs, puis qu'elles se font dans le triangle auant que les rayons en sortent & qu'ils passent en l'air: c'est pourquoy si l'on met le triangle deuant vn miroir il paroist coloré dans le miroir, & par consequent il doit auoir en soy les Couleurs comme tous les autres objects que les miroirs representent. Et si l'on regarde la Lumiere qui tombe dans le triangle, elle se fait voir colorée sur ses faces; il faut donc que dés-là elle soit changée en couleur auant qu'elle se repande dans l'air : Aussi personne n'oseroit dire que le seu des diamans ne fust pas dans les diamans auant qu'il se porte aux yeux. Ainsi cette seconde Refraction est inutile à la naissance des Couleurs apparentes. Et l'on n'en pourra douter si on met l'œil dans l'eau où elles paroissent, car on les apperce-

DES COVLEVES DE L'IRIS. ura sans qu'il y ait d'autre Refraction que la premiere qui s'est faite.

Entre tant de raisons & d'experiences qui se choquent l'vne l'autre & qui partagent l'esprit, ne pourroit-on point faire quelque accommodement, & dire que la Refraction & la Reflexion prises separement ne font point les Couleurs apparentes, mais que l'yne & l'autre concourent ensemble à leur production.

La lumiere se change en reflexion & par refra-Etion.

Premierement on ne peut douter que la couleur par Refraction ne soit tousiours accompagnée de Reflexion puis que l'Optique nous enseigne que tout corps qui rompt les rayons les reflechist aussi. Car la lumiere a cette proprieté qu'elle ne rencontre iamais de differentes surfaces qu'elle ne s'y reflechisse plus ou moins; les plus grossiers ou les plus foibles de ses rayons s'arrestant au premier obstacle, tandis que les autres qui sont plus forts ou plus subtils passent outre si le corps est transparent. Cela paroist euidemment dans les vitres sur lesquelles la lumiere du Soleil tombant réjallit contre la veuë; quoy qu'elle ne laisse pas de les trauerser & d'esclairer les choses qui font font au de-là; dans les lunettes ordinaires nous voyons nostre image qui par consequent se doit reslechir pour retourner vers nos yeux; et dans vn miroir vne seule chandelle qui luy est exposée de costé, represente deux Images à cause des deux surfaces dont il est composée, l'image se reslechissant sur la premiere qui est transparente, aussi bien que sur la derniere qui est opaque.

Et ie m'estonne que ceux qui ont voulu chercher la cause des Couleurs que les Triangles font paroistre ne se soient pas aduisez de cela & qu'ils n'ayent consideré que la Refraction sans songer aux Reflexions qui s'y doiuent faire. S'ils eussent pris garde que la base du triangle où la lumiere tombe sans se rompre, la reflechist toute pure sur la muraille voisine, ils auroient bien jugé que toutes ses autres faces ont la mesme vertu pour les rayons rompus, et qu'il faut necessairement que ceux-cy rencontrant la derniere face par où ils doiuent passer dans l'air, vne partie s'y arreste & se reslechisse vers les faces opposées; Et qu'ainsi ces rayons reflechis se messent à diuerses fois auec ceux qui sont rompus; et que

de ce messange naissent les Couleurs que l'on

y apperçoit.

Car s'il faut que la Lumiere s'affoiblisse & se diminuë pour les produire, il est certain que la Refraction en commence l'affoiblissement; mais les diuerses Reslexions qui se sont apres, acheuent de l'esteindre s'il faut ainsi dire & la changent en couleur. Aussi ce sont elles qui principalement donnent à la Lumiere les diuerses proportions qui forment toutes les Couleurs qui se sont dans les Triangles comme nous montrerons cy-apres. Et quand il n'y auroit que cette raison-là, elle seroit asset forte pour persuader que la Reslexion est vne des principales causes qui les produit.

Mais il n'y aura plus lieu d'en douter si l'on considere que quand on pose l'œil au lieu où paroist l'Iris que le triangle jette hors de soy, on la void seulement sur la face qui est exposée au Soleil & non pas sur celle qui est la plus proche des yeux, quoy que l'image du Soleil tombe sur celle-cy aussi bien que sur l'autre; Par ce que c'est sur la premiere que les rayons reslechis s'vnissent auec ceux qui se sont rompus en la trauersant & que dans cette vnion se forment les Couleurs.

CHAPITRE SECOND. Nous pouuons donc conclure que du moins dans l'Iris des verres & des triangles les Couleurs naissent de la Reflexion & de la Refraction jointes ensemble; Et par consequent qu'il y a vne presomption inuincible, que la mesme chose se fait dans l'Iris celeste, dans celle des fontaines & generalement en toutes celles qui se font auec l'eau, soit quelle soit agitée par les rames, soit quelle soit esparpillée en petites gouttes, comme il arriue lors que l'on en a remply la bouche & que l'on la souffle deuant le Soleil. A quoy l'on peut adjouster les Couleurs qui paroissent quelquesfois foubs le chrystal, le talc, & autres semblables corps diaphanes quand il y a de l'air enfermé soubs quelqu'vne de leurs parties; par ce que l'on ne peut douter que là il n'y ait lieu pour ces deux mouuemens de

Mais la difficulté est de sçauoir si cette cause est generale pour toutes les autres Couleurs Apparentes, & s'il est necessaire que la Refraction & la Reslexion concourent ensemble pour peindre l'Iris des Nacres de perle, des rayons qui passent au trauers des ar-

la lumiere.

DES COVLEVES DE L'IRIS, 116 bres, des bouteilles d'eau sauonnée, des traces d'un limaçon, des vases d'estain poly, des fils d'araignée, des rayes faites sur l'argent, des plumes & des petits poils de drap; car il ne semble pas que la Refraction ait lieu en aucune de ces observations.

Examinons les donc chacune en particulier pour apprendre l'art que le Soleil employe en toutes ces merueilleuses peintures.

Comment se font les Couleurs desnacres de perle.

Premierement si on considere la composition des Nacres de perle, on verra qu'elles sont transparentes en leurs premieres surfaces & que celles de dessous sont inegales & en forme d'ondes; de sorte qu'il y a raison pour croire que la Refraction se fait dans les transparentes & que ces grandes inegalitez qui sont dessous causent une infinité de Ressexions differentes; et que par consequent les Couleurs qui s'y voyent en certains aspects naissent de l'union des rayons rompus auec ceux qui sont reflechis, tout de mesme que celles des verres pleins d'eau & des triangles.

Des rayons qui passentà arbres.

Mais cette cause est euidente dans les trauers des rayons qui se colorent en passant au trauers des arbres: Car comme cela n'arriue que lors

que le Soleil est proche de l'orison, on ne peut douter que les vapeurs dont l'air est alors remply ne contribuent à cet effect, autrement il deuroit aussi paroistre en plein midy. Ils se rompent donc en trauersant ces vapeurs, & venant apres à rencontrer les branches & les feuilles, ils y souffrent quantité de Reflexions, d'où naissent enfin ces belles Couleurs que les yeux y remarquent. De sorte que la raison pour laquelle ils ne paroissent point colorez quand sur le midy on les regarde à trauers ces arbres ou quand sur le soir on les void hors ces obstacles; c'est que là il se fait Reflexion sans Refraction, par ce qu'il n'y a point de vapeurs sur le midy; et qu'icy il y a Refraction sans Reflexion parce qu'il n'y a point de corps opaques pour les arrester; ainsi il faut que toutes les deux s'assemblent pour produire cet agreable phenomene.

Quant aux Bouteilles de sauon, ce ne leur est pas vne chose particuliere de prendre les teilles de Couleurs de l'Iris, puisque toutes celles qui sauve. se font sur l'eau les prennent en certains aspects. Toute la difference qu'il y a, c'est que les premieres les ont plus manifestes & plus

esclatantes, par ce que le sauon donne corps à l'eau & arreste dauantage la lumiere qui s'y restechit. Or comme on ne doute point qu'il ne se fasse Restraction dans celles qui se sont sur l'eau, & que par tout où il y a Restraction il y a aussi Reslexion comme nous auons montré, il s'ensuit que ces deux diuers mouuemens se sont dans les bouteilles de sauon où la mesme sigure & la mesme disposition des autres se rencontrent; et que par consequent ils concourent ensemble pour faire naisstre les Couleurs aux vnes & aux autres.

Il en faut dire autant de la Baue que le limaçon laisse sur ses traces : car comme c'est vne humeur qui dans son origine est diaphane, elle conserue en se desseichant quelque chose de sa premiere transparence; ainsi la lumiere venant à la trauerser y fait vne secrette Refraction laquelle estant jointe aux diuerses Reslexions qu'elle sousser sur le corps où cette humeur est attachée, cause cette varieté de couleurs que l'on y remarque.

Et c'est asseurement ainsi que les tailles douces sauonnées où imbuës de semblables matieres prennent en certains aspects les diuerses apparences de l'Iris, par ce que ces matieres qui sont transparentes rompent les rayons qui se reflechissent apres sur le corps

où l'image est empreinte.

On pourroit encore appliquer ce raisonnement aux Fils d'araignée: Car bien qu'il ne d'araignée. semble pas que la Refraction se puisse faire dans des corps qui sont si minces & si desliez; neantmoins si on considere qu'ils se colorent principalement quand la rosée est tombée dessus; que mesmes leur substance est rare & molle, n'estant rien en sa naissance qu'vne humeur subtile qui est dans le ventre de l'araignée & qui en sortant est espaissie par l'air; outre que les plus grandes toiles qui sont composées de ces filets se reduisent presque à rien quand on les presse & qu'on les roule soubs les doigts, qui est vne marque euidente que leur consistence est rare & spongieuse. Si on considere, dis-je, toutes ces choses, on jugera facilement qu'ils peuuent causer quelque Refraction dans les rayons du Soleil qui passent à trauers, lesquels apres se reflechissent sur les diuerses surfaces dont ces petits corps sont enuironnez. En effet ils paroissent diuersement colorez selon les aspects ou l'on les regarde: car en vn sens ils

Des filets

DES COVLEVRS DE L'IRIS, sont rouges, dans vn autre ils sont verts ou bleus, & souuent sur vne mesme ligne le haut est d'vne couleur & le bas d'vne autre: Ce qui doit faire croire que ce ne sont pas les reflexions exterieures qui font ces changemens, mais qu'il y en a qui se font interieurement comme dans les triangles, & qui causent toutes ces diuerses apparences. Qu'on ne dise point que la delicatesse de ces fils n'est pas capable de souffrir ces penetrations & ces diuers mouuemens de la lumiere ; car ses rayons font incomparablement plus subtils que les plus petits corps qu'on se puisse imaginer, et si les parties d'vn ciron que les yeux ne peuuent discerner, ont leur largeur & leur profondeur; ces filets qui sont sensibles les doiuent auoir bien plus grandes, et par consequent ils peuuent donner entrée aux Rayons qui sont encores plus déliez

qu'eux & les alterer à proportion comme les diaphanes de plus grande estenduë. La lumiere fait donc paroistre les Couleurs de l'Iris sur les Fils d'araignée par ce qu'ils sont transparens; et si elle ne fait pas le mesme essect sur vn cheueu où sur vn filet de soye, c'est qu'ils n'ont pas la mesme disposition & qu'el-

lc

le se reflechist sur eux sans y faire de Refraction.

Mais que pourrons nous dire des vases destain & des autres corps opaques qui sont polis; car il n'y en a gueres qui estant exposez à la clarté du Soleil ne representent comme vn certain nuage de diuerses couleurs qui se respand au dela des principaux points où la Reflexion des rayons se fait ? oserions-nous soustenir que la Refraction contribue à cet effect & qu'il y ait quelque transparence en ces corps-là qui puisse donner passage à la Lumiere.

Certainement qui voudroit prendre ce party choqueroit le sens & la vraye semblance; corps sont mais non pas peut-estre la verité. Comme nos yeux sont des tesmoins peu fidelles & peu exacts dans les choses subtiles & desliées, ils nous peuuent tromper dans le jugement qu'ils font de l'extreme opacité de ces corps-là; et quelque asseurance qu'ils nous en donnent, il sy peut trouuer quelque transparence qui leur sera impenetrable, mais non pas à la Lumiere. Car outre qu'Aristote nous apprend que cette qualité est commune à tous les corps

122 DES COVLEVES DE L'IRIS, de la nature ; s'il est vray que les especes visibles ne sortent pas de la simple & derniere surface des objects & qu'elle vienne aussi de celles qui sont dessoubs ; il faut de necessité qu'elles soient transparentes. En effect il seroit inutile aux peintres de mettre diuerses couches d'vne mesme couleur pour la rendre plus forte, si les dernieres ne donnoient passage à la couleur des autres qui sont appliquées les premieres: Et ceux qui donnent la trempe au fer, s'abuseroient quand ils jugent par la couleur rouge que le feu luy donne, qu'il n'est encore allumé que dans la superficie; et que c'est vne marque asseurée qu'il est enflammé par tout quand sa lumiere est toute iaune; ce qui s'obserue dans tous les autres metaux & dans les charbons mesines. Car cette diuersité ne vient que de ce que la noirceur des parties interieures où le feu n'a pas encores penetré, se mesle auec la lumiere qui est dans la surface & la fait paroistre rouge; et que lors que toutes ses parties sont allumées il n'y a plus rien qui altere la couleur naturelle du feu. D'où il faut tirer cette con-

sequence que la noirceur & la lumiere du dedans enuoient leurs especes iusques à la su-

perficie exterieure, & partant que ces corps tous opaques qu'ils sont à nos yeux, sont transparens en effect. Or si cela est veritable on ne peut douter que la Refraction & la Reflexion ne causent les Couleurs de l'Iris sur les vases d'estain, sur les rayes de l'argent & sur toutes les choses où elles paroissent, puis qu'il n'y a point de corps qui ne soit diaphane & qui par consequent ne soit capable de rompre & de restechir la lumiere.

Mais sans nous engager dans des propositions qui condamnent le sens d'erreur & la Philosophie de negligence; c'est assez que nous ayons pour constant que les Couleurs Apparentes se sont dans les corps diaphanes par Refraction & par Reflexion. Car si elles se trouuent en d'autres subjects où il ny ait aucune transparence, on peut dans vne disposition differente recourir à vne autre cause pourueu qu'elle soit capable de produire le mesme effet que la premiere, c'est à dire, d'affoiblir la Lumiere iusques à la mesure que la Couleur demande.

Il faut donc voir si la Reslexion toute seule a ce pouuoir dans les corps opaques; et si cela est, pourquoy dans les transparens la Re-

Qij

124 DES COVLEVES DE L'IRIS, fraction n'a pas le mesme privilege & qu'il faille qu'elle soit accompagnée de la Restexion.

D'on vient lesCouleurs des rayes & des poils.

Premierement ie remarque que si les rayës faites sur l'argent ou autre metail sont larges, et que les poils sur lesquels tombe la lumiere sont gros, il n'y paroist aucune des Couleurs dont est question; et qu'il faut que les vns & les autres soient fort desliez. De sorte que les rayons qui se reflechissent sur ces corps-là doiuent non seulement estre fort subtils parce qu'ils ne peuuent auoir plus d'estenduë que le plan qui les renuoye; mais encore qu'ils doiuent se separer s'il faut ainsi dire du corps de la lumiere auec laquelle ils estoient vnis: par ce qu'il n'y a qu'eux qui touchent les poils & le penchant des rayës, et que tout le reste de la masse de la lumiere passe outre ou réjallit aillieurs.

En second lieu ie considere dans ces petits poils, qu'ils doiuent estre en grand nombre; car s'il n'y en auoit qu'vn ou deux, ils ne prendroient point les Couleurs de l'Iris. De sorte que l'on peut asseurement conclure de là qu'il se fait plusieurs Reslexions des vns aux autres; tout de mesme que dans les rayës

de l'argent, où le biais de la fente sur lequel les rayons tombent les fait rejaillir sur l'autre costé, & celuy-cy sur l'autre selon les diuers

angles qu'ils font dans leur cheute.

Et si l'on veut prendre garde au mouuement de la Lumiere qui se fait sur les vases d'estain ou d'autre semblable matiere, on trouuera qu'elle y souffre la mesme alteration; car soit que ces vases soient faits au tour ou auec le marteau, il y demeure quantité depetites eminences qui causent les Reslexions dont est question, par le moyen desquelles les rayons s'escartent du gros de la lumiere & tombent ç'à & là sur la surface au delà du plan où la masse lumineuse se reslechit.

Apres toutes ces considerations on ne peut douter que les rayons ne souffrent en ces rencontres vn tres-grand affoiblissement, non seulement par ce qu'ils deuiennent fort desliez, mais encore par ce qu'ils se diuisent & se separent du corps principal de la lumiere dont ils faisoient partie; et qu'enfin ils souffrent plusieurs Reslexions. De sorte que les Couleurs estant des Lumieres affoiblies il ne faut pas s'estonner si ces rayons prennent diuerses Couleurs selon la mesure de l'affoiblis-

126 DES COVLEVES DE L'IRIS,

sement qui conuient à chacune espece. Ainsi l'on peut dire que la Reflexion toute seule produit les Couleurs, pourueu qu'elle se fasse par des rayons qui ayent toutes les conditions que nous venons de marquer : Car quand ils sont forts elle ne les colore point, oubien il faut qu'elle soit accompagnée de la Refraction comme il arriue dans les corps diaphanes. Et de là il est facile de tirer la raison pourquoy la Refraction toute seule n'a pas le mesme pouuoir & qu'il faut que la Reflexion se joigne auec elle: Car outre que tout corps qui rompt les rayons les reflechist aussi & qu'il faut par consequent que la Reflexion se trouue necessairement auec la Refraction: Quand celle-cy pourroit estre toute seule, elle n'auroit pas le pouuoir d'affoiblir la Lumiere iusques au point que les Couleurs demandent; d'autant que la Lumiere qui penetre les corps transparens fait pour l'ordinaire vne masse considerable, contenant beaucoup de rayons qui sont vnis ensemble & qui ne se diuisent point comme ceux dont nous venons de parler; de sorte qu'elle est trop forte pour estre affoiblie par la seule Refraction & il faut de necessité que la Reflexion vienne

au secours de celle-cy pour la reduire à la

mesure qui doit faire les Couleurs.

Ce seroit icy le lieu où il faudroit chercher quelle est cette mesure, & ce d'autant plus que nostre dessein semble nous restraindre à la recherche des Couleurs Apparentes. Mais par ce que dans les Couleurs Fixes la Lumiere s'incorpore en quelque façon auec la matiere, & que les choses corporelles se mesurent plus facilement que les autres; il faut auparauant considerer la Lumiere dans les corps, examiner les causes qui l'y affoiblissent & trouuer s'il est possible en des choses qui sont palpables & grossieres la mesure qui doit regler celles qui sont plus desliées & plus subtiles.

Quelles sont les causes qui affoiblissent la Lumiere dans les Couleurs Fixes.

ARTICLE NEVFIESME.

L faut icy presupposer vne verité auoüée A de tout le monde, que la Lumiere n'a point de veritable contraire qui puisse agir contre

128 DES COVLEVES DE L'IRIS, elle & qui ait le pouuoir de la destruire. Car l'Obscurité qui luy est la plus opposée, n'est qu'vne priuation qui n'est rien en effect & qui par consequent ne peut rien : Et l'Opacité qui de toutes les qualitez corporelles semble estre sa plus grande ennemie, n'est point actiue & n'est pas mesme du mesme ordre n'y soubs le mesme genre qu'est la Lumiere comme les contraires doiuent estre. De sorte que si la Lumiere se trouue affoiblie dans les Couleurs Fixes, cela ne vient d'aucune chose qui ait agi contre elle & qui l'ait diminuée; mais il faut de necessité ou que la cause qui l'a produite ne l'ait communiquée qu'en ces petites portions; ou que le subject qui l'a receuë n'ait pas esté capable d'en contenir dauantage. Or il est certain qu'il n'y a point de cause particuliere qui produise la Lumiere des Couleurs, Fixes, comme il y en a vne qui produit celle des Couleurs Apparentes, par ce qu'elle ne vient pas de dehors comme celle-cy, & qu'elle est interieure & naturelle aux corps qui sont colorez. Et par consequent toute la diuersité qui se trouue dans le partage de la Lumiere ne procede que de la capacité du subject qui la reçoit, c'est à dire de la dispofition

sition qui est affectée à cette qualité, & sans laquelle le corps ne la receuroit iamais : car selon qu'elle est plus ou moins parfaite, la Lumiere s'y trouue aussi plus grande ou plus

petite.

Mais il n'est pas aisé de decouurir quelle disposition est cette disposition veu la diuersité des sub- qui est necesjects où la Lumiere se trouue; car les corps lu- miere. mineux sont mesme si differens entre-eux qu'ils ne semblent pas auoir rien de commun qui puisse soustenir cette merueilleuse qualité. En effect que pourroit-on s'imaginer de semblable dans le corps du Soleil & celuy des bois pourris, de la graisse & des vers, qui les peust rendre lumineux? quel rapport y at'il entre des choses si nobles & si parfaites comme sont les astres, & celles qui sont icy bas toutes groffieres & impures qu'elles sont. Car estant colorées, & les Couleurs estant des Lumieres, il faut qu'elles participent à cette disposition & à ces preparatifs que la Lumiere demande dans les corps pour y estre receuë.

Qui voudra neantmoins considerer que la Lumiere Exterieure a tant de conuenance & d'affinité auec les corps transparens; que c'est

Quelle est la

Des Covleves de l'Iris, en eux seulement qu'elle a la liberté de se repandre; que quand elle passe d'vn corps dense en vn plus rare & où par consequent la transparence est plus parfaite, elle s'esloigne de la ligne perpendiculaire, comme si elle deuenoit plus libre & qu'elle ne fust plus dans la contrainte où elle estoit en vn corps plus espais; qu'au contraire elle ne trouue rien qui luy resiste que l'Opacité qui est opposée à la Transparence; quelle semble la fuir quand elle se reflechit à sa rencontre; et qu'elle se fortifie en s'aprochant de la ligne perpendiculaire, quand elle passe au trauers de quelque corps qu'elle trouue infecté de cette qualité grossiere & materielle; qu'enfin cette Lumiere est transparente elle-mesme, estant inuisible comme la transparence; car quoy qu'elle soit dans l'air, elle ne touche point la veuë si elle n'est soustenuë de quelque corps opaque.

La transle subject de la Lumiere.

Qui voudra di-je considerer toutes ces parence est choses croira facilement que la Transparence est le veritable subject de la Lumiere Exterieure & l'vnique disposition que celle-cy demande pour s'insinuer dans les corps. Or si cela est ainsi il faut absolument qu'elle le soit

encore de la Lumiere Interieure, puis que cette Lumiere est de mesme nature que l'autre comme nous auons montré, et que les formes qui sont de mesme espece veulent de mesmes dispositions dans la matiere pour y estre introduites.

En effect nous voyons que tous les corps lumineux nous paroissent diaphanes quand on les regarde de prés, nonobstant la Lumiere qu'ils ont laquelle borne & arreste la veuë, comme on peut juger par la flamme à trauers laquelle on void le bois ou la mesche qui l'entretient. Les choses mesmes qui sont opaques en prenant la Lumiere deuiennent transparentes, comme le charbon allumé, les graifses, les bois pourris & les vers luisans : car le charbon laisse voir quelque peu de sa profondeur quand il est embrazé; et les autres qui durant le iour n'ont rien qui ne soit opaque, font la nuict paroistre la partie qu'ils ont lumineuse, toute transparente.

Aussi à bien examiner la nature de la Trans- D'où vienz parence, on trouuera que de toutes les quali- la transparence. tez materielles il n'y en a point qui soit si conforme à la Lumiere ny qui soit plus digne

DES COVLEVES DE L'IRIS. d'arrester cette qualité celeste dans les corps elementaires. Car si la premiere source de la Transparence vient de la petite portion de matiere qui se trouue soubs vne grande quantité, comme nous auons montré au discours des Causes de la Lumiere, il est certain qu'on ne peut trouuer de disposition qui soit plus propre à la receuoir & à la conseruer que cellelà. Par ce qu'outre que la Lumiere est la plus active de toutes les choses sensibles, elle est d'vne nature qui approche de la spiritualité & qui semble estre l'orison qui separe les choses materielles d'auec les immaterielles : de sorte que dans la necessité où elle est d'estre soustenuë de quelque corps, il faut pour luy estre plus conforme qu'il ait le moins de matiere qu'il est possible, puis que c'est la matiere qui resiste à l'action & qui rend les choses grossieres, pesantes & paresseuses. Aussi voyons nous que les corps les plus transparens sont rares, subtils & legers; qui sont des accidens qui ne se trouuent que où il y a peu de matiere laquelle est esparse & estenduë; et à mesure qu'ils deuiennent plus espais, plus pesans & plus grossiers leur transparence diminuë à proportion. Et si l'on veut prendre

trouuera que l'Eau & la Terre qui en sont les plus grossieres & les plus opaques, sont aussi les plus materielles & ont pour cette raison. esté placées au plus bas estage du monde: Et par consequent l'Air & le Ciel qui sont subtils, transparens & qui ont esté logez au dessus des autres, doiuent auoir moins de matiere qu'elles.

Certainement comme le principal effect de la transparence est de laisser passer la Lumiere à trauers les corps, moins il y a de matiere & moins la Lumiere y trouue d'obstacles; et plus elle y est estenduë, celle-cy trouue aussi plus de passages pour la penetrer.

Ie sçay bien que l'Esgalité & l'vniformité des superficies sert à la Transparence & que mes- l'esgalitédes me on la propose ordinairement comme l'v- la transpanique cause qui la fait naistre : mais apres l'auoir bien considerée, on verra que ce n'est qu'vne condition particuliere que quelques subjects demandent pour estre diaphanes comme le verre, le chrystal & autres semblables; Et que non seulement elle se trouue en quelques-vns sans causer la Transparence, comme

Superficies à

Riii

134 DES COVLEVES DE L'IRIS, dans la flamme & dans l'or en feiiille, dont le marteau à vray-semblablement applany & esgalé toutes les surfaces; mais encore qu'il y en a où elle ne se rencontre point, qui ne laissent pas d'estre diaphanes, comme l'air qui est agité: car il est certain que le mouuement en confond & brouille toutes les superficies comme il fait en l'eau. De sorte que cette vniformité n'est requise que lors que la substance des corps est plus grossiere & plus materielle, comme si c'estoit vn correctif de l'abondance de la matiere qui entre en leur composition; par ce que cette Esgalité est vne sorte d'vnité qui tient toute la masse du corps diaphane en vn mesme estat & qui par consequent ne donne point lieu à la Lumiere. d'alterer son mouvement en le trauersant.

La Lumiere a habitude auec la surface. Pour entendre cecy il faut remarquer que bienque la Lumiere se communique aux corps selon toutes les dimensions qui leur conuiennent; neantmoins il semble qu'elle ait quelque habitude plus particuliere auec leurs surfaces qu'auec leur prosondeur & leur solidité. Car il n'y a que la surface qui altere son mouuement, & elle seule en cause la Refraction &

lidité y contribuë.

En effect dés que les rayons viennent à penetrer la premiere superficie d'vn corps transparent, ils prennent dés-là le biais qu'ils gardent au reste de leur mouuement, & l'angle qu'ils y font ne se change point pour quelque profondeur ou solidité que le corps puisse auoir; mais apres ce premier destour ils le trauersent en vn moment & en droicte ligne, iusques à ce qu'ils ayent rencontré vne differente surface qui soit capable de les rompre ou de les reflechir. Or comme cela ne vient pas simplement de la surface puis que celle de l'air agité ne produit pas cet effect, il faut que ce soit la nature & la condition particuliere de telle surface qui en soit. la cause; et parce que la surface est de mesme nature que le reste du corps s'il est homogene, la Lumiere venant à la trauerser s'altere dés l'entrée qu'elle y fait tout autant que la consistence de tout le corps le requiert.

Mais quelle est donc cette Consistence? ce n'est pas la densité ny la rareté, par ce que l'air comprimé ne fait point d'autre Refraction. 136 DES COVIEVES DE L'IRIS, que celle qu'il faisoit estant libre; ce n'est pas aussi la dureté ny la mollesse, par ce que les rayons se rompent esgalement dans l'eau & dans la glace: Il reste donc que ce soit le plus & le moins de matiere qui entre en la composition des corps; et que la Lumiere passant d'vn milieu où il y a moins de matiere dans vn autre où il y en a dauantage, elle se detourne à l'abord de ce qui luy est ennemy & s'aproche de la perpendiculaire comme pour le fuir où pour se fortifier contre luy: Que si de ce milieu elle passe dans vn autre qui soit moins grossier, elle s'esloigne de la mesme ligne & se trouuant dans vn subject qui est plus conforme à sa nature, elle s'estend en liberté & n'a plus besoin de se contraindre.

Ce qui confirme cette verité c'est que le mouuement de la Lumiere ne s'altere point quand les surfaces des corps subtils sont changées, comme il paroist dans l'air agité, et que dans les autres il souffre tout autant de changemens qu'il y a de differentes surfaces. Ce qui ne peut proceder que du diuers partage de la matiere qu'ont ces deux sortes de diaphanes, estant en si petite quantité aux vns qu'on.

CHAPITRE II.

qu'on peut dire qu'elle n'est pas sensible à la Lumiere & qu'elle n'est pas capable de l'arrester quelque inegalité qu'il y ait dans ses surfaces; au lieu qu'aux autres elle est si abondante qu'au moindre changement qui arriue aux superficies, elle se fait sentir & contraint cette qualité de fuir ce qui luy est contraire. Il est donc certain que la principale cause qui rend les corps transparens, c'est la petite portion de matiere qu'ils ont soubs vne grande quantité, & que l'Esgalité des superficies n'est qu'vne condition qui doit accompagner ce partage dans ceux qui sont groffiers; qu'au contraire l'Opacité despend de l'abondance de la matiere qui se trouue soubs vne petite quantité auec l'inegalité des surfaces.

D'où il faut tirer cette consequence, qu'il Ilya deux y a deux sortes de Diaphanes selon que l'on sortes de diaphanes. considere la cause & l'effect de la Transparence; car outre ceux qui sont sensiblement Transparens, c'est à dire qui donnent passage à la Lumiere & aux Images, qui est l'effect ordinaire de la Transparence; on peut dire que ceux qui en ont l'essence & la cause formelle laquelle consiste dans la disposition de

138 DES COVLEVES DE L'IRIS,

la matiere que nous venons de marquer, sont essentiellement Transparens; quoy qu'ils ne permettent pas à la Lumiere de passer à trauers, à cause qu'ils n'ont pas l'Egalité des surfaces. Ainsi le verre fondu & le chrystal en poudre sont des corps qui sont essentiellement diaphanes, quoy qu'en cet estat la veuë ne les puisse penetrer; par ce qu'ils ont en soy la cause formelle de la Transparence & qu'il ne leur manque que l'Egalité des surfaces qui n'est qu'vne condition particuliere que cette qualité ne demande pas tousiours. Cette doctrine est si veritable que nonobstant la jalousie & la division qui a tousiours regné entre Platon & Aristote & leurs sectateurs, ils sont tous conuenus ensemble qu'il y auoit deux fortes de Diaphanes, l'vn qui n'est point terminé & que les yeux penetrent de toutes parts, comme l'eau, l'air, le verre; et l'autre qui est terminé & qui borne & arreste la veuë comme sont tous les corps colorez.

Mais quand on ne voudroit point aduoüer d'autre Transparence que celle qui donne passage à la Lumiere, toussours faudroit-il confesser qu'il n'y a point de corps pour opaque qu'il nous paroisse, où elle ne se trouve messée: c'est pourquoy Aristote auoit raison de dire que ce n'estoit pas vne qualité qui sust affectée à certains subjects comme à l'Air à l'Eau & autres semblables; mais qu'elle estoit commune & generale à tous les corps, qu'elle n'en pouvoit estre separée & qu'elle estoit cause de la Couleur qu'ils avoient: Et de vray si on en excepte les metalliques il n'y en a aucun qui estant reduit en pieces tenves & minces, ne paroisse transparent: Et l'esmail & le verre que l'on tire de tous les metaux doivent bien faire juger qu'ils ne sont pas privez de cette qualité non plus que les autres.

Si cela est ainsi, & que la Transparence soit l'vnique disposition qui est capable de receuoir la Lumiere, il sera facile de comprendre comment les Couleurs qui sont des Lumieres, se rencontrent dans les corps opaques, puis qu'elles y trouuent la Transparence: Et comme il y a des corps qui sont plus ou moins Transparens, on verra pourquoy les Couleurs Fixes sont des Lumieres affoiblies, puis qu'il n'y peut auoir que telle portion de Lumiere en tel degré de Trans-

Sij

parence; le subject n'estant pas capable de receuoir la forme en vne plus grande persection que n'est la disposition qui luy est affectée. Ainsi la Lumiere sera parfaite dans la plus parfaite Transparence, & mesme quand celle-cy se diminuëra, l'autre s'affoiblira à proportion & sera naistre toutes les especes de Couleurs selon qu'elles seront plus hautes ou plus brunes; en vn mot selon qu'elles auront de plus grandes ou de plus petites portions de Lumiere.

Enfin on tirera de ces veritez la decision de la question proposée au commencement de cet Article, à sçauoir quelles sont les causes qui affoiblissent la Lumiere dans les Couleurs Fixes: Car puis que les degrez de la Lumiere se mesurent par ceux de la Transparence & qu'il n'y a rien qui diminuë la Transparence que l'Opacité qui se trouue messée auec elle; il s'ensuit qu'il n'y a que l'Opacité qui affoiblisse la Lumiere: Encore n'est-ce que par accident, dautant que l'Opacité n'est ny actiue ny formellement contraire à la Lumiere, & qui par consequent ne la peut alterer; mais c'est qu'elle diminuë la Transparence & que l'affoiblissement de la Lumiere vient

en suite de cette diminution.

Il faut neantmoins remarquer que comme sortes de il y a deux sortes de Diaphanes il y a aussi deux corps d'Osortes de corps Opaques : car ceux qui ont paques. beaucoup de matiere soubs vne petite quantité, & qui pour ce subject ne donnent point passage à la Lumiere & aux Images, pour les raisons que nous auons dites, sont à bien parler, essentiellement opaques; mais les autres qui ne le sont que par l'inegalité des surfaces comme le chrystal en poudre, ou par la Lumiere sensible qu'ils ont, laquelle les rend opaques, comme le corps de la flamme & peut estre celuy de tous les Astres: ceux-là disie ne sont opaques que par accident; et ce n'est pas cette Opacité qui fait l'affoiblissement de la Lumiere ny la diuersité des Couleurs, mais la premiere qui est essentielle.

Mais què veut dire cette Lumiere sensible Toute Luqui rend les corps opaques, y en peut-il auoir miere n'est pas sensible. qui ne soit pas sensible? Pour leuer cette difficulté dont la decision seruira a l'intelligence des choses que nous venons de dire; Il faut presupposer que l'ordre de la nature veut que

Siii

rence qui est l'vnique disposition que demande la Lumiere, ne peut estre en quelque subject qu'au mesme temps la Lumiere ne s'y La mesure trouue; et par consequent il ny a point de corps diaphane qui n'ait sa Lumiere interieure laquelle est proportionnée aux degrez de Transparence qu'il a. De sorte qu'on peut dire que les Cieux qui sont les premiers & les plus parfaits entre les corps Transparens, ont en eux-mesmes la plenitude de la Lumiere; mais qui n'est pas sensible par ce qu'elle est

142 DES COVLEVES DE L'IRIS,

lors que la matiere a toutes les dispositions & les preparatifs qui sont necessaires à la naissance de quelque forme, cette forme y soit introduite par l'action des causes particulieres ou generales. De là il s'ensuit que la Transpa-

tellement esparse & comme rarefiée dans l'estenduë de ces substances desliées & subtiles, qu'elle n'a pas assez de corps pour toucher les yeux; il faut pour se rendre visible qu'elle soit ramassée & reserrée par l'approche & l'espaissement des parties où elle est espanduë: Et pour lors elle borne la veuë & rend en suitte ces parties opaques, du moins par accident. C'est ainsi que toute l'antiquité à creu que les astres auoient esté formez, & que ce

de Lumiere suit les degrez de la Transparence.

CHAPITRE SECOND. 143 n'estoit qu'vn ramas de plusieurs parties du Ciel qui ayant esté reiinies ensemble faisoient paroistre la Lumiere qui n'estoit pas sensible dans la rareté qu'elles auoient auparauant. C'est ainsi que la flamme qu'on ne void presque pas quand elle s'allume en des matieres rares & subtiles, esclaire fortement quand elle s'est esprise en des choses espaisses & grossieres. Et toute la Medecine est d'accord que les Esprits qui, comme dit Aristote, sont proportionnez à l'element des astres, c'est à dire qui ont la mesme constitution de la matiere que le corps des Cieux, et qui par consequent sont Transparens comme eux; Elle confesse disse qu'ils sont essentiellement lumineux; mais que leur Lumiere ne paroist pas à cause de la tenuité & subtilité de leur substance, s'ils ne sont reiinis & ramassez, comme il arriue dans les yeux de quelques animaux & dans les vers luisans.

Ce que nous venons de dire du Ciel se peut appliquer à proportion aux autres corps Transparens; car l'Air qui est moins diaphane que le Ciel & qui a dessa quelque peu d'Opacité en sa composition, a vne Lumiere interieure proportionnée à sa Transparence, fçauoir est la Blancheur, laquelle il fait paroistre quand il est espaissi par le messange d'autres corps plus grossiers; comme on peut voir dans l'escume, dans la neige & dans toutes les autres choses qu'on appelle Aërées.

L'Eau qui est moins Transparente que l'Air, a aussi vne plus petite portion de Lumiere que luy, & par consequent vne Couleur plus brune laquelle deuient sensible par l'espaissement qui luy arriue; Aristote a creu que c'est la Noirceur, par ce que l'eau qui croupit à l'ombre deuient noire; que le bois & les pierres sur lesquelles elle coule se noircissent à la fin; et que la Couleur des charbons ne peut venir d'aillieurs que de l'humidité que la chaleur du feu a espaissie; puis que lors qu'elle est toute consumée la noirceur disparoist & qu'il ne reste que la cendre où il n'y a plus d'humeur qui puisse entretenir la flamme & la Couleur qu'ils auoient. En vn mot c'est vne opinion qu'il a tenuë constamment en tous ses ouurages, que l'Air & l'Eau sont les principes du Noir & du Blanc & que toutes les choses n'ont ces Couleurs que par la participation de ces deux Elemens.

D'autres

D'autres neantmoins tiennent auec beaucoup de vray-semblance que le Verd est plustost la couleur naturelle de ce dernier, que le Noir: par ce que l'Eau qui croupit au Soleil deuient verte; que toute celle des estangs, des lacs & des rivieres, pourueu qu'elles ne soient pas rapides, quelque claire & transparente qu'elle soit, se verdit au Printemps; et que la Couleur mesme que nous appellons verd de mer nous apprend qu'il n'y en a point qui soit si naturelle à cet element que cellelà. Car quoy que la mer paroisse ordinairement bleuë, ce n'est que l'image de la couleur du Ciel que ce grand miroir represente; Encore ne l'apperçoit-on que dans vne veuë confuse & dans vne grande distance; de prés sa couleur est verdastre. Enfin si l'on considere que toute la verdure des plantes ne vient & ne se conserue que par l'humidité; que celle de la terre, des pluyes & de la rosee en est l'ordinaire aliment; et que quand elle vient à manquer leurs feuilles se seichent, se fanent & prennent d'autres couleurs; on ne poura douter que le Verd ne soit la couleur naturelle de l'Eau: et que la raison pour laquelle elle est si generale & si familiere à la

nature, c'est que cet element domine en tous les vegetaux & leur communique sa teinture sans souffrir ces grandes alterations qui sont necessaires pour former les autres couleurs.

Mais que l'Eau soit naturellement noire ou verte, il s'ensuit toussours que toute transparente qu'elle est, elle a vne couleur interieure; et qu'il en est de mesme des metaux, lesquels ont chacun leur couleur propre qu'ils mettent en euidence quand le feu ou quelque autre cause a tiré a la surface le diaphane qui sert de subject à leur couleur : car c'est ainsi que la rouille sort du fer, que le verd de gris sort du cuyure, que l'on tire de l'or de l'argent & des autres, diuers emaux qui ont tous leur teinture particuliere. Et par consequent nous pourons conclure que la Transparence est la mesure de la Lumiere interieure, & que tous les corps ont autant de cette Lumiere qu'ils ont de Transparence: de sorte qu'apres les lumineux qui l'ont au supreme degré, ceux qui en ont beaucoup, ont des couleurs fort hautes & ceux qui en ont moins les ont plus brunes; gardant cette proportion iusques au Noir qui a la plus petite portion de Lumiere & qui suppose aussi la plus petite portion de Transparence.

Ce qui pouroit neantmoins faire douter Pourquoy de cette verité, c'est qu'il y a quantité de cho- de pareille ses qui apparemment sont d'vne mesme con- consistence sistence, qui ont la mesme disposition & le uerses Conmesme partage de la matiere & qui par con-leurs. sequent doiuent auoir vne esgale Transparence, lesquelles pourtant ont des couleurs fort opposées comme sont les marbres noirs & blancs. Mais il est aisé de resoudre cette difficulté si l'on prend garde que les choses se colorent en deux manieres, premierement par Alteration comme les fleurs, les fruicts & les plantes qui prennent leur couleur par la coction des sucs qui entrent en leur composition; et selon que le seu agit sur les corps, il leur donne diuerses couleurs qu'ils n'auoient point auparauant. Secondement par Teinture ou par addition de substances colorées.

La premiere suppose tousiours vn changement dans la consistence de la matiere, parce que les parties s'espaississent ou s'atenuent par l'action des premieres qualitez : et de-là vient que le Diaphane s'euapore ou s'altere,

fe rendant tantost plus pur & plus clair, tantost plus grossier & plus obscur; d'où naist enfin le diuers partage de la Lumiere, & par consequent toute la diuersité des Couleurs. Mais aucun de ces changemens n'arriue pour l'ordinaire dans les teintures; par ce que le corps qui donne la couleur est en si petite quantité qu'il ne peut alterer la consistence des choses qu'il teint, comme on peut voir dans vn verre d'eau que quelques gouttes d'ancre noircissent, sans que pour cela elle en deuienne plus espaisse & plus grossiere.

Or il est certain que les pierres ne se colorent point autrement, & que les couleurs qu'elles ont ne viennent daillieurs que de certaines liqueurs qui passent à trauers la terre, l'infectent de la couleur qu'elles y rencontrent & la communiquent apres au suc qui se congele en pierre. Car le principe de ces Mineraux est vn suc qui est sluide & transparent en son origine, & qui venant à se messer auec la terre s'incorpore auec elle & se congele apres par la vertu coagulatiue qui luy est naturelle: de sorte que si la terre qu'il rencontre est bien pure & bien liée, il con-

serue sa transparence & les pierres sont diaphanes: Autrement elles sont opaques: Enfin il communique aux vnes & aux autres la couleur dont il est imbu. Aussi la Couleur est vne chose qui ne fait pas la difference des pierres, puis qu'il y en a de mesine espece qui sont diuersement colorées, se trouuant mesmes des diamans qui sont rouges & des saphirs qui sont blancs. Quoy qu'il en soit, s'il est vray que les pierres ne se colorent que par teinture & non par aucune alteration des premieres qualitez, et que la teinture ne change pas tousiours la consistence des choses qui se teignent, il ne faut pas s'estonner si les marbres ont des couleurs si opposées, quoy qu'ils ayent vne mesme disposition & vn mesme partage de la matiere & par consequent vne esgale transparence. Ainsi le principe que nous auons estably demeure veritable, qu'il y a autant de Lumiere dans les corps qu'il y a de Transparence; par ce que le corps qui teint, a sa Transparence propre & la Couleur qui est proportionnée à cette Transparence; et le corps qui est teint, n'a qu'vne couleur empruntée qui empesche que sa couleur naturelle ne paroisse laquelle est

150 Des Covleves de l'Iris, comme l'autre proportionnée à sa Transparence.

C'est la tout ce que nostre dessein nous a donné la liberté de dire des Couleurs Fixes & Permanentes; ce qui s'y pouroit adjouster appartenant au traité des Couleurs en particulier. Il n'y a qu'vne opinion que ie ne puis m'empescher d'examiner, par ce qu'estant nouuelle & fort specieuse, elle peut persuader beaucoup d'esprits & leur rendre la nostre suspecte.

Si le Soulphre est le subject de la Couleur. Il y en a donc qui disent que tous les corps sont composez de Sel, de Soulphre & de Mercure; et que le Soulphre est l'vnique & le veritable subject de la Couleur. Ils sondent cette opinion sur ce que la Couleur est vne sorte de Lumiere & qu'il n'y a que le seu qui soit lumineux dans les mixtes; de sorte que le Soulphre estant le seul de tous les principes qui soit inslammable, il n'y a que luy qui soit susceptible de la Lumiere; et comme les Couleurs sont des Lumieres affoiblies, que selon qu'il est plus ou moins pur, il a aussi de plus grandes ou de plus petites portions de Lumiere; ou pour mieux dire,

il est capable de les receuoir: car ils tiennent que la clarté du Soleil ou des autres corps lumineux venant à tomber sur les choses, elle allume les parties Sulphurées qui entrent en leur composition, & que les flammes qui en sortent sont les Couleurs que nous leur

voyons.

Mais quand on demeureroit d'accord de ces principes pretendus, il est certain que le Soulphre n'est pas le seul d'entre-eux qui soit visible, & que le Mercure & le Sel se peuuent discerner par la veuë: Or ce qui est visible doit estre coloré, & par consequent le Mercure & le Sel ont quelque Couleur, & le Soulphre n'est pas le seul & vnique subject de cette qualité. Et il est inutile de dire que ces substances ne se separent iamais si parfaitement qu'il n'en reste quelque portion. qui demeure messée auec les autres, & qu'ainsi il y a tousiours dans le Sel & dans le Mercure quelque partie Sulphurée qui les teint & qui les colore. Car outre qu'il faudroit alors que la Couleur qu'elle leur donneroit fust brune & obscure; dautant que cette petite portion de Soulphre supposeroit vne petite portion de Lumiere, & qu'vne petite 112 DES COVLEVES DE L'IRIS, portion de Lumiere ne peut produire qu'vne foible & obscure Couleur; Cependant le Sel & le Mercure dont on a ainsi separé le Soulphre, paroissent de couleur blanche qui est la plus haute & la plus lumineuse de toutes: Outre qu'il y ena qui pretendent pouuoir faire cette separation si juste, qu'il ne restera aucune portion de Soulphre dans les autres, lesquels pourtant ne laisseront pas d'estre colorez. Outre ces raisons dis-je il est constant. entre tous les chymistes qu'apres qu'ils ont tiré le Sel qui est dans les cendres, il demeure vne terre sterile, desnuée de toutes les vertus des autres principes & vne vraye terre ou teste morte comme ils l'appellent; cependant cette terre est extremement blanche; d'où vient donc qu'elle a cette blancheur s'il n'y a plus de Soulphre & si le Soulphre est le prin-

cipe de toutes les Couleurs?

Mais le moyen de s'imaginer que les Couleurs soient des flammes que la Lumiere du Soleil allume dans ces parties Sulphurées? Se pouroient-elles espandre en des subjects qui n'ont aucune disposition pour prendre feu? car si l'on met vn Ruby ou vne esmeraude dans l'eau ou qu'ils soient emprisonnez

dans

dans la glace, leur couleur paroist aussi viue que s'ils estoient dans l'air; cependant ils ne sont pas en estat de s'allumer, l'eau & la glace esfant si ennemies de la flamme. Daillieurs ces flammes confumeroient à la fin la matiere qui les entretient ; et ce seroit vne merueille incomprehensible que des corps qui conseruent durant tant de siecles leur couleur naturelle, ne souffrissent aucune diminution dans leur poids, dans leur figure, & dans leur couleur mesme, apres vn si long embrasement. Ce seroit encore vn autre subject d'estonnement que ces flammes s'amortissent au moment que la Lumiere du Soleil disparoist, & qu'il n'en demeurast pas la moindre estincelle qui se fist voir apres l'essoignement de cet Astre. Car la flamme qu'il allume dans la pierre de Bologne nonobstant que la matiere ou elle s'esprend soit extremement subtile, esclaire neantmoins quelque temps apres qu'on l'a mise en vn lieu obscur; pourquoy donc celle qu'il produit dans des matieres plus espaisses & plus grossieres où naturellement elle se doit conseruer plus long-temps, se perd elle à l'instant qu'il se cache?

Ie preuoy bien qu'ils diront qu'il ne faut

174 DES COVLEVES DE L'IRIS. pas prendre à la rigueur ces mots de Feu & de Flamme, & que ce sont des façons de parler figurées qu'ils employent pour exprimer l'effect de la Lumiere sur ces parties Sulphurées. Mais quel peut estre cet esse ? Est-ce qu'elle les esclaire & les illumine seulement? En ce cas les Couleurs ne seroient autre chose que la Lumiere Exterieure, ce qu'ils ne veulent pas auoiier. Outre qu'il ne faudroit pas restraindre les Couleurs à ces parties Sulphurées, les autres qui sont de diuerse nature estant aussi bien illuminées que celles-là. Estce point qu'elle se charge de leur teinture comme quand elle passe au trauers des vitres colorées ? mais alors il faudroit contre leur sentiment, que les Couleurs fussent actuellement dans ces parties Sulphurées auant qu'elles receussent la clarté. De dire aussi qu'elle s'altere par l'Opacité où autre qualité semblable auec laquelle elle se messe; cela ne se peut soustenir pour les raisons que nous auons apportées. Et par consequent toute cette opinion n'a rien de solide & ne peut passer non plus que le subject dont elle traite que pour vne belle apparence & vne agreable illusion. Apres tout quand elle seroit veritable, bien

loin de destruire la nostre elle la confirme en quelque façon: car quand elle fait le partage & la diuersité des Couleurs sur le plus & le moins de pureté qu'a le Soulphre, elle est contrainte d'auouer que cela est cause qu'il est plus ou moins opaque; et par consequent il faut qu'il soit plus ou moins transparent. Car comme il n'y a rien qui puisse diminuer la transparence que l'opacité, rien aussi ne diminuë l'opacité que la transparence : Ainsi qui dit, qu'vne chose est plus ou moins opaque, dit qu'elle a plus ou moins de transparence: Ainsi la Transparence est tousiours le premier subject de la Lumiere & de la Couleur, & selon la mesure où elle se trouue, elle porte auec soy la mesme mesure de Lumiere comme nous auons fait voir.

Quel est le Nombre & l'Ordre des Couleurs.

ARTICLE DIXIESME.

A Pres auoir montré comment la Lumiere s'affoiblit dans les Couleurs Fixes & Apparentes, il ne nous reste plus qu'à marquer la mesure de cet affoiblissement & la portion de Lumiere que chaque Couleur a dans son partage. Mais pour arriuer plus facilement à vne connoissance si difficile, il faut determiner le Nombre & l'Ordre des Couleurs; car le premier nous apprendra combien de parts il y a à faire, & mettra des bornes à vne matiere qui semble infinie; et le second nous fera connoistre en gros les Couleurs qui sont les plus proches ou les plus es-loignées de la Lumiere & par consequent qui en ont vne plus grande ou plus petite portion.

Quant au Nombre des Couleurs, il ne faut pas s'imaginer que nous ayons dessein de marquer toutes leurs disserences particuliers; ce seroit vne entreprise temeraire, puis qu'il n'y a point de termes pour les exprimer, & que la fecondité de la nature à surpassé en celacelle de l'esprit. Car quelque secours que les langues les plus riches nous y peussent donner, à peine toutes ensemble nous en pouroient-elles fournir 150. especes; quoy que dans le seul genre de la Couleur verte il s'y en trouue plus de deux mille, n'y ayant pas vne

GHAPITRE II. 28 (1 157 plante qui n'ait son verd particulier & different de celuy qui se trouue aux autres. Les arts mesmes qui manient les Couleurs semblent auoir disputé auec la nature à qui en feroit vne plus grande varieté, & par dessein. ou par hazard elles en ont formé quantité de nouuelles qui ne luy auoient point esté connuës. De sorte qu'on n'en peut tenir vn compte certain, non seulement par ce que la diuersité en est incomprehensible, mais encore par ce que chaque siecle a eu les siennes propres, & que la pluspart des noms qui leur ont esté imposez autrefois ne respondent pas justement à ceux que nous leur donnons, ny aux choses mesmes qu'ils deuroient signifier, co mag grant stations con a

Le Nombre que nous cherchons ne va donc pas iusques à ces differences particulieres, il est restraint aux generales qui sont comme les sources d'où les autres deriuent ou plustost comme les Chefs soubs lesquels celles qui sont de mesme nature sont mises en ordrein els curpomod un y

Il y en a qui les cherchent dans la Simplicité; et pour ce subject ceux qui croyent re le Nomqu'il n'y a que le Blanc & le Noir qui soient Couleurs.

158 DES COVLEVRS DE L'IRIS, simples & que toutes les autres en sont composées, ne mettent que ces deux genres de Couleurs. Les autres y adjoustent le Rouge & le Bleu qu'ils tiennent aussi simples que les premieres, par ce qu'il n'y a point d'art qui ait encore peû former aucune de ces Couleurs par quelque meslange que ce soit; et que l'on peut faire naistre toutes les autres de ces quatre diuersement messées ensemble, comme on peut juger par l'experience & par le tesmoignage des anciens Escriuains qui asseurent que ces ouurages incomparables d'Apelle, de Zeuxis, de Timante que l'antiquité a tant admirez, n'ont esté faits qu'auec ces quatre Couleurs. Ces raisons peuuent encore mettre le Iaune dans le mesme rang, par ce qu'il ne peut venir d'aucun messange, & que ceux qui disent qu'il se fait du Rouge qui est beaucoup chargé de blanc, se trompent & ne prennent pas garde qu'il n'y a point de Couleur qui puisse naistre de cet assemblage qu'vn Rouge passe qui est tout a fait disserent du Iaune. Car bien qu'il y ait beaucoup de choses Iaunes qui deuiennent Rouges par la coction; cela ne prouue pas que ce ne soit qu'vne mesme espece de Couleur: puis que tou-

CHAPITRE SECOND. 119 tes les Couleurs passent ainsi de l'vne à l'autre; oubien il faudroit que le verd & le Bleu fufsent aussi des especes du Rouge, se trouuant quantité de plantes dont les fueilles deuiennent rouges, de vertes qu'elles estoient; et que du bresil il s'en fait vn Bleu excellent. tout de mesme que l'Indicum se faisoit autrefois de l'escume de la pourpre. Et quant aux quatre Couleurs dont les anciens ont dit que les tableaux d'Apelle ont esté peints & qu'il n'y a pas d'apparence que celuy qui le premier a sceu peindre la lumiere & les esclairs, eust manqué de la Couleur Iaune qui est propre à representer la clarté, & par consequent qu'il l'a tirée du messange des quatre precedentes : c'est vn Equiuoque du mot de Couleurs, qui ne se prend pas là pour les especes de Couleurs, mais pour les matieres qui seruent à peindre que les Latins appellent Pigmenta. De sorte que Ciceron & Pline qui rapportent cette particuliarité, n'ont voulu dire autre chose sinon que de toutes les matieres qu'ils employoient à peindre ils ne se seruoient que de la craye de Melos pour le Blanc, de l'ancre pour le Noir, de la Synope de Pont pour le Rouge; & que de tous les

Sils, qui est vne autre forte de craye, ils ne prenoient que celuy de l'attique, ex albis melino, ex nigris atramento, ex rubris synopide pontica, ex silaceis attico. Or il est certain qu'il y auoit deux sortes de Sil, l'vn qui peignoit en Bleu & l'autre en Iaune; ainsi il n'estoit point de besoin qu'ils messassent leurs couleurs pour faire du Iaune, puis qu'ils en auoient de naturel qui comme dit Pline seruoit à peindre la Lumiere. On peut donc conclure que le Iaune est vne Couleur simple & originelle aussi bien que le Bleu & le Rouge.

Mais la Philosophie ancienne qui a reduit toutes les Couleurs au Nombre de sept, adjoustant aux cinq precedentes le Verd & le Pourpre, n'a point consideré cette simplicité, & hors le Blanc & le Noir elle les a creu toutes composées: et il semble qu'on n'en puisse douter pour ces deux dernieres, puis qu'on void par experience que le Verd se fait du jaune & du bleu messez ensemble, & le Pourpre du bleu & du rouge.

Toutes les Cette derniere opinion est la plus certaine font simples, pour le Nombre des Couleurs, quoy qu'elle suppose

suppose deux choses qui sont absolument fausses: l'vne, que hors le Blanc & le Noir toutes ces Couleurs sont composées; l'autre qu'elles naissent du messange des deux precedens. Car quant à la premiere, il est certain. que toutes les Couleurs sont aussi simples les vnes que les autres si on considere leur origine dans la nature : Et on n'en peut douter pour le Rouge, le Iaune & le Bleu que par aucun artifice on n'a iamais sceu tirer du meslange d'autres Couleurs comme nous auons dit. Le Verd mesme & le Pourpre qui sont celles que l'art sçait composer, se font naturellement sans messange, comme on peut remarquer dans les Iris où il n'y a point de Iaune pour se joindre auec le Bleu quand elles font paroistre le Verd. Et il n'est pas vraysemblable que les principes qui entrent dans la composition des esmeraudes & des amethystes ayent aucune des Couleurs dont on. pretend que le Verd & le Poupre sont formez, puis que par la resolution qu'on en peut faire elles n'y paroissent point; et par consequent le Verd & le Pourpre qu'elles ont ne vient point de ce messange pretendu, mais d'vne source qui est aussi pure & aussi simple

162 DES COVLEVES DE L'IRIS, que peut estre celle du Blanc & du Noir qui sans contredit ne sont point composez. Or si la nature du Verd & du Pourpre dependoit. du messange, ils ne pouroient iamais se former sans luy, non plus que les autres choses qui sont essentiellement composées ne peuuent iamais estre simples. Ainsi ayant tant de preuues & d'experiences que ces Couleurs se font souuent sans messange, il s'ensuit par necessité que leur nature est simple d'ellemesme & que ce n'est que par accident quand l'art ou le hazard les fait naistre de l'assemblage des autres Couleurs. En effect puis que les Couleurs ne sont que des portions de Lumiere, toutes les Couleurs sont naturellement simples puis que toutes les portions de la Lumiere le sont; autrement la Lumiere en toute sa plenitude & en sa plus grande pureté seroit composée si elle auoit des parties qui fussent composées; puis qu'vn tout garde la nature des parties dont il est fait. Aussi qui pouroit alterer la pureté de la Lumiere, puis qu'il n'y a rien qui se puisse messer auec elle? Et il est inutile de dire qu'vne Lumiere se peut messer auec vne autre, & qu'ainsi il y a des Couleurs qui peuuent naistre du messange de

diverses Lumieres: car ces Lumieres messées ensemble s'vnissent & ne font qu'vne simple & vnique Lumiere, quoy qu'elles se puissent separer l'vne de l'autre, qui est vne des merueilles qui se trouuent dans cette diuine qualité. De sorte qu'yne Couleur qui naist de l'assemblage de deux autres n'est point composée non plus que la chaleur qui vient du meslange de deux choses dont l'yne est chaude au cinquiesme degré & l'autre au sixiesme; car ces deux chaleurs confonduës ensemble. n'en font qu'vne simple & s'il y a quelque composition c'est dans la matiere & non passi dans la qualité.

De là, il est aysé à juger en qu'elle erreur on est tombé, quand on a creu que toutes les leurs ne se Couleurs estoient composées du Blanc & du Blanc du Noir; car outre les raisons que nous venons Noir. d'aporter, il n'y a aucune experience qui puisse fauoriser cette opinion, ne s'estant iamais rencontré que l'assemblage de ces deux Couleurs ait fait naistre aucune apparence de Rouge, de Bleu ou d'autre semblable espece. Et il est inutile de nous dire que la Nature mesle plus delicatement & plus subtilement ces

164 DES COVLEVRS DE L'IRIS. Couleurs que l'art ne peut faire, et qu'ainsi elle en fait toutes les autres especes; au lieu que l'artifice n'en sçauroit former que le Gris. Car la Nature ne sçauroit mesler les Couleurs auec plus de penetration & de subtilité que fait la Lumiere quand elle passe à trauers des vitres diuersement colorées; emportant auec soy leurs teintures elle les vnist de telle sorte qu'il n'y a aucune partie imaginable de l'vne qui ne soit penetrée par l'autre; parce qu'il n'y a rien qui resiste à cette vnion & penetration. Mais il n'en est pas ainsi des corps qui ne se peuvent diuiser que iusques à certains atomes qui ne laissent pas d'auoir toutes les dimensions corporelles & qui par consequent ne se peuuent penetrer l'vn l'autre; aussi les Couleurs qu'ils ont ne peuuent iamais s'vnir parfaitement & les yeux nous trompent quand ils nous persuadent le contraire. Or il est certain que si l'on expose au Soleil deux pieces de verre dont l'vne soit de couleur Blanche. & l'autre de couleur Noire, la Lumiere qui passera à trauers, quelque vnion qu'elle en fasse ne produira point d'autre espece de couleur que le Gris, qui approchera plus du Blanc ou du Noir selon que la Lumiere se chargera

dauantage de l'vn ou de l'autre: Et par confequent il n'y a point de messange quelque delicat & parfait qu'on se puisse imaginer, qui ait le pouuoir de faire naistre de ces deux Couleurs aucune des especes que nous auons

marquées.

Tout ce qu'elles peuuent faire c'est de les rendre plus claires ou plus brunes; car en adjoustant au Rouge diuers degrez de Blancheur on le rend plus ou moins clair, tout de! mesme qu'il deuient plus ou moins brun selon les portions de Noir qu'on luy donne. Ainsi font-elles de tout les autres genres de Couleurs, sans que cela puisse en changer l'espece originelle; car quelque portion de Blanc ou de Noir que vous adjoustiez au Rouge, il conserue tousiours l'espece du Rouge, s'il n'est tout a fait etoussé par la grande quantité de Blanc ou de Noir. Mais cela n'arriue pas au meslange des autres Couleurs; puis qu'en mettant du Bleu auec du Rouge il en change l'espece & n'est plus Bleu ny Rouge, mais Violet ou Pourpre comme nous auons dit.

Quoy qu'il en soit, les sept Couleurs pro-X iij

Les Couleurs des modelles de toutes les Couleurs.

166 DES COVLEVES DE L'IRIS, posées a sçauoir le Blanc & le Noir, le Rouge, le Bleu le Iaune, le Verd, & le Pourpre sont les seules que la Lumiere produit quand elle n'est point attachée a la matiere ny meslée auec les corps. Car en toutes les Iris qui nous. paroissent soit naturelles, soit artificielles, il Iris sont les ne se forme point d'autres Couleurs que ces sept-là: et ce qui est tres-remarquable, elles ne se diuersifient point pour le changement. du milieu où elles se font; c'est tousiours vn mesme Verd, vn mesme Rouge quelque different que puisse estre le diaphane par où la Lumiere passe. Ainsi la mesme espece de Verd qui se void dans l'Iris se remarque sur les fils d'araignée, sur les rayes d'argent, sur les poils. & les plumes; et quoy qu'il y ait plusieurs. fortes de Verd, la Lumiere se restraint à vne feule sans iamais la changer. Ce qui nous doit faire croire que ce sont les Couleurs les plus naturelles de toutes, & que s'il y a quelques. proportions qui en fassent la difference, elles sont plus iustes & plus regulieres dans ces sept-là qu'en toutes les autres: puis que la nature qui n'est point empeschée agit tousjours parfaitement, & que la matiere ne luy fert point d'obstacle dans les Couleurs Apparentes comme elle fait dans les Fixes. C'est pourquoy il faut à mon aduis reduire toutes les differences qui se trouuent soubs chacunde ces sept genres de Couleurs à l'espece qui paroist dans les Apparentes, et mettre par exemple toutes les sortes de Verd que nous voyons dans les choses, soubs l'espece que la Lumiere fait dans les Iris; par ce que c'est la source & le modelle de tous les verds de la nature, lesquels ne sont differens de celuy-là que par ce qu'ils sont plus clairs ou plus bruns & ainsi des autres.

Il faut neantmoins observer que quand nous auons asseuré que dans les Iris il ne se forme point d'autres Couleurs que les sept dons nous parlons; nous n'auons pas voulu dire qu'elles se trouuent toutes sept dans chaque Iris; car le sens nous dementiroit qui ne remarque que le Rouge, le Verd & le Pourpre dans l'Iris celeste & dans toutes les autres qui se voyent par restaction. Mais par ce qu'il y a des Iris qui se voyent par refraction & qu'alors cet ordre de Couleurs se change, le Iaune le Rouge & le Bleu prenant souuent la place des trois precedentes: nous auons joint toutes ces apparences en vne seule pro-

position, estant veritable que generalement parlant ces sept Couleurs se forment dans les Iris, quoy que chaque Iris ne les ait pas toutes ensemble.

On peut mesme dire que, qu'encore qu'il n'y ait que le Rouge, le Verd & le Pourpre qui soient distinctement marquez dans l'Arcanciel & dans l'Iris des Triangles, neantmoins entre le Rouge & le Verd, il y a quelques traits de Iaune, comme il y en a quelques-vns de Bleu entre le Verd & le Poupre.

Il est donc constant que les Iris nous sournissent cinq genres de Couleurs. A sçauoir le Rouge, le Iaune, le Verd, le Bleu & le Pourpre. Mais ou prendrons nous le Noir & le Blanc qui ne paroissent en pas vne? cela ne sera pas difficile si on considere que la Lumiere porte sa Blancheur auec elle & que lors qu'elle vient à ses dernieres diminutions, le Noir & les Tenebres luy succedent: car la couleur noire est la derniere portion de la Lumiere & ce qui est au de-là est Tenebreux & sans couleur. Ainsi il n'y a point d'Iris ou la Blancheur & la Noirceur ne se puissent reconnoistre: par ce que la Lumiere s'y trouue

dans sa pureté, auant qu'elle se rompe & se reflechisse pour produire les autres Couleurs; et qu'apres s'estre diminuée par ces mouuemens elle se perd dans les nuées & y fait paroistre la noirceur & l'obscurité. Où il faut remarquer que la Noirceur des tenebres est differente de celle de la Couleur Noire, non seulement par nature, celle-là estant priuatiue & celle-cy positiue & reelle; mais aussi par le sens; car il n'y a point de si grande obscurité qui paroisse si noire que la poix, le charbon & le velours noir. Et la raison en est à mon aduis que la veuë se perd dans les Tenebres & n'est point arrestée & determinée par aucun object, de sorte que le jugement qu'elle en fait est vague sans estre specifié par aucune image: Ioint que les esprits qui se jettent continuellement dans les yeux diminuent par leur clarté quelque peu de cette obscurité; Au lieu que la Couleur Noire portant son Image dans la veuë, elle la determine & se fait apperceuoir telle qu'elle est, nonobstant la lumiere des esprits qui ne corrompent iamais les images. Quoy qu'il en soit ces deux diuerses apparences de Noirceur se discernent facilement dans le Triangle de chrystal; car

170 DES COVLEVES DE L'IRIS, quand on regarde les objects à trauers, le cercle qui borne les Couleurs de son Iris, est d'yn Noir tellement obscur qu'il surpasse toute autre obscurité & respond à la noirceur du charbon & des autres choses les plus noires; par ce que c'est là ou finissent les rayons qui forment vne veritable Couleur; au de-là, ce sont de vrayes tenebres dont la Noirceur n'est pas si forte pour les raisons que nous a-Hons dites.

Couleurs.

Le Nombre des Couleurs ainsi estably, il l'Ordre des reste à voir l'Ordre naturel qu'elles gardent entre-elles, & le voisinage ou l'esloignement qu'elles ont auec la Lumiere. Mais il ne faut pas penser qu'on le puisse tirer daillieurs que de la mesme source dont nous auons tiré leur Nombre. Ie veux dire que l'on ne peut exactement connoistre cet Ordre que dans les Couleurs Apparentes: Par ce que dans les Fixes soit qu'elles soient naturelles ou artificielles, il n'y a point d'espece arrestée & constante qui nous puisse seruir de regle pour donner le rang aux autres. Car comme dans vn mesme genre il y en a de claires & de brunes & qui par consequent sont plus pro-

CHAPITRE II.

ches ou plus esloignées de la Lumiere, si on les compare auec celles d'vn autre genre, elles seront plus ou moins lumineuses que les siennes; ainsi on ne poura determiner par elles la presceance d'vn genre a l'autre. Par exemple si on vouloit regler le rang que le Iaune doit auoir à l'esgard du Bleu, par le Roux & par le Bleu passe, il est certain que le Bleu iroit deuant le laune; dautant que le Bleu passe approche plus de la Lumiere que le Roux: Tout au contraire si on comparoit le Iaune paillé à l'Azur, il faudroit placer le Iaune deuant le Bleu. Qui poura donc regler l'Ordre naturel où il les faut mettre tous deux, puis qu'on ne peut decider laquelle de leurs especes est la premiere & la plus parfaite en son genre? Et c'est de-là qu'est venuë la disficulté qu'il y a à donner au Pourpre le rang qu'il doit auoir entre les Couleurs; car bien que l'on le place ordinairement apres le Bleu, s'il est vray neantmoins qu'il naisse du meslange du Rouge & du Bleu, il faut qu'il soit entre les deux & par consequent il ne sera pas apres le Bleu comme on croit. Mais si l'on sçauoit l'espece naturelle ou consiste la perfection de cette Couleur & celles que l'art

doit employer pour la produire, on ne douteroit plus de l'Ordre qu'elle doit garder. Et il est inutile de dire que les yeux peuuent juger de cette persection; car les jugemens en sont disserens selon l'humeur des personnes, puisque l'on void que les vns ayment les couleurs hautes & les autres les brunes & les obsecures: de sorte qu'il est impossible d'y trouuer vne reigle certaine, & il faut de necessité la chercher dans la nature mesme, lors qu'elle agit auec vnisormité & sans empeschement; ce qui ne se rencontre que dans les Couleurs Apparentes.

La Blancheur est la premiere des Couleurs.

Pour decider donc par elle l'Ordre que nous cherchons, il faut presupposer que le Blanc & le Noir sont les deux extremitez qui enferment toutes les autres Couleurs; et que personne n'a encore douté que la Blancheur ne sust la premiere de toutes comme celle qui participe plus de la Lumiere; non seulement par ce qu'elle est la plus essoignée du Noir qui est dans le voisinage des tenebres, mais encore par ce qu'elle seule esclaire la nuiet, & que la Lumiere mesme n'est autre chose qu'vne blancheur esclatante. Il n'y a donc point

CHAPITRE II.

173 de difficulté pour le rang de ces deux-là, estant vne chose certaine & qui n'a iamais esté contestée que le Blanc y tient la premiere place & le Noir la derniere. Car ie ne m'arreste pas a ceux qui disent que ce ne sont pas des Couleurs, & que c'en sont seulement les extremitez; dautant qu'elles sont visibles & que tout ce qui est visible est Lumiere ou Couleur.

Quant a la seconde place les vns la donnent au Iaune, & les autres au Rouge. Mais l'opinion la plus commune fauorise le Iaune, non seulement par ce que l'Art se sert de cette couleur pour representer la Lumiere, que de loing elle paroist blanche estant mise auprez du Rouge, & que c'est la premiere couleur que la Lumiere prend quand elle se mesle auec les corps les moins opaques comme sont l'air & les vapeurs les plus subtiles : mais encore par cé que dans l'Iris celeste le Rouge est la plus haute des couleurs, qui neantmoins est precedé par le Iaune dans les Iris qui se voyent par Refraction: car en regardant les objects à trauers les triangles on void le Iaune le Rouge & le Bleu. Les autres qui donnent

Y iii

la presceance au Rouge n'ont qu'vne raison pour luy conseruer ce rang, qui est que lorsque l'Arcanciel est composé de quatre couleurs, le Iaune paroist entre le Rouge & le Verd & est par consequent placé apres le Rouge. Mais vne seule observation n'est pas capable de destruire toutes les autres qui prouuent le contraire, & ce ne peut estre qu'vnuincident qui a ses causes particulieres comme nous montrerons cy-apres. De sorte qu'il faut s'en tenir a l'opinion commune qui met le Iaune immediatement apres le Blanc & le Rouge apres le Iaune.

La difficulré est bien plus grande à sçauoir si c'est le Verd ou le Bleu qui doit estre placé en suite; par ce qu'il y a de tres-sortes raisons pour l'vn & pour l'autre. En faueur du Bleu on peut dire premierement, que les choses peintes ou teintes en Bleu paroissent Vertes à la chandelle; et que cela ne peut venir que de la foiblesse de la Lumiere qui oste au Bleu l'esclat qu'il auoit au jour par dessus le Verd; autrement il faudroit plustost que le Verd en s'assoiblissant parust Bleu, si le Bleu est plus obscur que luy. Secondement le Rouelle plus obscur que luy.

ge passe immediatement au Bleu, comme on peut experimenter par la decoction du bresil dont il se fait vn Bleu excellent, par les veines qui paroissent Bleuës, par la rate qui prend facilement cette couleur, de rouge qu'elle estoit. En troissesme lieu par ce qu'en regardant les objects à trauers les triangles, le Rouge est immediatement suiuy par le Bleu. Il y en a mesme qui veulent que le Bleu se forme d'vne Lumiere plus pure que le Rouge, par ce que le bas de la flamme où la vapeur est plus aërée & plus subtile, est Bleu, & le haut ou elle est plus terrestre est rougeastre; par ce que les parties du triangle les plus espaisses produisent le Rouge, & les plus minces le Bleu; par ce que la flamme de l'eau de vie qui est si subtile qu'elle ne brusse point, est toute Bleuë & que celle des charbons des Metaux & autres semblables matieres est Rouge; par ce qu'enfin les parties de l'air qui sont les plus esseuées & par consequent les plus rares & les plus transparentes sont de couleur Bleuë; au lieu que les rayons du Soleil passant au trauers des nuës & des vapeurs qui sont plus grossieres, les peignent de Rouge. Or s'il est vray que les corps les

plus rares & les plus subtils sont les plus transparens, il faut qu'il y ait plus de Lumiere dans le Bleu que dans le Rouge qui demande vn sujet plus grossier & plus espais: Et par consequent il doit estre placé deuant celuicy & à plus forte raison deuant le Verd qui sans

contestation est apres le Rouge.

Nonobstant toutes ces raisons, il faut maintenir le Verd dans le Rang qui luy a esté donné par la Nature laquelle l'a mis justement au milieu de toutes les Couleurs. Car estant la plus agreable de toutes, elle doit auoir la proportion qui cause cet aggreement, & tenir par consequent le milieu entre-elles comme nous montrerons dans l'Article sujuant : or si elle est au milieu, il faut qu'elle ait la quatriesme place & qu'elle precede le Bleu, supposé qu'il n'y ait que sept Couleurs principales. Mais ce n'est pas la seule raison que nous ayons pour luy conseruer cette preseance, il y en a quantité d'autres que l'Art & la Nature nous fournissent. Car si l'on veut consulter les arts qui manient les Couleurs, elles nous apprendront que le Iaune & le Bleu meslez ensemble font naistre toutes les differences les plus remarquables du Verd, ce qui n'a

pas esté ignoré des peintres anciens qui au rapport de Vitruue & de Pline, ne voulant. pas employer la Chrysocolle à cause du grand prix ou elle estoit, messoient le suc de l'herbe Lutea auec l'Indicum, & en formoient vn Verd tres-agreable. Et ce n'est pas feulement dans les Couleurs Fixes & materielles que ce messange produit cette espece de Couleur; il fait la mesme chose dans les Apparentes: car si on expose au Soleil deux pieces de verre teintes de Iaune & de Bleu, la Lumiere passant à trauers les vnit ensemble & les change en Verd: et mesmes en regardant les objects par le triangle, si on en tourne les costez en sorte que l'on joigne ensemble le Iaune & le Bleu, l'on y verra infailliblement le mesme Verd qui paroist dans l'Arcanciel & autres semblables Iris. D'où il faut necessairement conclure que le Verd est entre le Iaune & le Bleu & par consequent qu'il precede le Bleu. Enfin si on considere qu'en regardant les objets à trauers le triangle de chrystal, l'ordre des Couleurs de l'Arcanciel & des autres Iris se trouue changé, & qu'en la place du Rouge qui tient le premier rang en celles-cy, on y void le Iaune qui

est d'vn degré plus haut; on jugera bien que les autres Couleurs doiuent monter a proportion, & que le Bleu prenant la place du Verd, il faut qu'il soit naturellement d'vn degré plus bas que celuy-cy; puis que toutes les Couleurs qui paroissent en ce Phenomene se trouuent esseus au dessus de l'ordre qu'elles gardent dans l'Iris celeste. Toutes ces raisons sont voir que le Verd suit naturellement le Rouge & qu'il a la quatriesme

place dans l'Ordre des Couleurs.

Il reste maintenant à respondre a celles qui la donnent au Bleu. Nous disons donc à la premiere qu'il est vray que les choses bleuës paroissent vertes à la chandelle, mais qu'il ne s'ensuit pas de-là que le Bleu doiue preceder le Verd, non plus que le Iaune ne doit pas estre placé deuant le Blanc par ce que les choses jaunes semblent estre blanches aux slambeaux: c'est vn essect de ces soibles Lumieres qui n'ont pas la vertu de tirer des objects les Images entieres de leurs Couleurs, & qui n'en sont sortir que les parties les plus lumineuses; d'où vient que ces Couleurs paroissent plus hautes qu'elle ne sont en essect. Et pour montrer que cette raison est veritable,

c'est que les flammes qui sont bleuës ne paroissent iamais vertes a quelque clarté que ce soit qu'on les voye; dautant que la Lumiere est si vnie auec la Couleur, qu'elle la represente aux yeux toute entiere & telle qu'elle est. On pouroit neantmoins encore dire que la Lumiere des chandelles estant jaune, jaunist quelque peu les objects & que le Iaune estant vny au Bleu produit le Verd comme nous auons dit. Quant au passage du Rouge au Bleu, il ne conclud rien au des-aduantage du Verd puis que toutes les Couleurs passent souuent d'vn genre à vn autre fort essoigné, voire mesme d'vne extremité à l'autre, sans prendre les Couleurs mitoyennes: le feu change immediatement le Blanc en Noir, l'estomach blanchist les choses rouges, vertes & noires; et le foye rougit le chyle qui est blanc. Enfin qui considerera tous les changemens qui se font dans les Plantes, quelque suite reglée de Couleurs qu'il y ait en plusieurs, verra qu'il y en a beaucoup ou elle ne se fait point, et qu'il y a des fleurs qui de blanches deuiennent bleuës ou pourprées, & des fruits qui de verds deuiennent violets ou noirs, sans prendre les Couleurs qui sont

Zij

entre-deux: Ainsi on ne peut establir l'Ordre naturel des Couleurs par ces mutations. Et si la raison qu'on apporte du passage qui se fait du Rouge au Bleu estoit bonne, il faudroit que le Violet & le Pourpre fussent de-uant le Bleu, puis qu'il y a plus de choses, qui de rouges deuiennent violettes & pourprées, que de rouges qui deuiennent bleuës. Pour ce qui est du rang qu'a le Bleu parmy les Couleurs que l'on void à trauers les triangles nous en auons donné les raisons cy-dessus.

Quant aux Preuues qui pretendent faire voir que le Bleu se forme d'vne Lumiere plus pure que le Rouge, elles sont appuyées sur de faux sondemens. Car le bas de la flamme n'est pas bleu à cause que la vapeur y est plus aërée & plus subtile qu'elle n'est au hault; au contraire elle y est plus grossiere; par ce qu'au moment qu'elle sort de la mesche elle s'esprend & ne donne pas le temps a la chaleur de la purisier. Aussi voyons-nous que quand le seu s'esprend en des matieres fort subtiles & sort seches comme dans la paille, toute la flamme est blanche sans que le bas en soit Bleu, la sumée n'ayant rien de

CHAPITRE SECOND. 181 grossier qui luy puisse donner cette couleur obscure. L'on en peut dire autant de l'Eau de Vie & du Soulphre dont la flamme est toute bleuë; car ces matieres ont des parties tellement inflammables & qui prennent feu si subitement, que les autres sont contraintes de s'allumer auant qu'elles soient dechargées de l'impureté qu'elles ont : et comme dans vne distillation precipitée ce qui est leger & volatil emporte auec soy ce qui est pesant & fixe, aussi ce qu'il y a d'aqueux & de grossier en ces corps-la s'allume auec ce qui est subtil & fait vne flamme qui marque dans sa Couleur, l'impureté dont elle n'a pas eu le temps de se desfaire. Les deux autres raisons qui accompagnent ces premieres sont encore plus foibles : car l'espaisseur des triangles ne fait rien à la production des Couleurs comme nous auons montré; et l'air ne paroist pas bleu à cause de sa pureté, mais à cause de sa profondeur; de mesme que les nuës les plus rares ne font iamais paroistre cette Couleur, mais seulement celles qui sont les plus espaisses & les plus profondes. Ainsi nous pouuons conclure nonobstant toutes ces objections que le Bleu n'a pas vne Lumiere si

Z iij

182 DES COVLEVES DE L'IRIS, pure que le Rouge, qu'il est moins lumineux, qu'il ne peut estre placé deuant luy & par consequent qu'on ne peut inferer de là qu'il doiue preceder le Verd.

Le Bleu estant ainsi descheu de ses pretentions, il semble qu'on ne luy oseroit disputer le cinquiesme rang. Mais il est si malheureux que le Pourpre le luy conteste encore. Premierement par ce que dans l'Iris, le Pourpre suit immediatement le Verd: En second lieu par ce que celuy-cy n'aist ordinairement du Rouge & du Bleu & qu'il faut par consequent qu'il soit entre les deux. Mais ces raisons sont foibles. La premiere par ce que l'Iris que l'on void à trauers le triangle a le Bleu immediatement apres le Rouge; Et comme ces Couleurs sont esleuées d'vn degré plus hault que celles des autres Iris comme nous auons montré, il s'ensuit que le Bleu qui en fait la base est plus hault que le Pourpre qui fait la base des autres. Quant à la seconde, il est vray que le Pourpre se fait artificiellement par le meslange du Rouge & du Bleu, mais il faut que ces Couleurs soient fort brunes; ainsi cela ne conclud

point pour la presceance du Pourpre: Car il n'est pas question s'il y a quelques especes de cette Couleur qui soient plus lumineuses que quelques-vnes du Bleu; mais si l'espece qui est la plus parfaite dans ce genre a plus de Lumiere & va deuant celle qui l'est dans le genre du Bleu; or il est certain que celuy-cy l'emportera sur l'autre pour les raisons que nous venons de tirer des Couleurs que l'on void à trauers les Triangles. Apres cela il n'y a plus de difficulté pour l'ordre de toutes les Couleurs & il demeure pour constant que le Blanc est au premier rang, le Iaune au second, le Rouge au troisiesme, le Verd au quatriesme, le Bleu au cinquiesme, le Pourpre au sixiesme & le Noir au dernier : et que selon cet ordre elles ont plus ou moins de Lumiere. Voyons donc qu'elle est la juste mesure que chacune en a.

Quelle est la Mesure & la Quantité de Lumiere qui se trouve en chaque Couleur.

ARTICLE ONZIESME.

L faut commencer cette profonde & dif-Ificile recherche par vne verité indubitable, a sçauoir que de toutes les qualitez qui seruent d'objects propres aux sens, il n'y a que le Son dont on connoisse les justes mesures. Car on ne connoist point exactement combien il y a de degrez d'amertume dans l'absynthe, ce qu'il y en a d'odeur dans le musc; et quoy qu'en die la Philosophie on ignore le nombre des portions de chaleur qui entrent dans le feu & celles du froid qui sont dans la glace. Elle nous asseure bien que l'estenduë de toutes les premieres qualitez est de huict degrez; mais c'est vn compte qu'elle a fait à plaisir pour soulager l'esprit & pour le determiner en quelque façon dans des choses vagues & incertaines. Aussi la Medecine qui se vante de juger plus exactement de ces matieres n'est pas demeurée d'accord auec elle

pour ce Nombre qu'elle a reduit a quatre, lequel pourtant n'est pas plus certain ny plus

juste que le premier.

Il n'en est pas ainsi des Sons où la Mathematique a esté si exacte qu'il n'y en a pas vn seul qui ait peu eschaper a son calcul; Elle marque non seulement les nombres & les mesures qui en composent les harmonies & les discordances, mais encore elle en fait l'anatomie & les sçait couper jusques à leurs dernieres diuisions. Et cela vient d'vn priuilege particulier qu'a le Son à l'esgard des autres objects des sens, car il y a rapport sensible & manifeste entre luy & la corde qui le produit, vne telle estenduë de corde deuant necessairement produire vn tel Son & vn tel Son demandant vne telle estenduë de corde; c'est pourquoy la corde se pouuant mesurer exactement, elle donne vn moyen infaillible pour mesurer justement le Son.

Mais quoy que les autres qualitez sensibles n'ayent rien de semblable & qu'on ne les puis- qualitez se mesurer par aucune de leurs causes com-sensibles on me celle-cy; il est à croire neantmoins que mesures que les mesmes mesures qui se rencontrent dans leson,

les mesmes

les Sons, se trouuent aussi dans les Couleurs, Odeurs & autres semblables: Et ce dautant plus qu'entre ces qualitez il y en a qui sont agreables & d'autres qui sont des-agreables tout de mesme que dans les Sons. De sorte que si l'agrément & le degoust procedent d'yn mesme principe dans tous les sens, il faut de necessité que les causes qui rendent les Sons agreables & des-agreables à l'oreille, soient les mesmes qui donnent aux autres objects la vertu de plaire ou de deplaire aux autres sens.

La cause de l'agremètest esgale en tous les sens.

Or il n'est pas a mon aduis dissicile de prouuer que l'Aggreement & le Degoust ont vn mesme principe en tous les sens; par ce que ce sont des mouuemens de l'ame, laquelle estant vne dans tous les organes, doit estre touchée d'vne mesme façon de tous les objects sensibles, puis qu'elle sent vne esgale alteration en les receuant; vn mesme essect ne pouuant venir que d'vne mesme cause. Car quoy que la Lumiere fasse dans les yeux vne impression differente de celle que le Son cause dans l'oreille, cette impression fait bien connoistre la nature de l'object, mais elle

ne le rend pas agreable ou des-agreable ; il faut qu'il y en ait vne autre qui se fasse immediatement dans l'ame & qui soit commune à tous les objects des sens pour la raison. que nous auons dite. En effect si les Couleurs & les Sons estoient agreables ou des-agreables par le seul jugement des yeux & de l'oreille, il faudroit qu'ils le fussent esgalement. à tous les hommes & à tous les animaux qui auroient ces organes bien disposez: Cependant vne couleur ou vne harmonie qui aggreera à l'vn ne plaira pas à l'autre. Et c'est vne chose remarquable que nous n'auons aucune experience qui nous puisse persuader que les Bestes prennent plaisir aux Couleurs, aux Sons & aux Odeurs, sinon entant qu'elles seruent à leur nouriture ou autre pareille necessité de la vie. Car on n'a iamais veu de chien qui s'arrestast à sentir vne rose pour le seul plaisir qu'il peut receuoir de son odeur; ny à entendre vn concert de Musique, ou à regarder auec attention la varieté des couleurs qui ont accoustumé de nous plaire: Et neantmoins tous ces objects font vne imprefsion aussi parfaite dans les sens de cet animal qu'elle peut faire aux nostres. Et ceux d'en188 DES COVLEVES DE L'IRIS,

tre-nous qui ne se plaisent pas à de certains accords que d'autres trouuent agreables, les discernent aussi parfaitement que ceux-cy peuuent faire. Mais ce qui leue toute la difficulté qui pouroit rester là dessus, c'est que ceux qui ont mal aux yeux ne laissent pas d'aymer des couleurs qui blessent la veuë en l'estat qu'ils l'ont. Ce ne sont donc pas le sens exterieurs qui jugent de l'Aggrément & du Degoust que ses objects peuvent causer, mais c'est l'ame ou seule, ou iointe auec le temperament des principales parties qui connoist naturellement les choses qui luy sont conformes ou disproportionnées. Aussi toute la Philosophie est demeurée d'accord que l'animal ne connoist pas ce qui luy est agreable ou des-agreable, bon ou mauuais, amy ou ennemy par aucune espece que les sens luy fournissent; mais que cette connoissance luy vient par des especes que l'ame se forme en en elle-mesme & que l'eschole appelle pour ce subject species non sensatas.

Si cela est ainsi, la raison que nous auons apportée conclud infailliblement qu'il y a vn' principe commun dans tous les objects qui les rend agreables ou des-agreables; par ce qu'ils font tous vne esgale impression & que l'ame qui est vne en tous les sens est l'vnique subject où elle se fait. De sorte qu'estant asseurez par l'experience que les Sons qui se suiuent ou qui s'vnissent en certaines proportions sont agreables ou des-agreables, il faut par necessité que les mesmes proportions se trouuent dans les autres qualitez sensibles quand elles plaisent ou qu'elles deplaisent. Et cela estant nous pouuons du moins nous vanter de connoistre exactement les objects des sens soubs ces deux considerations, qui font à peu prez toute la connoissance que nous auons de leurs differences : car comme nous auons dit cy-deuant, nous ne discernons presque les Odeurs que par les douces & les fascheuses, les Sons que par les harmonies & les discordances, les Saueurs que par le sentiment agreable ou des-agreable qu'elles causent: win a qu'illem de molte n 33 , voi :

Mais outre cette raison qui est commune à tous les objects sensibles, il y en a vne propre aux Sons & aux Couleurs, qui ont cela de particulier que la beauté s'y trouue auec la bonté. En quoy la Philosophie ancienne

Aa iii

190 DES COVLEVES DE L'IRIS. & moderne s'est accommodée auec la façon ordinaire de parler de toutes les belles langues; qui disent que la Chaleur, la Saueur, & l'Odeur sont bonnes, mais non pas qu'elles sont belles: quoy que l'vn & l'autre se die des Sons & des Couleurs, puis que l'on dit vne belle & bonne musique, de bonnes & de belles couleurs. Si la Beauté se trouue donc en ces deux qualitez, il faut qu'elles ayent quelque chose de commun qui les rende belles & par confequent agreables; car la Beauté est vne cause d'aggreement aussi bien que la Bonté comme nous auons fait voir aillieurs; de sorte que si les proportions font les belles harmonies comme tout le monde est d'accord, il faut que les mesmes proportions fassent aussi les belles couleurs. Et c'est à mon aduis sur ce' principe qu'Aristote a le premier decouuert la verité que nous establissons icy, & a asseuré qu'il y a des Couleurs qui ont rapport les vnes aux autres en des nombres proportionnez comme de 2. à 3. 65 de 3. à 4. 65° autres semblables, tout de mesme que les Sons; & que les plus belles et les plus agreables sont dans les mesmes proportions que les plus parfaites harmonies, de sorte que comme il y a

lib.desensus Gensili cap.3. fort peu d'harmonies, il se trouve aussi fort peu de Couleurs agreables. Il y a mesme grande apparence que ce sondement qu'a pris Aristote pour rendre raison de la Beauté des Couleurs a seruy à Platon pour faire entrer les harmonies dans la composition de l'ame, & qu'il n'a peu croire que la Beauté qui se trouve en elle, eust vne autre source que celle qui se rencontre dans les Sons, par ce qu'vne mesme forme demande de mesmes principes & qu'vn mesme effect doit auoir des causes semblables.

Quoy qu'il en soit si on veut prendre garde au rapport que les Sons ont les vns auec les autres, on trouuera que les Couleurs, les Saueurs & autres semblables ont entre-elles les mesmes habitudes; et partant que les mesmes proportions qui sont les harmonies & les discordances sont aussi toute la diuersité de ces qualitez-là. En essect elles ont toutes les mesmes extremitez qu'eux, les essoignemens de l'vne à l'autre sont esgaux aux leurs, elles se ioignent ensemble auec la mesme sacilité ou dissiculté, ensin elles touchent les organes des sens auec la mesme suauité ou 192 Des Covleves de l'Iris, auec la mesme dureté que les Sons font l'oreille.

Mais pour entendre cecy il faut remarquer que toutes les qualitez sensibles ont chacune deux extremitez dont les sens ont connoissance; l'yne positiue & reelle qui contient toute la plenitude de l'estre sensible; l'autre priuatiue qui n'en a aucune portion & qui veritablement est vn non-estre. Ainsi dans l'object de la veuë la Lumiere est l'extremité qui contient toute la plenitude de l'estre visible; et les Tenebres font l'autre extremité n'estant rien que la priuation de la Lumiere; tel est le Son vehement & le Silence à l'esgard de louye, telle est l'Acrimonie excessiue & ce qui est sans Saueur à l'esgard du goust, & ainsi des obiects de l'odorat & du toucher. Mais entre ces deux extremitez qui sont en quelque façon insensibles, par ce que l'vne corrompt l'organe du sens par sa violence, & l'autre par ce que c'est vn non-estre qui ne se connoist que par accident; il y en a deux autres qui sont positiues & reelles, auec lesquelles le sens a plus de conformité; l'vne qui approche de la plenitude de l'estre sensible;

193 sensible; l'autre qui est dans le voisinage de la priuation. Tel est le Blanc & le Noir pour la veuë, car le Blanc est proche de la Lumiere, & le Noir des Tenebres: c'est pourquoy on a dit souuent que le Noir estoit la priuation du Blanc, mais on n'a iamais osé dire que le Blanc fut la priuation du Noir; par ce que le Noir est si proche de la priuation, & le Blanc participe tant de l'estre visible, qu'on n'a peu leur donner que des noms conformes à cette disposition. Tel est le Son Graue & l'Aigu à l'esgard de louye; car comme le Blanc contient plus de Lumiere que le Noir, le Graue a plus de la nature du Son que l'Aigu; non seulement par ce qu'il faut. dauantage de temps pour le former; d'où vient qu'il est plus sensible, & que pour cette raison les fautes paroissent plus dans la basse que dans le dessus, la vitesse de celuy-cy les desrobant à la connoissance : mais encore par ce qu'il est plus grand, & plus fort que l'Aigu. Il est plus grand, car il contient l'Aigu, l'Aigu se pouuant faire du Graue, & non pas le Graue de l'Aigu; aussi la corde qui fait la basse estant racourcie sait sonner le dessus, et tout son grave en s'affoiblissant va

194 DES COVLEVES DE L'IRIS, a l'aigu. Il est aussi plus fort ; par ce qu'il est plus grand, & qu'il pousse dauantage d'air; c'est pourquoy les corps qui ont vne plus grande masse ne forment point d'autre son, & les animaux les plus robustes ont la voix plus grosse; comme les petits corps font vn son aigu & les animaux les plus foibles ont la voix gresle. Le Son Graue est donc plus proche de la plenitude du Son, comme l'Aigu l'est du Silence. On en peut dire autant de la Saueur Acre & de l'Insipide, du Chaud & du Froid : car le Chaud & l'Acre sont proches de l'estre & ont dauantage de la qualité sensible: au lieu que le Froid & l'Insipide sont dans le voisinage du non-estre; d'où vient que l'on dit que le Froid est la priuation du Chaud; et que la Saueur Insipide porte le nom de priuation de saueur quoy que ce soit vne Saueur veritable.

Or toutes les differences d'une qualité sensible qui se trouuent entre ces deux Extremitez approchent plus ou moins de l'une ou de l'autre, & ont aussi diuers essoignemens entre-elles, mais celle qui est justement au milieu, est la plus conforme au sens & partant la plus agreable de toutes; par ce que le sens doit estre au milieu des extremitez de son object pour en juger distinctement comme l'experience nous apprend: et c'est la raison pour laquelle l'Octaue, le Verd, la Douceur, & la Chaleur temperée sont les plus agreables, estant toutes au milieu de leurs autres especes comme nous montrerons cy-apres. Mais comme au dessus & au dessous de ce milieu il y en a d'autres qui ont diuerses distances entre-elles; et que ces distances sont les fondemens des proportions & des habitudes qu'elles ont les vnes auec les autres; nous pouuons conclure que toutes les qualitez sensibles ont les mesmes extremitez, les mesmes esloignemens & par consequent les mesmes rapports & les mesmes proportions: de sorte que si nous connoissons exactement les proportions qui sont dans les Sons, nous pouuons aussi connoistre celles des Couleurs, Saueurs &c. & de toutes leurs especes: qui est ce que nous auions à prouuer.

Mais on peut objecter vne chose qui sem- Les proble ruiner toute cette Esgalité de Propor-qui sont tions. Car on pretend que celles qui compo-dans le sent les Harmonies & les Discordances ne se des Sons ne

portions

196 DES COVLEVES DE L'IRIS,

font pas cause des barmonies.

trouuent que dans le mouuement qui accompagne les Sons, & par consequent qu'il est inutile de les chercher dans les autres qualitez sensibles, puis qu'il n'y a point de mouuement qui se joigne auec elles. En effect comme les cordes qui sont esmeuës font dans le bransle qu'elles prennent, des tours & des retours qui se succedent les vns aux autres tout autant de temps que dure leur mouuement; on a obserué que la corde qui sonne le dessus de l'Octaue, fait deux tours & deux retours pendant que la corde de la basse n'en fait qu'vn; et que tout autant de temps que ces cordes sont esmeuës la mesme proportion continue dans tous les batemens qu'elles font; de sorte qu'en vingt batemens du dessus, la basse n'en fait que dix, qui est justement la proportion double dans laquelle on dit que l'Octaue se fait. Il en est de mesme des autres harmonies, car le dessus de la Quinte fait trois batemens tandis que la basse en fait deux qui est la proportion s'esquialtere de 3. à 2. Et le superius de la quarte en fait 4. pendant que la basse en fait 3. qui est la proportion. s'esquitierce de 4. à 3. & ainsi des autres Consonances selon les nombres qui entrent dans

CHAPITRE SECOND. 197 leurs proportions, où le dessus fait tousiours autant de retours que contient le plus grand nombre, & la basse autant qu'en contient le plus petit. Ceux donc qui ont fait ces obseruations auoüent bien que l'estenduë de ces cordes qui font ces harmonies contient les mesmes proportions; et que la corde qui sonne la basse de l'Octaue doit estre deux fois plus longue que celle qui sonne le dessus; que celle de la basse de la Quinte, est vne fois & demie plus longue que l'autre qui sonne le dessus & ainsi des autres. Mais ils disent que cela ne fait rien pour le sens ; par ce que la quantité n'est point actiue & que l'oreille ne discerne point ces mesures : Que c'est plustost le mouuement qui accompagne le Son, ou qui n'est autre que le Son mesme, lequel frappe l'organe & luy fait sentir ces proportions: et que ces proportions sont agreables quand les batemens des cordes s'vnissent auec vniformité, par ce que l'ordre & l'esgalité contentent l'ame, tout de mesme que le desordre & l'Inegalité luy deplaisent. C'est pourquoy tant plus souuent ces batemens s'vnissent tant plus les proportions en sont agreables, d'où vient que l'Octaue est

Bb iij

la plus parfaite de toutes les harmonies, par ce qu'il n'y en a point où les batemens s'vnifsent si souuent, puis qu'en six batemens il y en a trois qui s'vnissent; au lieu que la Quinte ne les vnist que deux fois & la Quarte qu'vne seule fois.

Pour respondre a cette ingenieuse & subtile objection, nous sommes obligez de demeurer d'accord des observations que l'on a faites touchant ces proportions & vnions des batemens des cordes en chaque harmonie: Mais nous nions en mesme temps les conse-

quences que l'on en tire.

Premierement la Proportion des Mouuemens n'est point cause des Harmonies, par ce que diuerses harmonies se font sans que la proportion des mouuemens se change. Car vne corde frappée & sonnée à vuide, outre son premier Son, en fait trois autres dissercns, a sçauoir l'Octaue, la Douziesme & la Quinziesme comme les plus delicates oreilles peu-uent remarquer dans les basses du Luth & de la Viole: Cependant les batemens de la corde gardent tousiours la mesme proportion. On peut mesme adjouster à cette observation, qu'il est fort vray semblable que le pre-

mier resonnement que fait la corde, va à la Quinte; quoy qu'elle ne soit pas sensible pour estre trop proche du premier Son qui l'etouffe. Et la raison en est, que puis qu'il va de l'Octaue à la Douziesme & à la Quinziesme, il semble necessaire qu'il passe aussi du premier Son à la Quinte & puis à l'Octaue; la Douziesme & la Quinziesme estant à l'Octaue dans la mesme proportion que la Quinte & l'Octaue le sont au premier Son. de la corde. Daillieurs n'est-il pas vray-semblable que dez le premier mouuement que souffrent les cordes de la basse & du dessus de l'Octaue, il se fait vne harmonie; cependant les batemens qui doiuent suiure ce premier mouuement ne sont pas encore faits, et par consequent ils ne sont pas encores dans la proportion qu'ils doiuent auoir: ce n'est donc pas cette proportion qui fait l'harmonie, puisque l'harmonie la deuance.

En second lieu s'il n'y auoit que l'ordre & l'vnisormité qui se trouue dans les Proportions du Mouuement qui fussent cause de l'agrément des accords, il faudroit que les Bestes jugeassent de la beauté d'vne Octaue ou d'vne Quinte aussi parfaitement que peu-

uent faire les hommes & qu'elles en fussent esgalement touchées; puis que le mouuement frappe leurs oreilles auec le mesine ordre & auec la mesme vnisormité qu'il fait les nostres.

Il faudroit encore que deux cordes suspenduës lesquelles estant esbranlées auroient les mesmes proportions dans leurs batemens que celles qui font les harmonies, causassent quelque agrément dans l'oreille quoy qu'elles ne sonnassent point; par ce qu'elles agiteroient l'air & que son agitation se communiqueroit à l'oreille auec les mesmes proportions qu'elles gardent. Et qu'on ne dise point que ce n'est pas cette sorte de mouuement qui touche l'ouye; par ce que quelque autre mouuement que ce soit qui forme le Son, il ne se peut faire sentir que par l'agitation. qu'il imprime dans l'air & qu'il communique apres à l'oreille : Et partant s'il a des proportions qui luy soient agreables, celuy dont nous parlons faisant la mesme impression, deuroit causer le mesme effect. Ce n'est donc pas la seule Proportion des Mouuemens qui fait l'Agrément puis que cette proportion se peut trouuer sans luy.

Mais

Mais ce qui decide à mon aduis la difficulté, c'est qu'vn Son lequel en suit vn autre formé long-temps auparauant, paroist harmonieux ou discordant auec celuy-cy, quoy que leurs mouuemens ne s'vnissent point dans l'oreille; le mouuement du premier ayant cessé auant que le second y entre. Et il ne faut pas dire que le mouuement du premier dure encore; car en serrant & arrestant la corde incontinent qu'il est formé, il cesse tout à fait, quoy que le second que l'on fait apres ne laisse pas de faire vn bon ou vn faux accord auec le premier.

Enfin cette vnion frequente des batemens qu'ils mettent pour cause de la perfection des harmonies, quoy qu'elle se rencontre en plusieurs n'est pas neantmoins generalle à toutes. Car la Quinziesme ou la double octave vnist ses batemens à chaque quatriesme coup tout de mesme que la Quarte, qui par consequent deuroit estre aussi parfaite. Et cette mesme Quinziesme qui sans contredit est plus excellente que la Douziesme, en 24. batemens n'en vnist que 6. quoy que la Douziesme en vnist 8. La vingt-deuziesme ou triple octaue

en vingt batemens n'en vnist que deux, & La vingt-neusiesme ou quadruple octaue n'en vnist qu'vn; au lieu que la Quarte en vnist cinq dans le mesme nombre de 20. quoy que ces deux premieres Consonances soient incomparablement plus agreables & plus parfaites que la Quarte. Apres tout il n'y a point d'accord où les mouuemens s'vnissent plus souuent que dans l'vnisson, lequel neantmoins n'est point agreable.

De tout cela il faut necessairement conclure non seulement que les Proportions qui rendent les Sons agreables, ne sont point celles qui se trouuent dans leurs mouuemens, & qu'elles sont dans les Sons mesmes; puis que les Sons en ont d'autres comme nous venons de montrer; et par consequent que le Son est quelque autre chose que le mouuement, chacun d'eux ayant des proprietez differentes. Mais encore que cette vnisormité de proportions qui se rencontrent dans les Sons, dans l'estenduë des cordes qui les causent, & dans leurs mouuemens mesmes, est vne preuue conuaincante, que la nature ayme ces proportions, qu'elle les garde en ses ouurages au-

tant qu'elle peut ; et qu'ainsi il est vray - semblable qu'elle les fait entrer dans toutes les autres qualitez sensibles. Certainement si on confidere que les Sons de la fleute quand on en augmente le souffle, vont d'octaue en octaue sans passer par les tons du milieu; et que la mesme chose se fait dans le Triangle de chrystal ou l'ordre des Couleurs se change quand on regarde à trauers; le Bleu & le Iaune prenant la place du Pourpre & du Rouge & passant ainsi d'vne octaue à l'autre; car le Bleu est au Iaune en proportion double, tout de mesme que le Pourpre l'est au Rouge comme nous dirons cy-apres: Si on considere dif-je cet admirable changement, on verra bien que la Nature fait choix de certaines proportions qui sont les plus justes & les plus conuenables à la perfection ou elle tend.

Le principe que nous auons estably de- portios qui meurant donc veritable à sçauoir que les mes-font les harmes nombres qui mesurent les Sons mesu- les belles rent aussi les autres qualitez sensibles, et par Conleurs. consequent que les Proportions qui font les Harmonies font les Couleurs agreables: il ne nous reste plus qu'à marquer quelles sont les Cc ii

monies fons

DES COVLEVES DE L'IRIS, proportions qui font les Harmonies pour les appliquer aux Couleurs: car par ce moyen nous trouuerons la cause formelle de leurs especes & la quantité de Lumiere qui entre en chacune. Il ne faut pas pourtant attendre que nous allions examiner tous les rapports que les Sons ont les vns auec les autres, ny mesme toutes les Consonances que la musique connoist : car en l'vn le calcul seroit importun & ennuyeux; Et en l'autre il y a des repetitions de Consonances qui n'instruisent point & que l'on peut dire en quelque façon n'estre point naturelles, par ce qu'elles vont au de-là de l'estenduë naturelle de la voix. Nous suiurons donc en cecy les Pythagoriciens comme les premiers & les plus excellens Maistres de la musique, qui ont borné toutes les Harmonies à la Double Octaue; non seulement par ce que c'est la portée natureile de la voix qui ne peut passer au de-là sans estre forcée & sans se rendre aigre & des-agreable: mais encore par ce qu'ils enferment ainsi toutes les Harmonies dans le nombre de Quatre qui est l'abbregé de tous les nombres & qu'ils appellent pour ce subject nombre diuin; car dans l'opinion qu'ils auoient que l'essence des choses estoit dans les nombres. ils croyoient que le nombre qui contient tous les autres, estoit l'Image de la Diuinité qui contient en soy toutes choses : or le nombre de 4. contient tous les autres nombres, parce que toutes ses parties assemblées font le nombre de dix, dont les autres ne sont que

des repetitions.

Voicy donc comment ils trouuoient toutes les harmonies dans le nombre de Quatre. 1. & 2. font la proportion double où est l'Octaue: 2. & 3. font la proportion s'esquialtere d'vne fois & demie où est la Quinte: 3. & 4. font la proportion s'esquitierce d'yne fois & vn tiers où est la Quarte: Et dans ces trois font comprises toutes les harmonies simples. Les Composées sont d'1. à 3. & d'1. à 4. dont la premiere fait la Douziesme qui est composée d'vne octaue & d'vne quinte: l'autre fait la Quinziesme qui est composée de deux octaues. Ausquelles on peut adjouster l'Onziesme composée de l'octaue & de la quarte qui est comme vne repetition de la Quarte, & est dans la proportion de 8. à 3. Ie sçay bien qu'il y a d'autres Consonances qui sont en cette estendué de deux Octaves, comme les Tierces & les Sextes Majeures & Mineures & celles qui en sont composées y adjoustant vne Octaue, à sçauoir les Dixiesmes & Tresiesmes Majeures & Mineures: Et que mesmes il y en a beaucoup qui croyent que la Tierce Majeure est plus parfaite que la Quarte: mais-nous nous arrestons à ce qu'en a determiné toute la Philosophie ancienne qui n'a point reconnu ces accords pour de parfaites harmonies, Et qui a donné sans contredit à la Quarte la presceance sur la Tierce Majeure.

EOctane ou Diapason est donc la plus agreable de toutes les harmonies & est en proportion double comme de 2. à 1. par ce que deux cordes de mesme grosseur & esgalement tenduës, dont l'une est deux fois plus longue que l'autre, font necessairement une Octane; et que les batemens de la plus courte sont doubles à ceux de la plus longue, car celle-cy n'en sera que six, dans le mesme temps que l'autre en sera

douze.

La Quinte ou Diapenté qui est moins agreable que l'Octaue & qui l'est dauantage que la Quarte, est en proportion s'esquialtere ou de 3. à 2. par ce que deux cordes de pareille grosseur & tension feront vne Quinte si l'vne a trois parties esgales, & l'autre en a deux seulement; et la plus courte fera trois batemens pendant que l'autre n'en fera que deux.

La Quarte ou Diatessaron est la moins agreable de toutes & est en proportion s'esquitierce comme de 4. à 3. par ce que deux cordes dont l'vne a quatre parties esgales & l'autre trois, sont vne Quarte; et que la plus petite fait quatre batemens tandis que la plus grande en fait trois. Presupposant tousiours que ces cordes soient de mesme grosseur & esgalement tenduës.

L'On Ziesme ou Diapasotessaron est composée de l'octaue & de la quarte & est en proportion de deux sois & deux tiers comme 8. à 3. car, huict, contient deux sois trois & deux tiers de trois; par ce qu'vne corde qui a huit parties de long & vne autre qui n'en a que trois, feront cette Consonance, & auront la mesme proportion dans leurs batemens. En sorte que pendant que la plus courte en fera huict, la plus longue n'en fera que trois.

208 DES COVLEVES DE L'IRIS,

La DouZiesme ou Diapasopenté est composée d'une octaue & d'une quinte & est en proportion triple de 3. à 1. car deux cordes dont l'une sera trois sois plus longue que l'autre, seront cette Consonance; et durant que la plus courte sera trois batemens, la plus longue n'en sera qu'un.

La Quin iesme ou Distiaspason est composée de deux octaves & est en proportion quadruple de 4. à 1. par ce que deux cordes dont s'vne sera quatre fois plus longue que l'autre feront cette harmonie; et tandis que la plus courte fera quatre batemens l'autre n'en fera qu'vn.

Cela presupposé si ce qu'Aristote a dit est veritable, & si ce que nous auons montré cy-deuant se peut soustenir, que les mesmes proportions qui font les Harmonies sont les belles Couleurs, il faut de necessité que la plus agreable de toutes les Couleurs soit en proportion double, puis que la plus agreable de toutes les Consonances est dans la mesme proportion. Or par le jugement des yeux &

par le consentement general de tous les peu-

ples, le Verd est la plus agreable de toutes les Couleurs,

Couleurs, & par consequent il est en proportion double comme l'Octaue entre les harmonies. Mais quand on voudroit contester cette prerogatiue à la Couleur Verte & qu'on recuseroit de si fidelles tesmoins; la raison. toute seule nous pouroit persuader les mesmes veritez, & nous apprendroit qu'estant au milieu de toutes les Couleurs comme nous auons montré cy-deuant & comme la Nature nous le montre elle-mesme dans les Iris; il faut non seulement qu'elle soit la plus agreable, par ce que le milieu est plus conforme au sens; mais encore qu'elle soit dans la proportion double à l'esgard de ses extremitez. Car supposé que l'estenduë de la Lumiere dans toutes les Couleurs soit de 24. degrez, le Verd pour estre au milieu doit estre au douziesme lequel auec le vingt-quatriesme, où seroit la plenitude de cette Lumiere, est en proportion double. Et quand on le voudroit composer du Blanc & du Noir, il faudroit encore pour garder sa place, qu'il eust 12. degrez de l'vn & 12. de l'autre, & ainsi en comparaison de ses principes qui deuroient estre au 24. il séroit tousiours dans la mesme proportion. Cela se peut encore

confirmer par le triangle de chrystal, où le rayon qui forme le Verd, en se restechissant d'une face à l'autre est deux sois interieur & vne sois exterieur à l'esgard de celuy qui fait le Rouge; et deux sois exterieur & vne sois interieur à l'esgard du Pourpre comme nous ferons voir plus amplement cy-apres. Et cela estant ainsi on ne peut douter que la proportion double ne se trouue dans le Verd.

Si la proportion de cette Couleur est bien establie, il sera facile apres de trouuer celles des autres Couleurs. Car comme il n'y a que deux harmonies au dedans de l'Octaue à sçauoir la Quarte & la Quinte; il faut sur le principe que nous auons posé que le Iaune & le Rouge qui sont les seules Couleurs qui se trouuent entre le Blanc & le Verd, & s'il est permis de le dire qui sont au dedans de l'Octaue des Couleurs, respondent à la Quarte & à la Quinte; et par consequent qu'elles ayent les mesmes proportions qu'ont ces deux Consonances: de sorte que la Quinte estant plus agreable que la Quarte, il faut que celle de ces deux Couleurs qui est la plus agreable soit dans la proportion s'es-

CHAPITRE SECOND. quialtere où est la Quinte, à sçauoir de 3. à 2. où d'vne fois & demie. Or comme le Rouge est vne plus parfaite Couleur que le laune & par le jugement des yeux ausquels elle est plus conforme par ce qu'elle approche plus du milieu; et par celuy de la Nature qui l'employe tousiours dans l'Iris & non pas le Iaune; il faut que ce soit elle qui responde à la Quinte, & qui soit par consequent en proportion s'esquialtere. De sorte qu'en presupposant tousiours l'estenduë de la Lumiere dans les Couleurs estre de 24. degrez, le Rouge en aura 16. lesquels comparez auec 24. font la proportion sufdite, car 24. contient vne fois 16. & la moitié de 16. qui est la mesme que 3. à 2.

Et par la mesme raison ne se trouuant point de nombre apres celuy-cy qui puisse former la proportion s'esquitierce où est la Quarte, que le nombre de 18. en comparaison de 24. le *Iaune* qui doit respondre à la Quarte doit auoir 18. degrez de Lumiere, lesquels à l'esgard de 24. font la proportion susque 24. contient vne sois 18. & le tiers de 18. qui est comme 4. à 3.

Ddij

Au de-là du Verd il y a trois Couleurs, le Bleu, le Pourpre, & le Noir, comme au de-là de l'Octaue il y a trois harmonies l'Onziesme, la Douziesme & la Quinziesme qui sont des repetitions des consonances simples comme les appellent les maistres de la Musique. De sorte que le Bles estant plus proche de la Lumiere que le Pourpre comme nous auons montré, il faut que dans l'estenduë des Couleurs que nous auons marquée, il ait 9. degrez de Lumiere. lesquels comparez à 24. font la proportion. de 8. à 3. ou de deux fois & deux tiers; car 24. contient deux fois 9. & deux tiers de 9. a sçauoir 6. qui est la mesme proportion. où se trouue l'Onziesme entre les harmonies. Et par consequent le Pourpre respondra à la Douziesme qui est en proportion. triple & aura 8. degrez de Lumiere lesquels a l'esgard de 24. sont dans la mesme proportion.

Enfin le Noir fera auec le Blanc vne Quinziesme ou double octaue, laquelle comme elle fait dans les sons toute l'estendue naturelle de la voix, la doit faire aussi dans les Couleurs qui sont conformes au sens; ainsi le Noir sera dans le nombre de 6. qui en comparaison de 24. est en proportion quadruple comme la double octaue, quatre sois 6. faisant 24.

Que si l'on veut reduire ces nombres à de plus petits & qu'au lieu de mettre le Blanc soubs 24. on le place soubs 4. en sorte qu'il ait quatre degrez de Lumiere; le Verd en aura 2. qui en comparaison de 4. fait la proportion double. Le Rouge en aura 2-qui est auec 4. en proportion s'esquialtere; par ce que 4. contient douze tiers & 2- n'en a que huit. Le laune en aura 3. qui comparé auec 4. fait la proportion s'esquitierce, par ce que 4. contient vne fois 3. & le tiers de 3. Le Bleu en. aura 1½ qui fait la proportion de 8. à 3. car dans 4. il y a huict moitiez & dans 1 il n'y en a que trois. Le Pourpre aura if qui fait la proportion triple; dautant que 4. contient douze tiers & celuy-cy quatre. Enfin le Noir n'aura qu'vn degré de Lumiere qui auec le Blanc fait la proportion quadruple. Mais tout cela paroistra mieux dans la figure suiuante

Dd iij


DES COVLEVES DE L'IRIS, où il faut s'imaginer premierement Que toutes les lignes sont autant de cordes d'égale grosseur & tension, dont la premiere a 24. parties, la seconde 18. la troissesseme 16. la quatriesme 12. la cinquiesme 9. la sixiesme 8. la septiesme 6. Que la premiere & la seconde estant touchées ensemble ou l'vne apres l'autre font la Quarte, la troissesme & la premiere font la Quinte, la quatriesme & la premiere font l'Octaue, la cinquiesme & la premiere font l'Octaue, la sixiesme & la premiere font l'Onziesme, la sixiesme & la premiere font la Douziesme, la septiesme & la premiere font la Douziesme de la premiere font la Douziesme, la septiesme & la premiere font la Douziesme de la premiere de la premiere de la premiere font la Douziesme de la premiere de la

En second lieu que chacune de ces lignes represente encore l'estenduë de la Lumiere dans les Couleurs; que la premiere qui est le Blanc en a 24. degrez, la seconde qui est le Iaune en a 18. la troissessme qui est le Rouge en a 16. la quatriesme qui est le Verd en a 12. la cinquiesme qui est le Bleu en a 9. la sixiesme qui est le Pourpre en a 8. & la septiesme où est le Noir en a 6. Et par consequent que le Iaune est auec le Blanc en proportion s'esquitierce comme la Quarte; le Rouge en proportion s'esquialtere comme la Quinte; le Verd en proportion double com-


me l'Octave; le Bleu en proportion de deux fois deux tiers comme l'Onziesme; le Pourpre en proportion triple comme la Douziesme; le Noir en proportion quadruple comme la Quinziesme ou double octaue.

La seconde figure montre que cela se peut reduire au nombre de 4. ainsi le Blanc aura 4. degrez de Lumiere, le Iaune 3. le Rouge 2-; le Verd 2. le Bleu 1- le Pourpre 1- le Noir. 1.

Systeme des Couleurs et des Harmonies IFigure



2 Figure



216 DES COVLEVES DE L'IRIS,

D'où vient l'excellence de quelques Couleurs sur les autres.

Et ce rapport de Couleurs auec les Harmonies est si juste, que par son moyen on connoist l'excellence que les Couleurs ont l'yne sur l'autre, & la conuenance qu'elles ont ensemble. Car le Iaune tout proche qu'il est de la Lumiere est la moins agreable de toutes les couleurs par ce qu'elle respond à la Quarte qui est la moins parfaite de toutes les harmonies: au contraire le Pourpre tout brun & obscur qu'il est passe pour la plus belle couleur apres le Verd & le Rouge, par ce que la Douziesme qui est dans la mesme proportion est la plus excellente de toutes les harmonies apres l'Octaue & la Quinte. Le Rouge est plus beau que le Bleu par ce qu'il est dans la proportion de la Quinte & celuy-cy dans celle de l'Onziesme qui est vne moins agreable consonance. A quoy on peut adjouster que le Bleu & le Pourpre, quoy qu'ils soient aussi simples que les autres comme nous auons montré, ont neantmoins quelque apparence de composition, & l'œil remarque quelque chose de Verd dans le Bleu & quelque chose du Rouge dans le Pourpre, tout de mesme que l'Onziesme qui respond au Bleu contient l'Octaue & la Quarte, & la Douziesme qui respond au Pourpre contient l'Octaue & la Quinte.

Mais la justesse de ces rapports paroist encore plus manifestement dans la Conuenance & Disconuenance que les Couleurs ont ensemble : car comme il y en a qui ne peuuent estre posées auprés des autres sans blesser la veuë & d'autres qui s'accommodent bien. auec elles, on void la cause de cette diuersité dans les proportions qu'elles ont communes auec les Sons. Mais auant que de venir au detail de ces choses il faut se ressouuenir; Que la plus agreable des harmonies est l'Octaue; puis la Double octaue; en apres la Quinte; et puis la Douziesme, en suitte la Quarte; et ensin l'Onziesme qui est la moins agreable de toutes. Cela supposé le Blanc, le Verd & le Noir s'adjustent bien auec toutes les Couleurs ne faifant aucune dissonance auec elles comme il s'en rencontre aux 4. autres. Mais c'est adjustement est plus ou moins parfait selon la nature des Consonances qu'ils font. Ainsi le Blanc s'accommode parfaitement auec le Verd par ce qu'il fait vne octaue auec luy; et auec le Noir par ce qu'ils font ensemble vne double octaue; en suite auec le Rouge par ce qu'ils font vne quinte, & auec le Pourpre par ce qu'ils font vne douziesme; et moins bien auec le Iaune par ce que c'est vne quarte, & auec le Bleu par ce que c'est vne onziesme.

Le *Iaune* fait dissonance auec le Pourpre & auec le Rouge: mais auec le Bleu il fait vne octaue; auec le Verd vne quinte, auec le Noir vne douziesme, & auec le Blanc vne quarte.


Le Rouge fait dissonance auec le Bleu & auec le Iaune; vne octaue auec le Pourpre, vne quinte auec le Bleu; vne quarte auec le Verd & vne onziesme auec le Noir.

Le Verd ne fait aucune dissonance, mais il fait octaue auec le Noir & auec le Blanc; vne quinte auec le Iaune & auec le Pourpre, & vne quarte auec le Rouge & auec le Bleu.

Le Bleu fait dissonance auec le Pourpre & auec le Rouge; vne octaue auec le Iaune, vne quinte auec le Noir, vne quarte auec le Verd, & vne onziesme auec le Blanc.

Le Pourpre fait discordance auec le Iaune & auec le Bleu; octaue auec le Rouge; quinte auec le Verd; douziesme auec le Blanc & quarte auec le Noir.

Le Noir s'adjuste auec toutes les Couleurs come le Blanc & fait les mesmes proportions:



220 DES COVLEVES DE L'IRIS,

Il ne reste plus que deux choses qui peuuent faire difficulté sur ces rapports que les Couleurs ont auec les Harmonies. La Premiere, Que les Sons ne font point de Consonance s'ils ne sont vnis auec d'autres ou s'ils ne les suiuent immediatement : car vne basse ne peut faire aucune harmonie s'il n'y a vn dessus ou quelque autre partie qui s'vnisse auec elle ou qui la suiue : cependant vne Couleur ne laisse pas d'estre agreable quoy qu'elle soit toute seule & qu'il n'y en ait aucune auec laquelle les yeux la puissent comparer. Mais il est facile de leuer ce doute si on prend garde que les Couleurs ne se peuueut voir sans la Lumiere, & par consequent que la Lumiere est tousiours presente aux Couleurs & aux yeux qui les apperçoiuent; c'est la base ou plustost c'est la basse qui soustient toute l'harmonie des Couleurs; et les premieres Consonances qu'elles font, c'est par le rapport & la proportion qu'elles ont auec elle. Mais quoy ? dira-t'on, c'est auec la Blancheur & non pas auec la Lumiere que nous auons comparé les Couleurs & qu'elles ont ces rapports & ces proportions que nous auons marquées. Il est vray, mais la Lumiere

est essentiellement blanche & les yeux ne la peuuent voir que soubs l'apparence de cette Couleur. Aussi à bien parler, la Lumiere n'est qu'vne blancheur esclatante, & quand vne grande distance a fait perdre l'esclat à la Lumiere des corps lumineux, ils paroissent blancs à nos yeux; de sorte qu'en comparant les Couleurs auec la Blancheur, c'est les comparer auec la Lumiere.

La seconde chose qui peut faire quelque doute c'est que nous auons dit, que l'estenduë de la Lumiere dans les Couleurs est depuis 24. iusques à 6. Et que la Blancheur possede cette plenitude de degrez. Car ce nombre de 24. est imaginaire & nous fait tomber dans le mesme inconuenient que nous auons remarqué dans celuy que les Philosophes & les Medecins ont donné aux qualitez sensibles; n'y ayant pas plus de raison que leur estenduë soit de 24. que de 8. ou de 4. puisque tous ces nombres ne peuuent estre employez que pour soulager l'esprit, & qu'ils ne font point de compte certain dans les degrez des qualitez sensibles. Nous confessons tout cela; mais nous disons aussi que ces Ee iii

222 DES COVLEVRS DE L'IRIS. nombres tout incertains qu'ils sont, contiennent des raisons Geometriques qui sont certaines & constantes; et lesquelles la Nature qui comme dit Platon fait tout par Geometrie, garde regulierement dans ses ouurages; de sorte que le Verd ne contient pas precisement 12. degrez de la Lumiere qui est dans le Blanc, ny le Rouge 16. ny le Bleu 9. ny le Pourpre 8. Mais il est vray de dire que le Blanc a precisement deux fois autant de Lumiere que le Verd, qu'il en a vne fois & vn tiers plus que le Iaune, vne fois & demie plus que le Rouge, qu'il en a deux fois & deux tiers plus que le Bleu, trois fois plus que le Pourpre & quatre fois plus que le Noir. Et il n'importe quel nobre on employe pour marquer ces mesures pourueu qu'il contienne toutes ces proportions. Et c'est-là où la Philosophie & la Medecine se sont abusées. n'ayant point consideré ces proportions dans. les nombres qu'elles ont mis en auant.

Que si apres cela on nous reproche de ne nous estre pas acquitez de la promesse que nous auons faite de marquer la Quantité de Lumiere qui entre dans chaque Couleur, par-

ce que ce n'est rien de dire que le Verd a la moitié de la Lumiere qui est dans le Blanc, si on ne sçait la proportion que la Blancheur (qui n'est qu'vne Lumiere affoiblie) a auec la Lumiere toute pure; car si elle estoit connue on pouroit dire absolument que le Verd ou vne autre couleur auroit telle ou telle portion de Lumiere; mais estant ignorée comme elle est, elle nous laisse dans l'incertitude des veritez que nous auons promis de decouurir. He sol tall talog o

Nous n'auons rien à opposer a cette instance, & nous auouons franchement que nous sommes encore debiteurs de la meilleure partie de ce que nous auions creu au commencement de ce discours pouvoir donner au Lecteur. Mais tousiours, nous auons payé tout autant que la Matematique toute exacte qu'elle est a fait pour les Sons : car comme elle s'est reglée à la portée naturelle de la voix. elle prend le graue le plus bas qui soit en cette estenduë & le compare auec les Sons qui sont au dessus; mais elle ne dit point combien il y a de degrez de Son dans cette basse, n'y qu'elle proportion elle a auec toute la plenitude du Son. Ainsi nous auons conside224 DES COVLEVES DE L'IRIS, ré l'Estre Visible dans l'estenduë qui est naturelle & proportionnée à la veuë, laquelle ne peut juger exactement de la Lumiere & des Tenebres qui sont les dernieres extremitez de son object comme nous auons montré cy-defsus, mais seulement de celles qui sont dans les bornes de sa capacité naturelle, sçauoir est le Blanc & le Noir. De sorte que la Blancheur qui est aux yeux ce que le Son le plus graue de la voix naturelle est à l'oreille, a esté le centre ou le point sur lequel nous auons pris toutes les mesures & les proportions qui se trouueut dans les Couleurs, tout de mesme que ce premier Son l'a esté pour les autres: mais nous n'oserions faire dauantage que la plus subtile de toutes les sciences, & nous deuons arrester comme elle nostre esprit aux bornes que la Nature a données au sens.

Que s'il estoit permis de passer outre, & si l'on pouvoit sans hazard de s'aueùgler, porter le compas & la regle iusques à la source de la Lumiere: voicy à mon aduis ce que l'on en pouroit dire.

Des Con. leurs lumimeuses.

Puis que toutes les Couleurs sont renfermées

CHAPITRE SECOND. 225 mées entre deux octaues & que du Blanc au Noir il y a vne proportion quadruple, il faut que la mesme estenduë se trouue dans la Lumiere qui est au de-là de la Blancheur:par ce qu'il y a autant de diuersitez de Lumiere iusques à la Blancheur qu'il y en a de la Blancheur iusques au Noir: Et par consequent il faut que les mesmes proportions qui font ces dernieres diuersitez fassent aussi les premieres; et que toutes celles qui sont dans l'estenduë des Couleurs se trouuent dans l'estenduë de la Lumiere. Or qu'il y ait autant de diuersitez de Lumiere iusques à la Blancheur qu'il y en a depuis la Blancheur iusques au Noir; c'est vne chose dont on ne peut douter, si l'on considere que ce qui fait la difference de la Lumiere d'auec la Couleur, c'est l'Esclat & la Clarté: car la plus exquise Blancheur n'est differente de la plus pure Lumiere que par ce que celle-cy est brillante & esclatante & que la Blancheur ne l'est pas : C'est pourquoy quand l'essoignement a fait perdre l'esclat à la Souueraine Lumiere, elle paroist blanche à nos yeux comme nous remarquons dans les estoilles les plus reculées & dans la voye de laict: De sorte que se trouuant autant de Couleurs

226 DES COVLEVES DE L'IRIS;

de dire qu'il y en a sans esclat, il est vray de dire qu'il y a autant de diuersitez de Lumiere iusques à la Blancheur, qu'il y en a de la Blancheur iusques au Noir: par ce que ces Couleurs estant lumineuses, elles sont dans l'ordre & dans l'estendue de la Lumiere, & ne peuuent estre mises au rang des Couleurs ordinaires, puis qu'elles ont plus de Lumiere qu'elles & que toutes les Couleurs ne sont

que des portions de Lumiere.

Le sens nous apprenant donc qu'outre la Lumiere la plus pure qui a cette apparence de Blancheur esclatante telle qu'elle se void dans le Soleil, il y en a encore de Iaune, de Rouge, de Verte, de Bleuë & de Pourprée: Car sans parler de la Couleur des astres, il y a des flammes Iaunes, Rouges & Bleuës; les feux des diamans & des goutes de rosée exposées au Soleil portent auec eux le Rouge, le Verd & le Pourpre; et quand on se met. au lieu où les verres pleins d'eau & les triangles jettent leur Iris, on en void toutes les Couleurs brillantes & lumineuses que les yeux ont peine à supporter. Estant disse asseurez par l'experience de la verité de ces choses, il faut necessairement confesser que toutes les

especes de Couleur qui se trouuent entre le Blanc & le Noir, se trouuent aussi entre la Souueraine Lumiere & la Blancheur; que les mesmes rapports que celles-là ont auec le Blanc, celles-cy les ont auec cette premiere. Lumiere; et par consequent qu'elles sont dans les mesmes proportions que les autres.

De sorte qu'entre le Verd lumineux & la supreme Lumiere, il y a proportion double comme entre le Verd ordinaire & le Blanc. Que le laune esclatant est auec elle en proportion s'esquitierce; le Rouge esclatant en proportion s'esquialtere; le Bleu esclatant en proportion de deux fois deux tiers; le Pourpre esclatant en proportion triple, & le Blanc en proportion quadruple. De sorte qu'il y aura. de la Lumiere Souueraine jusques au Blanc vne Double Octaue, de mesme que du Blanc au Noir; et par consequent toute l'estenduë de la Lumiere considerée en soy, & non à l'esgard du sens, contiendra quatre Octaues qui sont en proportion de 16. à 1. Ainsi la Lumiere Souueraine sera seize fois plus lumineuse que le Noir, & le Noir n'aura qu'vn degré des 16. qu'elle a ; Elle sera 8. fois plus lumineuse que le Verd & par consequent le

Ff ij

228 DES COVLEVES DE L'IRIS,

Verd en aura deux degrez; elle sera quatre fois plus lumineuse que le Blanc, et partant le Blanc en aura 4. degrez; elle sera deux sois plus lumineuse que le Verd esclatant qui aura par consequent 8. degrez de 16. qu'elle possede.

Et certainement le nombre de Seize suffit pour representer ces proportions; mais par ce qu'il n'a pas assez de nombres entiers pour designer les autres Couleurs; et que les proportions qui sont en des nombres rompus ne sont pas si aisées à remarquer; il en faut trouuer vn plus grand, dont les extremitez soient dans la mesme proportion de 16. à. 1. Et qui fasse voir par des nombres entiers tous les rapports que les Couleurs ont ensemble.

Prenant donc le nombre de 6. qui est le plus petit qui puisse seruir à cet vsage, & 96. qui est seize fois plus grand: il faudra mettre pour les Couleurs Esclatantes le *Iaune* soubs 72. qui est auec 96. en proportion s'esquitierce, d'vne fois & vn tiers. Le *Rouge* soubs 64. qui est en proportion s'esquialtere, d'vne fois & demie. Le *Verd* soubs 48. qui est en proportion double. Le *Bleu* soubs 36. qui est de 8, à 3, ou deux sois & deux tiers. Le *Pour*-

pre soubs 32. qui est en proportion triple.

Et pour les Couleurs qui sont sans esclat; Le Blanc sera soubs 24. qui est en proportion quadruple auec 96. comme 4. à 1. Le Iaune soubs 18. qui est en proportion de 16. à 3. ou de cinq sois & vn tiers. Le Rouge soubs 16. qui est en proportion sextuple ou de 6. à 1. Le Verd soubs 12. qui est en proportion octuple ou de 8. à 1. Le Bleu soubs 9. qui est en proportion de 32. à 3. ou de dix sois & deux tiers. Le Pourpre soubs 8. qui est en proportion duodecuple ou de 12. à 1. Le Noir soubs 6. qui est auec 96. en proportion sexdecuple ou de 16. à 1.

Ainsi toute l'estenduë de la Lumiere sera de seize portions dont le nombre de 6. où est le Noir, sera la derniere, & le nombre de 96. où est la Souueraine Lumiere les contien-

dra toutes.

Ainsi toutes les Couleurs lumineuses respondront aux autres dans la mesme proportion dans laquelle la Souueraine Lumiere respond au Blanc, qui est la proportion quadruple ou de deux octaues : car 96. est à 24. comme 4. à 1; et 72. où est le Iaune esclatant est quadruple à 18. où est le Iaune ordinaire; 64. où

230 DES COVLEVRS DE L'IRIS, est le Rouge esclatant est quadruple a 16. où est le Rouge ordinaire & ainsi de 48. à 12. de 36. à 9. de 32. à 8.

Et cette proportion est si exacte qu'elle fait connoistre la raison pour laquelle les Couleurs Esclatantes ont la mesme apparence qui se void aux autres, & n'en sont differentes que par l'esclat & la clarté qu'elles ont qui manque à celles-cy: Car le Verd lumineux a la mesme Verdeur que le Verd ordinaire & n'a rien dauantage que l'esclat & la clarté que l'autre n'a point. Or cela vient de la nature des Octaves redoublées qui au jugement de l'ouye augmentent bien la distance & l'interualle des Sons, mais ne changent point l'espece de l'harmonie : car vne Octaue jointe auec vne autre, fait tousiours vne Octaue & vne Consonance: ce qui n'arriue point aux autres Harmonies; car deux Quintes ne composent pas vne double quinte qui soit harmonique, mais vne Neufiesme qui est vne dissonance; comme deux Quartes font vne Septiesme qui est des-agreable. S'il est donc vray que les Couleurs ayent rapport auec les Harmonies, il faut de necessité que les Couleurs qui sont

en proportion quadruple les vnes aux autres, c'est à dire qui font ensemble vne double Octaue, ne souffrent aucun changement dans l'espece de Couleur, mais seulement dans la distance & dans l'esloignement, les vnes estant plus esloignées de la Souueraine Lumiere que les autres. Ainsi le Verd ordinaire est plus reculé d'elle que le Verd esclatant, mais ils ont tous deux la mesme espece de Couleur, ayant tous deux la mesme apparence de Verd; parce qu'ils sont dans la proportion d'vne double Octaue. Ce que l'on peut dire des autres Couleurs comme on verra dans les figures suiuantes. Dans la premiere desquels toute l'estenduë de la Lumiere est exprimée par des nombres entiers qui commencent à 96. & finissent à 6. Dans la seconde par celuy de 16. qui finit à 1. l'vne & l'autre contenant les mesmes proportions : car la proportion qu'il y a entre 96. & 6. est la mesime qui se trouue entre 16. & 1. Et celle qui est entre 96. & 72. est esgale à celle de 16. à 12. & ainsi du reste. Or comme ces proportions font toutes les differences de la Lumiere & des Couleurs, il n'importe en quel nombre on les prenne comme nous auons dit: Neantmoins le plus petit

232 DES COVLEVRS DE L'IRIS, est plus methodique, par ce qu'il embarasse moins la memoire & qu'il approche plus du calcul des Escholes.

Système de la Lumière et des Harmonies Figure'i





Figure ii



Sur ces

Sur ces fondemens nous pouuons maintenant satisfaire exactement à ce que nous auons promis touchant la Quantité de Lumiere qui entre dans les Couleurs; & dire, Que la Lumiere Souueraine est seize fois plus lumineuse que le Noir.

12. fois plus que le Pourpre.

10. fois & deux tiers plus que le Bleu.

8. fois plus que le Verd.

6. fois plus que le Rouge.

5. fois & vn tiers plus que le Iaune.

4. fois plus que le Blanc.

3. fois plus que le Pourpre lumineux.

2. fois & deux tiers plus que le Bleu lumineux.

2. fois plus que le Verd lumineux.

1. fois & demie plus que le Rouge lumineux.

I. fois & vntiers plus que le Iaune lumineux.

D'où il s'ensuit, que puisque la lumiere Souueraine est seize sois plus lumineuse que le Noir, le Noir en fait la seiziesme partie, & partant qu'il a vn degré des 16. qui sont dans la lumiere Souueraine. Que puis qu'elle est douze sois plus lumineuse que le Pourpre, le Pourpre en faict aussi la douziesme partie, & par consequent qu'il a vn degré & vn tiers de lumiere, qui est

234 DES COVLEVES DE L'IRIS,
iustement la douziesme partie de 16. Et par la
mesme raison que
Le Bleu en a 1 & demy.
Le Verd en a 2
Le Rouge en a 2 & deux tiers.
Le Iaune en a 3
Le Blanc en a 4
Le Pourpre lumineux en a 5 & vn tiers.
Le Bleu lumineux en a 6
Le Verd lumineux en a 8
3
Le Iaune lumineux en a 12.
Et pour mettre tout cela en son Ordre naturel.
La lumiere Souueraine a 16. degrez,
Le Iaune lumineux en a 12.
Le Rougelumineux en a . 10 -
Le Verd lumineux en a . 8.
Le Bleu lumineux ena 6.
Le Pourprelumineux en a 5;
Le Blanc en a 4.
Le Iaune en a 3.
Le Rouge en a 2 =
Le Verd en a 2.
Le Bleu en a 1 -
Le Pourpre en a 1 =;
Le Noir ena

Pourquoy certaines Proportions rendent les Sons & les Couleurs agreables.

ARTICLE DOVZIESME.

E seroit là tout ce que nous aurions à dire de la nature des Couleurs, s'il ne restoit vne difficulté qui naistra sans doute dans l'esprit du Lecteur & dont il voudra estre esclaircy: A sçauoir pourquoy certaines Proportions font de plus douces Harmonies & de plus belles Couleurs que les autres; et quelle raison il y peut auoir pour laquelle la Proportion Double rende les objects plus agreables que la Sesquialtere ou la Sesquitierce, Car bien que nostre dessein nous peust dispenser de cette profonde recherche, & qu'il ne nous demande pas dauantage que l'experience, qui nous apprend que la Proportion Double fait la plus agreable de toutes les Harmonies, pour conclure que la plus agreable de toutes les Couleurs doit estre dans la mesme proportion. Neantmoins par ce que cela est digne de la curiosité de tous ceux qui

Gg ij

s'appliquent à la contemplation des merueilles de la Nature & que nous aurions peine à rencontrer vne autre occasion pour dire ce que nous pensons de celle-cy, dont la cause est sans doute vne des plus cachées & des plus difficiles à decouurir: Nous voulons bien proposer nos doutes & nos conjectures là dessus & en imitant la Nature, faire succeder à tous ces degrez de Lumiere que nous venons de marquer, l'obscurité d'une chose qui a esté iusques icy impenetrable à l'esprit des hommes.

Les Pythagoriciens ont esté les premiers qui ont examiné cette question & ont creu que les Consonances estoient les plus parfaites dont les Proportions estoient rensermées en de plus petits nombres; et que pour cette raison l'Octaue est la plus excellente de toutes, par ce qu'elle est de 2. à 1. lesquels estant assemblez sont 3. au lieu que la Quinte est de 3. à 2. lesquels estant joints sont 5. & la Quarte est de 4. à 3. qui sont 7. Mais outre que sur ce principe il faudroit que la Double Octaue sur sur les gale à la Quinte, par ce qu'elle est de 4. à 1. qui sont 5. tout de mesme que 3. & 2.

Et qu'il se trouueroit mesme des Dissonances qui seroient plus agreables que de certaines Harmonies; par ce que 7. à 1. fait vne dissonance dont les nombres sont plus petits que ceux de la Triple Octaue qui est de 8. à 1. Et de toutes les autres consonances qui sont au dessus, comme est la Vingt-cinquiesme qui est de 32. à 3. la Vingt-sixiesme qui est de 12. à 1. la Vingt-neufiesme qui est de 16. à 1. Outre disie ces inconveniens la difficulté demeure. toute entiere : car quand il seroit vray que les plus parfaites Proportions sont en de plus petits nombres, on ne void pas la raison pourquoy les plus petits nombres font de plus parfaites proportions n'y de plus agreables accords. On en peut dire autant à ceux qui tiennent que les Proportions sont plus parfaites quand leur plus grand nombre contient plusieurs fois le plus petit toût entier sans qu'il y reste aucune fraction, comme sont celles qu'on appelle multiples; et que c'est la raison pour laquelle l'Octave est plus agreable que la Quinte;par ce qu'estant en proportion. de 2. à 1. le nombre de, Deux, contient iustement deux fois vn; au lieu que la Quinte est de 3. à 2. & que le, Trois, contient vne fois

238 DES COVLEVES DE L'IRIS. les Harmonies estoient-elles agreables auant qu'on eust remarqué les proportions qu'elles ont? Comment le sens pouuoit-il mesurer plus facilement l'Octaue que la Quinte, puisque les mesures en estoient inconnuës? Et comment pouvoit-il sçauoir que les nombres qui entrent dans les Proportions de ces Harmonies estoient plus petits ou plus grands, puis qu'on n'auoit pas encore connoissance de ces proportions ny de ces nombres? Cependant auant la descouuerte que l'on en a faite, ces Harmonies estoient agreables; et maintenant il y a vne infinité de personnes qui jugent parfaitement de ces accords, qui en ignorent les mesures & les proportions. D'aillieurs si les fondemens de cette opinion estoient veritables, il faudroit que tout ce qui seroit dans les mesmes Proportions où sont ces Consonances, causast le mesme agréement qu'elles, et qu'vne chose qui seroit deux fois plus longue ou plus large qu'vne autre pleust autant aux yeux que l'Octaue fait à l'oreille; par ce que les mesures en sont esgales & que la connoissance en est esgalement facile. Et pour demeurer dans le subject ou nous sommes, il faudroit qu'vne Quarte fust plus agreable

greable qu'vne triple ou quadruple Octaue; parce qu'il est plus facile de juger qu'vne chose est vne fois & vn tiers plus grande, que si elle l'estoit huict fois ou seize fois plus.

D'autres ont voulu rapporter cela aux mouuemens des cordes qui s'esbranlent d'elles-mesmes quand on fait sonner celles qui sont d'accord auec elles, pretendant que la mesme impression se fait sur le sens. Mais outre que les cordes qui sont à l'vnisson s'esbranlent plus que toutes les autres qui sont accordées à l'Octaue ou à la Quinte, quoy que l'vnisson ne cause aucun agréement: outre qu'il est bien difficile de comprendre comment la mesme chose se puisse faire dans l'oreille où il n'y a rien qui responde à l'accord des instrumens: il faudroit que les bestes connussent aussi parfaitement la beauté d'yne Octaue ou d'vne Quinte que les hommes, puis que leur sens est capable de receuoir la mesme impresfion.

Enfin Galilée ayant obserué que les mouuemens qui accompagnent les Harmonies auoient les mesmes Proportions que leurs cordes; et voyant que l'opinion precedente ne se pouuoit pas mieux soustenir que les autres, s'est imaginé que la douceur des accords venoit de l'vnisormité & regularité de leurs mouuemens, tout de mesme que les discordances procedoient de leur irregularité: mais nous auons cy-deuant resulté cette opinion, qui entre autres inconueniens tombe en celuy que nous venons de marquer, à sçauoir que les bestes jugeroient aussi bien de la beauté des Harmonies que les hommes.

La verité nous obligeant donc de prendre vne autre voye que celle qui a fait esgarer tant de grands hommes, il faut voir si nous serons plus heureux qu'ils n'ont esté, et si nous pourons rencontrer parmy tant de tenebres vn chemin asseuré qui nous puisse mener où elle est cachée.

La difficulté qu'il y a en cette recherche consiste en ce point, que la Cause de la douceur des Harmonies ne peut venir de la nature des Sons ou de la disposition des organes; par ce que les bestes qui ont les organes de l'ouye aussi bien disposez que les hommes & qui reçoiuent les Sons aussi parfaitemet qu'eux, ne sont point touchées des Harmonies & ne

peuuent juger si vne Octaue est plus agreable qu'vne Quinte. Elle ne se peut aussi tirer de la nature des Proportions ou des Nombres, par ce qu'il y a des objects qui ont les mesmes Proportions que les plus agreables Consonances, qui ne causent aucun agréement, et qu'il n'y a rien dans la nature des nombres qui puisse rendre le nombre de 7. ennemy de l'harmonie, ne pouuant entrer en aucune proportion qui soit harmonicque. C'est pourquoy pour euiter ces escueils où tous les Philosophes ont eschoiié, il faut chercher vne Cause qui soit propre aux hommes, qui soit restrainte à certains objects & qui puisse faire voir les Nombres qui sont affectez ou contraires aux harmonies.

A ce dessein il faut presupposer premierement, que les objects propres touchent plus le sens que les objects communs, par ce qu'ils ont plus de liaison & de conformité auec luy, & qu'ils le touchent immediatement, au lieu que les communs n'y font impression que par le moyen des objects propres; Estant vne chose certaine que la figure, le mouuement ny la quantité ne se presentent aux yeux que par le moyen de la couleur.

Secondement, que comme les contraires op-Hh ij 242 DES COVLEVES DE L'IRIS,

posez à leurs contraires se font mieux connoistre, aussi les choses comparées les vnes aux autres sont mieux voir la persection ou l'im-

perfection qu'elles ont.

Troissessement que le sens compare plus facilement les choses qui luy sont les plus connuës, et que de toutes les parties de son object le Milieu & les Extremitez luy sont plus connuës que toutes les autres; et par confequent qu'il les compare plus facilement ensemble, et que la perfection luy en est plus aisée à connoistre.

Quatriesmement que l'Entendement compare les choses plus parfaitement que le Sens,& partant qu'il en connoist mieux la perfection.

En cinquiesme lieu que la proportion que l'on remarque entre deux choses est l'essect & le resultat de la comparaison que l'on en a faite; par ce que l'ame apres les auoir comparées, reconnoist la disserence qu'il y a entre-elles; et cette disserence n'est autre chose que la Proportion qu'elles ont ensemble.

En sixiesme lieu que la difference qu'il y a entre deux objects sait voir combien il y a plus de l'estre & de la qualité sensible en l'vn qu'en l'autre; et que plus il y a de la qualité sensible qui est conforme au sens, plus le sens est remply & persectionné par elle.

Enfin que les objects qui perfectionnent dauantage les facultez connoissantes, sont ceux qui luy sont agreables comme nous auons montré au discours de la beauté.

De toutes ces maximes il s'ensuit premierement, que les Proportions qui se trouuent dans les objects communs, ne causent pas tant d'agréement ou de degoust que celles qui sont dans les objects propres: Et que la Proportion Double par exemple qui est tres-agreable dans les Sons & dans les Couleurs ne touche prefque point l'ame dans la quantité ny dans le mouuement : car vne chose qui est deux fois plus longue, ou qui se meut deux fois plus viste qu'vne autre, ne donne aucun plaisir manifeste aux yeux. Et la raison en est que le sens est plus touché par ses objects propres que par les communs, ayant plus de liaison & de rapport auec eux, & ne pouuant receuoir sa vraye perfection que de ce qui luy est propre & particulierement affecté.

En second lieu, qu'vn Son tout seul quelque portion qu'il ait de la qualité sensible & quelque conforme qu'il soit à l'oreille, n'est pas si agreable que lors qu'il y en a vn autre qui se joint auec luy ou qui le suit immediatement en vne proportion parfaite; qui est ce que nous appellons Consonance ou Harmonie: parce que l'ame ne connoist pas parfaitement les

choses que par comparaison.

En troisiesme lieu, que les Bestes ne connoissent pas si parfaitement la beauté des Harmonies & des Couleurs que les hommes parce qu'elles ne comparent pas si justement les
choses qu'eux & ne peuuent remarquer la difference qui resulte de la comparaison; cette
connoissance estant en quelque façon abstracte & hors du ressort de la faculté sensitiue.
Et c'est pour cela que les Enfans & ceux mesmes qui n'ont pas la pratique de la Musique ne
connoissent pas si bien la bonté des accords &
n'en sont pas si agreablement touchez; par ce
qu'ils ne comparent pas si justement les Sons
& n'en remarquent pas si exactement les differences, que ceux qui s'y sont exercez.

En quatriesme lieu, que deux Sons qui apres auoir esté comparez, paroissent semblables comme les vnissons, ne causent aucun agréement; par ce que l'ame n'y remarque aucune disserence, laquelle seule est capable de faire connoistre combien il y a plus de la qualité sensible, & de perfectionner par consequent le sens.

En cinquiesme lieu, la capacité naturelle des sens ayant vne certaine estenduë qui est proportionnée à leur puissance, & les Extremitez & le Milieu de cette estenduë leur estant plus faciles à connoistre & à comparer que leurs autres parties; Il faut dans l'estenduë des Sons qui sont conformes à l'ouye, que la Consonance qui se fait par la comparaison du Milieu auec ses Extremitez soit la plus connuë & la plus facile à faire; et par consequent que l'Octaue qui est la plus connuë & la plus facile à faire, soit justement au milieu de cette estenduë. D'où il s'ensuit qu'elle est la plus agreable de toutes les Consonances; par ce qu'outre qu'elle est plus conforme au sens estant au milieu comme luy, elle a plus de la qualité sensible; et partant elle le perfectionne dauantage que les autres qui en ont moins. En effect comme le Milieu est à ses extremitez en Proportion Double, & que cette proportion contient le double de la chose, il faut que l'Octaue, qui doit estre dans la mesme proportion puis qu'elle est au milieu, ait le

double de la qualité sensible; et partant qu'elle en ait plus que la Quinte qui n'en a qu'vne sois & demie, que la Quarte qui n'en a qu'vne sois & vn tiers, & ainsi de toutes les au-

tres qui sont au dedans de l'Octaue.

D'où il est aisé de juger non seulement qu'elle est la plus facile à connoistre, par ce qu'elle est plus conforme au sens, et qu'elle a plus de la qualité sensible, le sens estant plus facilement touché de ce qui est plus sensible, & connoissant plus exactement ce qui luy est plus conforme: mais encore qu'elle est plus facile à faire, les termes dont elle est composée estant plus aisez à comparer & naissant de la diuision du tout en deux parties esgales qui est la premiere & la plus naturelle diuision qui se puisse faire. Et c'est de-là sans doute que lors qu'on entend vne Quinte ou vne Quarte, l'elprit ne demeure pas satisfait & attend au de-là ce qui reste pour faire l'Octaue; et que le Son des fleuttes va d'Octaue en Octaue sans passer par les tons du milieu, la Nature aussi bien que l'ame trouuant plus de facilité en cette Consonance qu'en toutes les autres. L'Octaue est donc la plus agreable de toutes les Consonances par ce qu'elle est la plus facile à faire

CHAPITRE II. 247 & à comparer, et par ce qu'elle a plus de la qualité sensible.

Que si ce sont-là les veritables causes de la douceur de cette harmonie, il faut qu'elles le soient encore des autres; et par consequent il suffiroit de dire que la Quinte qui nous paroist plus agreable que la Quarte, est aussi plus facile à faire & qu'elle a plus de la qualité sensible, et ainsi de la Quarte à comparaison des Tierces & des Sextes. Iusques-là mesmes que les Discordances ne doiuent estre des-agreables que par ce qu'elles sont tres-difficiles à faire, c'est à dire que les termes qui les composent estant tres dissiciles à connoistre, ne se peu-uent comparer qu'auec peine & qu'elles sont en des proportions qui ont peu de la qualité sensible.

Mais par ce que ces veritez ne sont pas si euidentes en ces accords qu'elles sont dans l'Octaue, il les saut examiner en detail & voir principalement en quoy la Quinte est plus sacile à faire que la Quarte, celle-cy que les Tierces, &c.

A ce dessein il faut reprendre les fondemens

248 DES COVLEVRS DE L'IRIS, que nous auons establis cy-deuant, à sçauoir que les Extremitez & le Milieu sont les parties les plus faciles à connoistre de toutes, et que laDiuision en deux parties esgales qui fait connoistre ce Milieu, est la plus naturelle. Orsi l'ame peut designer le milieu de toute l'estendué d'vn object sensible par ce que les Extremitez luy en sont connuës, elle peut encore trouuer le milieu qui sera entre ce premier milieu & l'vne des extremitez; c'est à dire que si elle peut diuiser tout l'object en deux portions esgales, elle peut encore diuiser ces portions en deux autres parties & ces parties en d'autres : car il n'y a pas plus de raison pourquoy elle designe le premier milieu que le second & le second que le troissesme; et toute la difference qu'il y peut auoir, c'est qu'elle ne peut marquer le second qu'elle n'ait trouué le premier, ny le troisiesme qu'elle n'ait trouvé le second. Cette verité paroist manifestement dans les quantitez qui se presentent aux yeux, car l'œil designe facilement le milieu d'vne longueur en la diuisant en deux parties esgales, & le second milieu en la subdiuisant en deux autres parties & ainsi de suitte : de sorte que les parties aliquotes qui se trouuent en ces diuisions, quoy


qu'elles soient plus petites que les autres qui ne s'y rencontrent point, sont plus aisées à marquer que celles-cy:car il est plus facile de connoistre le quart d'vne longueur que le tiers; par ce que pour connoistre le Quart, il faut diuiser toute la longueur en deux moitiez & la derniere moitié en deux autres, dont l'vne

fait necessairement le quart.

Il faut encore remarquer que bien que toute l'estenduë des Sons puisse souffrir cette diuision à l'infiny, l'ame neantmoins ne la peut faire beaucoup de fois sans confusion; par ce que la multiplicité des termes l'embarasse & luy donne de la peine pour les retenir & pour les comparer justement les vns auec les autres. C'est pourquoy apres la Troisiesme Division qu'elle a faite de toute l'estenduë des Sons qui sont conformes à l'ouye, il n'y a plus d'accord qui luy plaise si elle ne repete les premiers comme il arriue dans l'estenduë de la double Octaue. Et c'est pour cela que les proportions où le nombre de 7. & de 9. entrent, ne sont point Harmoniques, par ce qu'elles ne viennent d'aucunes de ces diuisions & que l'ame ne les peut rencontrer sans confusion & sans peine. Par où il est aisé à voir que comme la premiere Diuision est plus facile à faire que la seconde, la seconde l'est aussi plus que la troissesse; et par consequent que les Consonances qui se font par cette seconde Diuision sont plus faciles à faire que celles qui resultent de la troissesse. Il faut donc faire voir que comme l'Octaue se fait par la premiere diuision en deux parties esgales, la Quinte & la Quarte se font par la seconde & les Tierces & les Sextes par la troissessme.


Apres donc que l'ame a diuisé toute l'estenduë des Sons en deux moitiez, la premiere desquelles comparée à son tout sait l'Octane; l'autre moitié qui reste se peut encore diuiser par le milieu, lequel comparé auec le milieu de toute l'estenduë fait la Quinte comme il sait la Quarte comparé auec toute l'estenduë. Mais cela paroistra mieux en faisant ces diuissons sur les cordes, aussi bien ont elles rapport auec les Sons. Supposé donc que AD soit vne corde qui fasse le Son le plus graue qui soit conforme à l'oreille, la diuisant par la moitié en B, ou bien prenant vne autre corde AB qui soit plus courte de la moitié que la premiere, elle sera vne Octane auec

elle; et diuisant encore en deux la derniere moitié BD, au point C; où bien prenant vne corde AC qui soit vne sois & demie plus longue que AB, elles feront toutes deux vne Quinte; et cette mesme corde AC auec la premiere AD qui est vne sois & vn tiers plus longue qu'elle, fait vne Quarte comme on peut voir par cette figure.



Le dernier progrez que l'ame fait est la Troissesse Diuisson de toute l'estenduë des Sons, d'où resultent les Tierces & les Sextes. Car en diuisant la moitié de la seconde Diuisson en deux parties esgales, le milieu qui naist de cette diuisson estant comparé auec le milieu de la premiere fait la Tierce Majeure; auec le milieu de la seconde il fait la Tierce Mineure; auec toute l'estenduë il fait

la Sexte Majeure & auec ce qui reste de cette estenduë il fait la Sexte Mineure: comme
on peut voir facilement dans la figure suiuante ou B C est diuisé en E, de sorte que BE
fait la huictiesme partie de A D. Ainsi la corde A B est à A E comme 4. à 5. qui fait la
Tierce Majeure; A E est à A C comme 5. à 6.
qui fait la Tierce Mineure; A E est à A D
comme 5. à 8. qui fait la Sexte Majeure; A E
est à A D comme 5. à 3. qui fait la Sexte Mineure.



La Quinte & la Quarte sont donc plus faciles à faire que les Tierces & les Sextes parce qu'elles se font par la seconde diuisson & celles-cy par la troisiesme. Mais encore la Quinte est plus facile à faire que la Quarte par ce qu'elle est composée des deux derniers termes que l'ame à remarquez; et que les dernieres choses que l'on connoist sont plus proches & plus presentes à l'ame que les plus esloignées: or ces deux derniers termes sont les deux milieux de la premiere & seconde diuision qui font la Quinte : de sorte qu'il est plus aisé de les comparer ensemble que le dernier milieu auec toute l'estenduë, laquelle est la premiere & par consequent la plus esloignée de toutes les notions. C'est aussi pour cela que la trompette apres auoir fait l'octaue va tout droit à la Quinte estant la plus facile de toutes les Harmonies apres l'Octaue. On en peut dire autant de la Tierce Majeure à l'esgard de la Tierce Mineure, et de celle-cy à l'esgard des Sextes comme la figure precedente fait voir.

Les Consonances sont donc plus ou moins faciles à faire selon qu'elles nous paroissent plus ou moins agreables. Mais elles ont aussi plus ou moins de la qualité sensible qui est la principale cause de l'agréement. Ainsi l'Oct a-ue est plus agreable que la Quinte par ce qu'el-

le a le double de la qualité sensible & que celle-cy n'en a qu'vne fois & demie. La Quinte plus que la Quarte qui n'en a qu'vne fois & vn tiers, la Quarte plus que la Tierce Majeure qui n'en a qu'vne fois & vn quart, celle-cy plus que la Tierce Mineure qui n'en a qu'vne fois & vn cinquiesme.

Il est vray que les Sextes en ont dauantage que ces dernieres, la Sexte Majeure en ayant vne sois & trois cinquiesmes qui est la Proportion de 8. à 5. la Sexte Mineure vne sois & deux tiers qui est la proportion de 5. à 3. mais l'ame ayant plus de dissiculté à les faire, ny trouue pas tant d'agréement, la peine diminuant le plaisir que l'abondance de la qualité

sensible luy pouuoit donner.

Ce sont là les raisons pour lesquelles les accords qui sont au dedans de l'Octane sont agreables ou des-agreables. Elles le sont encore de tous ceux qui sont au de-là: Car l'ame fait le mesme progrez depuis la premiere Octane insques à la seconde, qu'elle fait dans l'estendue de la premiere; et tous les accords qui s'y trouuent ne sont que des repetitions des premiers. De sorte qu'elle diuise le dessus de

CHAPITRE II. 255 la premiere Octane ou bien la corde AB, par la moitié AF, pour faire la feconde Octane; et l'autre moitié FB, en deux autres parties pour faire la Quinte & la Qarte: Enfin elle couppe encore FG, en deux autres qui font les Tierces & les Sextes de la mesme façon qu'elle a fait dans la premiere corde AD.



Toutes lesquelles Consonances estant jointes auec la premiere Octaue sont la Double Octaue, la Douzieme, l'Onziesme, la Dixiesme Majeure, la Dixiesme Mineure, la Treziesme Majeure, la Treziesme Mineure. Car la premiere Octaue jointe auec la seconde Octaue fait la Double Octaue, auec la Quinte

256 DES COVLEVRS DE L'IRIS, elle fait la Douziesme, auec la Quarte elle produit l'Onziesme & ainsi des autres.

Que si l'on diuise encore la Seconde Octane AF, en autant de portions que la premiere, on aura les mesmes genres de Consonance à sçauoir la Triple Octane ou Vingt-deuxiesme, la Dix-neusiesme qui est composée de deux octanes & d'une quinte, la Dix-huictiesme qui est de deux octanes & d'une quarte, la Dix-septiesme Majeure qui est de deux octanes & d'un tierce majeure, la Dix-septiesme Mineure, la Ving-tiesme Majeure, la Vingtiesme Mineure & ainsi de suire à l'insini, en multipliant les Octanes & y adjoustant les consonances simples que nous auons marquées.

Mais au de-là de la Double Octaue qui est la borne de la capacité naturelle de l'ouye, les Consonances ne sont plus si agreables, parce qu'elles ne sont plus si conformes au sens s'essoignant du milieu, & l'ame se lassant dans vne division si longue & si souvent reiterée.

Or quoy que cette conjecture satisfasse exactement à tous les phenomenes de l'Harmonie, elle ne satisfera pas peut-estre le Lecteur qui aura peine à croire que l'ame fasse toutes ces diuisions des Sons auant qu'elle les juge agreables. Car outre que la connoissance qu'elle en a se fait en vn moment, & qu'il semble qu'elle ne puisse faire tant de divisions qu'auec vn grand temps; il est difficile de comprendre comment elle en peut comparer les termes qui souuent ne sont pas presens à l'oreille & qu'il luy faut supposer daillieurs. Car quand elle entend vne Quinte toute seule, il luy faut supposer la basse de l'Octaue encore qu'elle ne sonne point, afin de trouuer le milieu qui est entre elle & son dessus, ce milieu & ce dessus faisant la Quinte, comme il fait la Quarte auec la basse. Et si elle passe iusques à la troissesme Diuisson qui fait les Tierces & les Sextes, il luy faut supposer tous les termes de l'Octaue & de la Quinte comme nous auons dit; qui est vn circuit bien long & bien penible pour vne action qui se fait en vn instant & auec tant de facilité. Mais si l'on veut considerer que tout cela se fait par l'entendement qui comme en beaucoup d'autres actions illumine la partie sensitiue & l'esseue à des connoissances dont elle est incapable d'elle-mesme, on ne trouuera pas estran-

KK ij

258 DES COVLEVES DE L'IRIS, ge que luy qui agit auec tant de promptitude & de viuacité, fasse toutes ces choses en si peu de temps, & qu'auec toutes les Lumieres naturelles qu'il a, il ne connoisse l'estenduë & les parties les plus considerables des objects sensibles, dont les idées luy sont tousiours presentes comme sont celles des choses qu'il fait par instinct ou par vne longue habitude. Et certes si l'on prend garde que quand la Quarte ou la Quinte sont entenduës toutes seules, elles portent l'esprit au de-là & luy font attendre l'Octaue; on jugera bien que ce terme luy est connu quoy que le sens ne le luy presente pas, & qu'il s'en resouuient pour le comparer auec les autres. Et pourquoy l'oreille ne connoistroit elle pas le milieu & les extremitez de son object, puis que le toucher les connoist bien dans le sien, & que l'œil les remarque si facilement dans la quantité? Apres tout, quoy qu'il y ait dans le jugement que l'ame fait des Harmonies & des

Discordances, vn plus grand circuit que l'on ne s'estoit imaginé; qui prendra garde à quantité d'autres actions que les sens sont tous seuls sans que l'entendement y concoure, n'y trouuera peut-estre pas vn progrez moins long, ny vne moins grande varieté d'operations qu'il y en a icy. Car dans la seule action de la veuë, il y a quatre ou cinq refractions qui se font dans l'œil, l'ame redresse les Images qui y sont renuersées, elle juge de la juste grandeur & de la distance des objects par les angles qu'elles ont quelques petits qu'ils soient, et y adjouste apres les notions de la bonté, de la malice, & autres semblables; Et ce qui est de merueilleuxt, out cela se fait en vn moment, & auec tant d'art qu'il semble que le sens raisonne en corrigeant les deffaux des Images, & jugeant bien que les objects sont autres qu'elles ne les luy representent. De sorte que si dans le jugement que les sens font tous seuls, il y a vne si grande nombre d'operations differentes & tant deffects d'vne secrette intelligence qui doit estre cachée dans l'ame, il ne faut pas s'estonner que lors qu'elle est esclairée de l'entendement comme elle l'est sans doute dans la connoissance qu'elle a des Harmonies, elle fait ce grand circuit, & ce long progrez de diuisions & de comparaisons que nous auons marquez.

Mais si elle le peut faire dans les Sons, il luy KK iij

260 DES COVLEVES DE L'IRIS, est bien plus facile dans les Couleurs, par ce que ce sont des qualitez fixes & permanentes, au lieu que le Son est tousiours dans le mouuement, et qu'il est plus aisé de comparer des choses qui sont presentes au sens que celles qui en sont absentes. Car il ny a rien à supposer dans les Couleurs comme dans les Sons, la Lumiere & le genre de la couleur qu'on veut comparer auec elle estant tousjours presens aux yeux. Et c'est pour cela qu'il y a plus de personnes qui se plaisent à voir de belles Couleurs qu'il n'y en a qui ayment à entendre de beaux accords, par ce que l'ame connoist plus facilement la beauté des premieres que celle des autres.

Quoy qu'il en soit l'inclination & la facilité naturelle quelle a à diuiser les choses en deux parties esgales luy faisant diuiser toute l'estenduë de la Lumiere qui est proportionnée aux yeux, en deux portions, elle trouue le Verd au milieu, qui par consequent est plus conforme au sens, & les comparant ensemble elle remarque la différence & la proportion qui naist de cette comparaison; Laquelle estant double contient plus de l'estre sensible que toutes les autres qui sont en cette estenduë & perfectionne dauantage la faculté connoissante, d'où vient l'agréement.

Elle trouue apres la proportion s'esquialtere dans le Rouge & la s'esquitierce dans le Iaune, & fait en suite le mesme progrez dans l'estenduë de la Seconde Octave qui est au delà du Verd ; le Noir , le Pourpre & le Bleu ayant les mesmes proportions à l'esgard du Verd, que le Verd, le Rouge & le Iaune ont à l'esgard du Blanc. Lesquelles par consequent aggreent selon qu'elles perfectionnent le sens, c'est a dire selon la mesure qu'elles ont de la qualité sensible comme nous auons dit qu'il se faisoit dans les Harmonies.

Mais il est temps de reprendre nostre premier route que la douceur de la Musique nous auoit fait quitter, & sans vouloir persuader dauantage les conjectures que nous auons proposées, il suffit pour nostre dessein que nous soyons asseurez que les mesmes proportions qui font les agreables Consonances font aussi les belles Couleurs, & que sur ce fondement nous ayons trouué les degrez de Lumiere qui entrent en chacune de leurs espe-

ces.

Comment se font les Couleurs de l'Iris.

ARTICLE TREIZIESME.

A Pres tant de Lumieres que nous auons decouuertes dans la nature des Couleurs, nous deuons croire qu'il ny aura plus rien qui nous puisse empescher de voir tout ce qu'il y a de plus caché en celles de l'Iris; et il est comme impossible qu'auec tant de clartez nous n'apperceuions l'artifice que le Soleil employe dans la production de cet agreable Meteore.

Car apres auoir sceu que la Lumiere se change en Couleur quand elle est affoiblie; ou'il n'y a rien qui l'affoiblisse que la Refraction & la Reslexion de ses rayons; oue pour subject elle doit trauerser vn corps transparent où ils puissent se briser & se reslechir; et qu'en s'affoiblissant ainsi iusques à certains degrez elle passe en telle ou telle espece de Couleur: Il semble que tout le secret de l'Iris consiste à dire, que les rayons du Soleil passant au trauers de cette nuë que nous auons

obseruée estre le lieu veritable ou elle se forme & qui se trouue tousiours entre le Soleil & le lieu où l'on l'a void, ils s'y rompent & s'y reflechissent comme ils font dans les verres pleins d'eau & dans les Triangles de chrystal, s'affoiblissant ainsi iusques aux degrez que demandent le Rouge, le Verd & le Pourpre: et qu'apres s'estre respandus en l'air, ils font paroistre ces belles Couleurs sur le pre-

mier corps opaque qui s'y rencontre.

Mais pour faire voir plus exactement tou- Commene tes ces veritez, il faut montrer comment la se fait l'Iris Lumiere en trauersant les Verres pleins d'eau gles. & les Triangles de chrystal prend les Couleurs de l'Iris; par ce que la mesme alteration qu'elle souffre en ces corps là se fait asseurement dans la nuë, puis que l'effect en est tout semblable; et qu'il est plus facile de la remarquer en des subjects qui sont proches de nous & qui sont dans nostre disposition, que dans les nues qui sont essoignées de nos yeux & de nos mains. A ce dessein il faut rapeller icy quelques-vnes des propositions que nous auons demonstrées cy-deuant, à sçauoir que l'affoiblissement de la Lumiere qui produit les Couleurs ne se peut faire que par la Refraction &


par la Reflexion; d'où il s'ensuit que les rayons perpendiculaires ne prennent iamais aucune. Couleur par ce qu'ils ne se rompent point; c'est pourquoy la Lumiere qui trauerse perpendiculairement le triangle se reflechist toute pure sur sa derniere face, et les objects que l'on void à trauers dans les mesmes lignes se voyent dans leur Couleur naturelle.


En second lieu, que la Refraction toute seule ne colore point la Lumiere comme nous auons montré par quantité d'experiences Art. 8. Et par consequent la Lumiere & les Images passant à trauers les Triangles ne se colorent pas par la seule Refraction qu'elles y souffrent, mais il doit y auoir vne autre cause qui se joigne auec elle pour produire cet effect.

Enfin, que la Lumiere se reflechist sur toutes les différentes surfaces qu'elle rencontre en son passage: Et bien qu'vne partie de ses rayons trauerse ces surfaces si elles sont transparentes; L'autre partie s'y arreste & retourne en arrière comme nous auons fait voir au lieu allegué. D'où il faut tirer cette consequence, que la Lumiere & les Images qui se rompent en passant à trauers le Triange se reflechissent sur toutes les faces dont il est com-

posé, si l'égalité des angles qu'elles gardent tousiours dans la Reslexion, ne l'empesche. En essect puis que le rayon perpendiculaire

A, qui comme le plus fort deuroit penetrer toutes les faces du Triangle qu'il rencontre, se reflechit sur la face B, & réjallit fur la muraille C, et qu'il s'arreste aussi sur la face D, où l'œil le remarque, retournant par consequent vers la face B, & se repliant sur luymesme, par ce qu'il fait vne ligne perpendiculaire, qui pour faire les angles esgaux ne






se peut restechir que sur elle-mesme. Si dis-je le plus fort de tous les rayons se restechit sur toutes les faces du Triangle qu'il ren-

Ll ij

contre, à plus forte raison G, qui est oblique & brisé & qui par consequent est plus foible, s'y doit - il reflechir. Et comme il n'y a rien que la Refraction & la Reflexion qui puisse donner à la Lumiere l'affoiblissement qui est necessaire pour la faire passer en Couleur, il s'ensuit que cette Reslexion est la derniere cause qui acheue de l'affoiblir & qui luy donne ces diuerses teintures qu'elle nous fait paroistre.

De sorte qu'en General il est vray que les Couleurs du Triangle viennent de la Refraction & de la Reslexion que la Lumiere souffre en le trauersant comme on peut voir dans

Lumiere A, tombant obliquement fur le Triangle, se rompt en B, & le trauerse tout entier se portant iusques en C. Mais vne partie de ses rayons se reslechit



à angles esgaux sur la face D, & se porte sur E, & de là encore vers B, où elle se reste-

chit derechef: En sorte que par ces diuerses Reslexions ils viennent à retomber sur toute la masse de la Lumiere qui s'est rompuë, & l'imbibent des Couleurs qu'ils ont acquises par tous ces mouuemens.

Car comme la Couleur de la vapeur altere la Lumiere de la flamme & la rend rouge ou bleuë de quelque costé qu'on la regarde: aussi ces rayons reflechis venant à se mesler auec la masse lumineuse qui trauerse le triangle, l'infectent de leurs Couleurs & la font paroistre rouge verte & pourprée sur tous les subjects où elle se repand.

Mais comment cette Lumiere ainsi rompuë & reslechie prend-elle diuerses Couleurse car estant vne & l'alteration qu'elle sousser estant vray semblablement esgale en tous ses rayons; il semble qu'elle ne se deuroit teindre que d'vne sorte de Couleur. Et il ne sert de rien de dire qu'elle passe à trauers des parties plus & moins espaisses & qu'ainsi elle se rend plus & moins opaque: Qu'en esse la Couleur Rouge qui est la plus claire & la plus haute de toutes, part tousiours de la pointe du Triangle qui a moins d'espaisseur,

Ll iij

268 DES COVLEVES DE L'IRIS,

& que la Pourprée qui est la plus obscure, part de la base & de la plus grande profondeur du Triangle. Il est dis-je inutile de recourir à cette cause puis que l'opacité & l'espaisseur, ne font rien pour la diuersité des Couleurs; vn petit Triangle produisant les mesmes especes qu'vn plus grand, comme nous auons

plus amplement montré dans l'Art. 8.

Il ne faut pas dire aussi que cela procede de la seule Obliquité des rayons qui se rompent, & que ceux qui sont moins obliques estant plus forts se changent en des Couleurs plus hautes, comme ceux qui sont plus obliques & par consequent plus foibles passent en des Couleurs plus obscures. Car si cette raison estoit bonne, il faudroit que l'Obliquité se rendant plus grande ou plus petite, les Couleurs se changeassent à proportion : Cependant en biaisant & faisant pancher le Triangle les rayons se rendent beaucoup plus obliques sans changer l'espece des Couleurs qu'ils produisoient auparauant.

Quelques-vns rapportent cela aux angles de la Refraction & disent que les angles de telle & telle grandeur font paroistre vne telle & telle Couleur. Mais outre que la RefleXion en peut faire de tout semblables & qui auront la mesme ouuerture que ceux-là sans colorer la Lumiere: Puis que l'on a obserué que toutes les Couleurs du Triangle se voyent depuis l'angle qui a 32. degrez iusques à celuy qui en a 78. il n'y a point là de mesure certaine à prendre, vne mesme Couleur se trouuant soubs tant de diuers angles, & vn mesme angle faisant voir diuerses especes de Couleurs. Et quand l'observation seroit juste, le point sondamental de la question demeure tousiours indecis, à sçauoir pourquoy tel angle produit vne telle Couleur.

Ie sçay bien qu'il y en a qui ont dit & il est vray, qu'il y a de ces angles où plus de rayons concourent, & où il s'en ramasse dauantage, Et d'autres où le contraire arriue. Mais il ne s'ensuit pas de là comme ils pretendent, que les plus hautes Couleurs naissent du concours & du ramas de plusieurs rayons, comme les plus obscures viennent des angles où il s'en fait moins. Car sans parler des angles de Reslexion où la mesme mesure de Lumiere se peut trouuer sans prendre Couleur; ce concours & ce ramas de rayons rend bien les Couleurs plus fortes plus viues & plus denses,

270 DES COVLEVES DE L'IRIS, s'il faut ainsi parler; mais ils ne font rien pour l'espece des Couleurs. Et de vray en tournant diuersement le Triangle on eslargit ou estressit l'espace qu'occuppe l'Iris; et quand il est plus estroit, les Couleurs en paroissent plus fortes, tout de mesme qu'elles sont plus deschargées & comme plus delayées quand il est plus large; mais ce sont tousiours les mesmes especes de Couleur, quelque changement qu'il y ait au concours & au ramas des rayons. Apres tout cette opinion ne considere que les angles de la Refraction, quoy qu'il soit certain que la Refraction toute seule n'est point capable de changer la Lumiere en Couleur, de quelque façon qu'elle se fasse, soit par des rayons plus ou moins Obliques, soit par des angles plus ou moins ouuerts, soit par le concours de plus ou de moins de rayons.

Que dirons nous donc en vne chose si obscure & enuironnée de tant de disficultez; Et apres auoir exclus l'Opacité du verre, l'Obliquité des rayons, les angles qu'ils sont en le trauersant, & le different concours de Lumiere qui s'y rencontre; oue sçaurions nous trouuer dans le Triangle qui puisse estre cause de cette varieté de Couleurs? Car de recourir à la Reflexion & de vouloir qu'elle se joigne à toutes ces autres conditions pour produire ce merueilleux phenomene comme nous auons dit, l'esprit n'en est pas plus satisfait, & ne void pas la raison pour laquelle vn tel rayon reflechy se meslant auec ceux qui sont rompus, fait naistre le Rouge, & vn tel autre, le Pourpre ou le Verd: Et ce dautant plus que les cheutes & les angles de tous ces rayons estant souuent semblables, ne laissent pas de faire paroistre des Couleurs differentes. Neantmoins apres auoir monstré que la Lumiere se doit affoiblir pour passer en Couleur, & que selon les degrez de cet affoiblissement elle se change en telle & telle espece; nous pouuons dire asseurement qu'elle s'est assoiblie iusques à vne telle mesure quand nous voyons paroistre vne telle Couleur, puis que nous sçauons combien de degrez de Lumiere entrent en chaque Couleur. De sorte que les Couleurs du Triangle estant lumineuses dans le Triangle, nous pouuons asseurer sur le calcul que nous auons fait cy-deuant, que la Lumiere s'est affoiblie d'vn tiers dans le Rouge, d'une moitié dans le Verd, de deux tiers dans

Mm

272 DES COVLEVES DE L'IRIS, le Pourpre, ou sil'on veut, & c'est la mesme chose, que la Lumiere Souueraine est au Rouge en proportion s'esquialtere, au Verd en proportion double, au Pourpre en proportion triple.

Et peut estre que sans vouloir penetrer plus auant dans la source de ces diuerses proportions qu'elle prend, il suffiroit de dire, que puisque le Son passe naturellement à la Quinte, à l'Octaue, & à la Douziesme comme il paroist dans le resonnement d'vne corde de Lut touchée a vuide; Aussi la Lumiere fait le mesme progrez dans les Couleurs esclatantes passant au Rouge, au Verd & au Pourpre qui sont toutes dans les mesmes proportions que ces Harmonies. Car enfin il faut demeurer d'accord que la Nature ayme certaines mesures dans les choses qu'elle fait & qu'elle les garde tousiours si elle n'est point empeschée. De sorte que c'est assez de sçauoir qu'elle diminuë le Son en telles & telles proportions d'où naissent ces diuerses Harmonies, pour dire auec tres-grande probabilité, qu'elle diminuë la Lumiere de la mesme sorte & qu'elle en forme toutes ces Couleurs differentes. Et de fait quand on a regardé la Lumiere, la clarté qu'elle laisse dans l'œil en se diminuant peu à

peu fait paroistre toutes les Couleurs de l'Iris commençant au Rouge, passant de là au Verd & au Pourpre & finissant à l'Obscurité; qui est vne marque certaine que la Lumiere en se diminuant & s'affoiblissant se change en ces Couleurs. De vouloir apres cela trouuer la raison pour laquelle ces qualitez se diminuent en ces proportions, on peut dire de cette recherche, qu'elle abusera tousiours les esprits les plus curieux, & qu'elle ne sera iamais tentée par les plus sages; et qu'elle est de la nature de celles où la raison Humaine a plus de gloire de confesser ingenuëment sa foiblesse que de se flatter vainement d'y pouuoir reiifsir & de passer au delà des bornes que Diev a données à l'intelligence des hommes.

Il est vray qu'il y a quelques presomptions qui nous peuuent approcher de ces veritez toutes esloignées qu'elles sont de nostre connoissance. Car puisque la Lumiere ne se diminuë que par la Refraction & par la Reflexion, & qu'elle souffre dans le Triangle vne Refraction & trois Reflexions, il est vraysemblable que chacun de ces mouuemens diminuë la Lumiere d'vne portion & d'vn de-

Mm ij

274 DES COVLEVRS DE L'IRIS, gré; de sorte que la Lumiere Souueraine ayant 16. degrez comme nous auons montré, il faut qu'apres ces quatre mouuemens elle soit reduite à 12. degrez qui est la premiere mesure où la Lumiere commence à prendre Couleur. De sorte que du moins nous voyons par là comment elle descend iusques à l'ordre des Couleurs.

Mais outre cet affoiblissement que la Refraction & la Reflexion luy donnent toutes seules sans que l'Opacité y contribuë : car puisque la Reflexion toute seule est capable de l'affoiblir, la Refraction sans doute le peut faire aussi; et ce dautant plus que les rayons deuiennent plus foibles selon qu'ils sont plus obliques quoy qu'ils trauersent vne mesme ou vne moindre espaisseur. Outre cet affoiblissement dis-je, elle en souffre vn autre par l'Opacité du Verre; non pas que l'Opacité agifse contre elle ou qu'elle se messe auec elle, mais par ce que les rayons les plus foibles ou les plus grossiers ne la peuvent trauerser, d'où vient que ceux qui passent ont moins de clarté & demeurent veritablement affoiblis comme l'experience fait voir. De sorte que la Refraction & la Reflexion qui se fait sur toutes


CHAPITRE SECOND. les faces du Triangle ne se doiuent pas considerer toutes simples; mais on y doit encore adjouster l'empeschement du diaphane : Et partant si chaque empeschement diminuë encore la Lumiere d'vne portion, il faudra que la Refraction & les trois Reflexions ayant chacune leur obstacle, la Lumiere se diminuë encore de 4. degrez qui joints aux 4. precedens font 8. degrez de diminution, dans lesquels consiste la mesure du Verd lumineux. De sorte que le Verd sera la premiere Couleur que la Lumiere doit naturellement prendre dans le Triangle, & où elle fera le mesme progrez que le Son qui va tout droit à l'Octaue; et que l'ame fait dans l'estenduë de ses objects allant immediatement des extremitez au Milieu comme nous auons montré cy-deuant.

Or quoy que toute la Masse de la Lumiere deust prendre cette seule Couleur: neant-moins comme il y a vne grande partie de ses rayons qui ne sousser pas esgalement l'alteration que ces mouuemens luy causent, ils prennent aussi d'autres teintures. Car les rayons qui tombent vers la pointe du Triangle se changent en Rouge, & ceux qui approchent de sa base se teignent en Pourpre; par ce que

Mm iij

ceux-là sont moins Obliques & qu'ils trauerfent vne moindre Opacité, d'où il s'ensuit qu'ils sont aussi plus forts & plus clairs & qu'ils doiuent par consequent prendre vne Couleur plus haute que ceux qui passent plus prés de la base du Triangle. Et dautant que ces rayons qui passent ainsi par la pointe du Triangle se rencontrent encore vers la troissesme pointe


apres la seconde Reflexion, en sorte qu'ils passent deux fois par la moindre Opacité & sont par consequent deux fois exterieurs à l'esgard de ceux qui font le Verd; on



doit croire que ces rayons sont pour ce regard de 2. degrez plus clairs que ceux du Verd: et partant si le Verd à 8. degrez de Lumiere, le Rouge en doit auoir 10. ausquels si l'on adjouste la force de ces rayons qui est plus grande que celle des autres estans moins Obliques qu'eux; on trouuera que le Rouge a prés d'onze degrez, & qu'il est en proportion s'es-

Mais comment y a-il des rayons qui sont plus Obliques que les autres puis qu'ils sont tout parallelles & qu'ils tombent sur yn mes-me plan? certainement ils ne sont pas tous parallelles par ce qu'il ny a aucun point dans le


corps lumineux d'où il ne forte vne infinité de rayons & que du point A, il y a quelque rayon qui tombe fur C, & du point B, il y en a aussi qui tombe en D. Et de fait



couurant peu à peu le costé du Triangle EF, & commençant par E, quand on est venu au point D, on void que B, s'obscurcit: Or si cela est ainsi, il y a des rayons plus Obliques que les autres.

On en peut dire autant des rayons qui partent de la base du Triangle & qui sont le Pourpre dautant que par la Reslexion il se rencon278 DES COVLEVES DE L'IRIS, tre qu'ils passent deux sois par la plus grande Opacité à l'esgard de ceux qui sont le Verd, en sorte qu'ils sont deux sois interieurs, au lieu que le Verd ne l'est qu'vne sois; et par

consequent ils doiuent estre moins clairs que luy de deux portions; Ausquelles si l'on adjouste l'essect de la plus grande Obliquité qu'ils ont, on trouuera que le Pourpre a prés



de 5. degrez & qu'il est à la Lumiere Souueraine en proportion triple comme nous auons montré.

Enfin apres que ces Couleurs lumineuses ont perdu leur esclat en passant dans l'air qui est au delà du Triangle; elles prennent la nature des Couleurs simples & sont paroistre sur la Muraille le Rouge, le Verd & le Pourpre; La Lumiere s'affoiblissant insensiblement insques aux degrez où ces especes de Couleurs doiuent estre. C'est pourquoy elles ne sont pas si sortes quand elles sont proches du Triangle

Triangle que quand elles en sont essoignées; par ce qu'elles n'ont pas encore perdu toute leur clarté & qu'elles se confondent auec la Lumiere exterieure; Il faut pour les mettre dans leur juste mesure & dans leur force naturelle, que par le progrez qu'elles sont dans l'air elles s'obscurcissent & se deschargent de cet esclat, qui comme nous auons dit fait toute la difference qu'il y a entre les Couleurs lumineuses & les Couleurs simples.

Or ce que nous venons de dire des Couleurs du Triangle, n'est qu'à l'esgard de la Lumiere du Soleil qui le trauerse. Car pour celles que l'on void sur les objects quand on les regarde à trauers, il y a d'autres considerations à faire que nous ne voulons pas examiner icy, n'estant pas necessaires à nostre dessein. C'est assez de sçauoir qu'elles ne sont pas lumineuses dans le Triangle comme celles que fait la clarté du Soleil; et que la Lumiere qu'elles portent auec elles est autant afsoiblie dans le Triangle, que l'autre l'est apres estre sortie du Triangle; et qu'ainsi les Couleurs qu'elle forme dans le Triangle sont dans la mesme proportion, que celles qui se voyent 280 DES COVIEVES DE L'IRIS, fur la muraille, si elles sont de mesme espece; ce que ie dis, parceque les especes en sont souvent differentes d'auec celles des autres lris.

Mais c'est trop s'arrester à des conjectures que nous reconnoissons n'estre pas assez bien appuyées pour pouvoir establir sur elles yn jugement certain de ce merueilleux changement: c'est yn mystere qu'à mon aduis les hommes ne sçauroient plainement decouurir, et ils se doiuent contenter de sçauoir en general, que la Refraction & la Reslexion en sont les principales Causes, & que par elles la Lumiere s'assoiblit insques à tels & tels degrez dans lesquels la Nature a rensermé les especes de chaque Couleur.

Or si cela se passe ainsi dans le Triangle, il faut que la mesme chose se fasse dans le Verre plein d'eau, puisque le mesme effect s'y rencontre; et quoy que les disserentes superficies qui composent le Triangle n'y soient pas si distinctement marquées, elles s'y trouuent neantmoins, & les diuerses faces du Verre sont le mesme effect que celles du Triangle. De sorte qu'apres que la Lumiere du Soleil s'est rompué en trauersant l'eau, la

plus grande partie de ses rayons passe au delà du verre; et l'autre au lieu de passer, se reflechit sur le derriere ou sur les costez selon. la cheute & l'incidence qu'ils ont faite; Et. de la ils retournent vers les parties interieures retombant enfin sur la masse de la Lumiere qui s'est rompuë & l'imbibant des Couleurs qu'ils ont acquises par ces diuerses Reflexions.

Mais apres auoir ainsi marqué les mouuemens que la Lumiere fait en ces deux phenomenes qui nous sont les plus connus & les plus faciles a examiner; ne pouuons nous pas maintenant asseurer, que les mesmes changemens se font dans la nuë où se forme l'Arcanciel; et que la Lumiere trouuant en elle les dispositions semblables à celle de l'eau & du chrystal, elle y souffre la mesme alteration. Car la nuë est transparente & doit par consequent donner passage aux rayons, et estant plus espaisse que l'air, ils s'y doiuent rompre & biaiser vers la ligne perpendiculaire comme ils font dans l'eau & dans le verre; mais par ce que tout corps dense qui brise la Lumiere, la reflechit aussi, il faut qu'vne partie de ses rayons se reflechisse sur les differentes

Nnii

furfaces qu'ils rencontrent dans cette nuë, & que dans les diuers retours qu'ils font ils retombent enfin sur la masse lumineuse & sé messent auec elle, la teignant des Couleurs que tous ces mouuemens leur ont données. Lesquelles toutes ensemble se respandent apres dans l'air & se font voir sur les nuës ou sur d'autres corps opaques qu'elles rencontrent dans leur passage.

Voila pource qui concerne les Couleurs de l'Iris en generale : le reste qui regarde la disposition qu'elles ont & les diuers changemens qui leur arriuent se verra dans le

Chapitre suiuant.



DE LA FIGURE

DE L'IRIS.

CHAPITRE TROISIESME.

L ny a aucune partie de la Phyfique où la Geometrie ait plus exercé son compas & sa regle & où elle ait plus formé de lignes & de cercles qu'elle a fait

en celle-cy. Car selon le fondement que chacun a posé, chacun a aussi basty diuersement ses Figures, par lesquelles il croit auoir demonstré & auoir conuaincu l'esprit & les yeux, que l'Iris se doit former en Arc. Mais outre que ces demonstrations pretenduës estant opposées entr'elles se rendent l'une l'autre suspectes de fausseté, la verité ne pouuant estre contraire à elle-mesme; elles supposent toutes que l'Iris se forme dans la nuë où elleparoist, qui est une hypothese absolument fausse comme nous auons montré; et les ynes

Nn iij

284 DE LA FIGURE DE L'IRIS. errent dans les principes de l'optique, les autres choquent le sens & l'experience.

Les Centres du Soleil de l'œil ne sot mesmeligne.

En effect la plus part mettent pour vn fonl'Iris & de dement certain & necessaire, que les centres pas en une du Soleil, de l'Iris & de l'œil se doiuent tousjours rencontrer en vne mesine ligne; quoy que cela soit contraire aux observations que Pic de la Mirande, l'Escalle, Fromond & cent autres ont faites, qui ont veu beaucoup d'Iris dont vne des cornes estoit bien plus proche de l'œil que l'autre. Et moy-mesme en ay remarqué vne entre autres dont vne des jambes respondoit si directement à mon œil, qu'il s'en falloit peu qu'elle ne luy fust perpendiculaire. Ioint que Licetus asseure en auoir veu deux vers le midy, le Soleil estant à l'Occident: ce qui ruine tout à fait cette ligne pretenduë. Apres tout puis qu'elle ne se trouue point dans les Iris artificielles, pourquoy sera elle necessaire dans l'Arcanciel? et puis qu'il y a vne nuë deuant le Soleil où les Couleurs de ce Meteore se forment & d'où elles se respandent apres sur les nuës opposées, pourquoy faut il que l'œil soit en vne autre situation que lors qu'il void sur les murailles les Iris des Verres & des Triangles qui se font de la mesme sorte.

Daillieurs ils veulent que chacun voye son semultiplie Iris particuliere, & qu'autant qu'il y a de per-nombre de sonnes qui considerent ce Meteore, il y ait ceux quila autant d'Iris differentes : parce disent ils que l'Axe qui doit passer par l'œil & par le centre du Soleil & de l'Iris, se change en chaque personne; et que les choses qui se voyent par Refraction & par Reflexion veulent estre considerées soubs vn angle certain & determiné, Hors lequel elles ne paroissent plus aux yeux: De sorte que chaque rayon visuel faisant vn angle different auec le rayon duSoleil reflechy ou rompu, il faut que chaque personne voye son Iris particuliere.

Mais puisque l'Iris que les Triangles & les Verres jettent sur la Muraille se void en toutes sortes d'aspects, & que la mesme est veuë par tous ceux qui regardent la muraille où elle est, pourquoy n'en sera-t'il pas de mesme de l'Arcanciel? pourquoy faudra-t'il le multiplier selon le nombre de ceux qui le voyent plustost que cette Iris qui se fait de la mesme façon & par les mesmes causes que luy. Aussi


L'Iris ne pas parle

286 DE LA FIGURE DE L'IRIS,

bien, le premier fondement sur lequel ils appuyent leur conjecture, qui est cette ligne qu'ils font passer par les centres du Soleil des yeux & de l'Iris, est faux comme nous venons de montrer: Et le second qui veut que les choses qui se voyent par Reslexion ou par Refraction ne peuuent estre apperceuës que soubs vn certain angle, a ses exceptions. Car bien que cela soit tousiours vray dans la Refraction & dans la Reflexion mesme qui se fait sur des corps polis & qui sont de la nature des miroirs; il ne l'est pas quand la Reflexion se fait sur des corps dont les surfaces sont inegales, lesquels font voir la Lumiere & les Images qu'ils reçoiuent en toutes sortes d'aspects & soubs quelque angle que ce soit. De sorte que l'Arcanciel paroissant sur la nuë qui est vn corps qui n'est point de nature speculaire & dont la superficie est toute inegale, il doit se presenter aux yeux en toutes sortes de veuës & ne peut estre restraint à ces angles determinez que demandent les objects qui se voyent dans les miroirs.

Et il est inutile de dire, que puisque l'Iris fuit ceux qui la suivent & qu'elle s'approche quand on s'essoigne d'elle, il faut qu'elle ait

de certains angles affectez lesquels venant à se changer changent aussi la situation qu'elle auoit auparauant. Car cela n'arriue que quand on la void sur les gouttes de pluye, lesquelles estant de nature speculaire n'en peuuent representer les Couleurs qu'en certains aspects & en des lignes determinées. Et ce phenomene se remarque quand la pluye est entre nous & la nuë où paroist l'Iris; et quand elle est entre nous & le Soleil: mais le premier se void par Reflexion & l'autre par Refraction comme la Figure suiuante montre. Et en l'vne & en l'autre les angles & les aspects en sont determinez : de sorte que si plusieurs personnes diuersement placées voyent l'Arcanciel sur ces gouttes de pluye, il est certain que chacun void le sien propre qui est different de celuy qui est veu d'yn autre.




288 DE LA FIGURE DE L'IRIS,

Mais il n'en est pas ainsi de l'Iris qui paroist sur la nuë laquelle se void en toutes sortes de lignes & d'aspects comme celles des Triangles pour les raisons que nous auons dites.

Ces deux Hypotheses estant conuaincuës de faux seruent de prejugé pour les raisons que l'on a bastiës dessus. A la verité on demonstre bien que d'vn point donné hors d'vn plan, on ne peut tirer beaucoup de lignes sur ce plan qu'elles ne fassent vn cercle sur luy si elles y tombent à angles esgaux; et que par consequent les rayons du Soleil qui frappent la nuë à mesmes angles y doiuent former vn cercle. Mais il ne s'ensuit pas delà que ce cercle réjaillisse aux yeux, s'il est vray comme ils disent que l'Iris ne se voye qu'en des aspects determinez. Et la raison en est que les angles de Reflexion sont tousiours esgaux à ceux de la cheute & de l'incidence; et qu'il est impossible que les rayons qui font ce cercle en tombant sur la nue puissent retourner vers les yeux en conseruant l'égalité des angles qu'ils font en l'incidence ; supposé que la Reslexion soit vniforme.

En effect que A, soit le Soleil & que ses rayons tombent comme ils disent sur la nuë

plate B.V.Y. Il est vray que les rayons qui auront les mesmes angles d'incidence formeront de necessité vn cercle sur elle. Mais il n'est pas vray que l'œil puisse remarquer ce cercle en quelque situation qu'il se mette, par ce qu'il faudroit que tous les rayons qui le composent se reflechissent vers luy. Ce qui est tout à fait impossible; car le rayon AB, pour conseruer l'égalité des angles d'incidence & de reflexion se doit par necessité reflechir en C, & AD en E, & AF en *. & ainsi des autres sans pouuoir concourir tous ensemble en vn seul point. Et par consequent, que l'œil soit placé dans la ligne perpendiculaire A L, qui passe par les centres du Soleil & de l'Iris comme ils pretendent, ou en quelque autre lieu que ce soit, il ne poura iamais receuoir que le rayon qui se deura reflechir en cet endroit. Ainsi il ne poura voir qu'vn point de ce cercle, bien loin d'en pouuoir apperceuoir la moitié ou vne partie, telle qu'elle se remarque dans l'Arcanciel.



290 DE LA FIGURE DE L'IRIS,

Il est vray que si la nuë estoit concaue comme quelques-vns se sont imaginez, ce concours de rayons se pouroit faire dans l'œil, mais telle concauité ne se peut trouuer dans la nuë comme nous auons montré.

Que l'Iris ne se fait pas dans les gouttes de pluye. Comme on a donc veu que la cause de la Figure de l'Iris ne se pouvoit trouver dans la Nuë plate ou concaue, on a pensé que les Gouttes de pluye dans lesquelles elle se resout, pouvoient rendre raison de ce phenomene. De sorte que les vns ont dit, que comme il y a vne infinité de rayons qui traversent chaque Goutte de pluye & qui en se rompant se reinissent en son fonds, de là ils se restechissent de tous costez à angles esgaux en sorte qu'il y en a tousiours quelqu'vn qui se porte à l'œil; et que tous les autres rayons qui partent des autres Gouttes dans les mesmes angles doiuent former vn cercle pour la raison que nous auons dite.

D'autres ont remarqué qu'vne bouteille pleine d'eau exposée au Soleil fait paroistre vn point Rouge en vn certain angle de reflexion, et que la Lumiere faisant le mesme effect sur les Gouttes de pluye dont la nuë est toute chargée & qui sont dans la situation que cet angle demande, produit le cercle Rouge que nous voyons dans l'Arcanciel.

Mais sans retoucher à ce que nous auons dit contre ces Gouttès; Outre qu'il faudroit que l'Iris ne parust que quand il pleut; qu'on ne la vist iamais que sur ces Gouttes; et que l'œil fust esgalement essoigné du cercle qu'elle fait, afin que ses rayons retournassent vers luy à angles esgaux ; qui sont des choses qui combatent l'experience comme nous auons montré cy-deuant. Il ne suffit pas d'auoir trouué dans la bouteille d'eau vn point Rouge par lequel on donne raison du cercle Rouge qui se void dans l'Iris; il faudroit encore y remarquer yn point Verd & yn autre de couleur Pourprée, pour satisfaire aux deux autres cercles qui sont peints de ces deux sortes de Couleurs. Et comme cela ne se peut faire en quelque situation qu'on se mette, & soubs quelque angle que l'on regarde la bouteille, il s'ensuit qu'on ne peut trouuer la cause des Couleurs ny de la Figure de l'Iris par ce phenomene.

Quant à l'opinion d'Albert le grand qui est Oo iij 292 DELAFIGURE DE L'IRIS,

L'Iris ne se fait pas das les vapeurs qui sont au deuant de la nuë.

à mon aduis celle qui approche le plus prez de la verité, par ce qu'elle ne veut pas que l'Iris se fasse dans la nuë où elle paroist, mais dans des vapeurs qui sont au deuant, dans lesquelles la Lumiere se change en Couleurs & les porte apres sur la nuë qui est derriere elles: Nous auons montré au commencement de cet ouurage qu'elle ne satisfaisoit pas à toutes les apparences de ce Meteore, & principalement à sa Figure. Dautant qu'elle met les vapeurs trop proches de la nuë pour pouuoir former vn si grand Arc; l'experience nous apprenant que plus le Verre plein d'eau est proche de la muraille, plus les cercles de son Iris sont petits; et que quand on esparpille l'eau deuant le Soleil, l'Arc qu'il produit est fort estroit, par ce que les rayons n'ont pas la liberté de s'estendre & de s'escarter iusques où il faudroit pour former vn plus grand cercle; tout de mesme que lors qu'ils passent par vn trou, la Figure du Soleil qu'ils portent auec eux est plus grande ou plus petite, selon que la muraille où ils s'arrestent est plus proche ou plus essoignée du trou. Et selon que l'on s'approche, ou que l'on s'esloigne des chandelles, les Couronnes qui se voyent à l'entour sont

plus grandes ou plus petites.

Enfin ceux qui disent que l'Arcanciel a la pascirculai-Figure circulaire par ce que c'est l'Image du reacause que c'est l'I-Soleil; ne sçauroient rendre la raison pour la-mage dusoquelle cette image ne se represente que dans leil. les bords du cercle; ny pourquoy elle ne paroist point en tout l'espace qu'il enuironne. Car dans les autres phenomenes qui ont la Figure du Soleil comme les Parelies & le rond que fait la Lumiere sur la muraille en passant par vn trou; tout ce qui est enclos dans la circonference de leur cercle est esclairé & lumineux. Et s'il est vray comme quelques-vns ont asseuré que pendant que le Soleil est en éclipse & la Lune en son croissant l'yn & l'autre forme des Arcanciels qui ont la portion d'vn cercle parfait; s'il est encore vray que l'on ait veu des Iris dont la Figure n'estoit pas parfaitement courbée en Arc; enfin si les Couleurs du Triangle & de ces Meteores qu'on appelle Verges, qui deuroient porter l'image du Soleil aussi bien que l'Iris, ne sont. pas circulaires; on ne sçauroit rapporter la Figure de l'Arcanciel à celle du Soleil.

En effect les Couleurs que la Lumiere pro-

294 DE LA FIGURE DE L'IRIS, duit ne sont point determinées de soy à aucune Figure particuliere. Car outre qu'il y en a qui l'ont tousiours droite comme celle des Triangles & des Verges; les vnes sont circulaires comme les Couronnes, les autres n'ont qu'vne portion de cercle comme l'Arcanciel, & l'Iris des Verres pleins d'eau, des Fontaines & des liqueurs qu'on esparpille auec la bouche deuant le Soleil. De sorte qu'on peut dire que la Figure de tous ces phenomenes depend absolument du Milieu par où passent les rayons, & des diuerses cheutes que la Lumiere y fait, & non point de la Figure du corps lumineux qui les produit, puis que la flamme de la chandelle qui est pyramidale fait vne Couronne parfaitement ronde.

Or s'il faut chercher la cause de celle qu'à s'Arcanciel en quelque autre subject qui nous soit plus familier & plus connu que luy, il n'y en a point qui nous y puisse mieux seruir que l'Iris des Verres pleins d'eau, laquelle a toutes les mesmes apparences qui se remarquent dans ce Meteore. Car elle n'a qu'vne portion de cercle comme luy, comme luy elle paroist souuent double, & quand cela arriue.

riue celle qui est la plus petite a ses cercles plus larges, ses Couleurs plus viues & les 2 disposées tout au contraire de celle qui est la plus grande, tout de mesme que l'Arcanciel. Cherchons donc la maniere auec laquelle le Soleil cause ses effects dans les Verres pleins d'eau, pour voir si elle se poura appliquer à la Nuë où se forme l'Iris.


Commentse

Il faut donc remarquer, que lors que l'on fait l'Iris expose au Soleil vn Verre plein d'eau, en sor-pleinsd'eau. te que les rayons tombent sur la surface de l'eau par l'ouuerture du Verre; apres qu'ils sont descendus au fonds & qu'ils ont repassé dans l'air, ils forment vne Iris qui a les Couleurs placées comme celles de l'Arcanciel ayant le Rouge en dehors & le Pourpre en dedans.

Mais lors que les rayons frappent le deuant du Verre & qu'ils le trauersent plus horisontalement, ils forment vne autre Iris qui est beaucoup plus grande & qui a les Couleurs disposées tout au contraire de la precedente, ayant le Rouge en dedans & le Pourpre en dehors; et toutes lesquelles sont beaucoup moins viues que les autres.

396 DE LA FIGURE DE L'IRIS,

Or on ne peut douter que ces diuerses cheutes des rayons ne soient la cause de ces deux Iris; puis que si l'on met quelque corps sur l'ouverture du Verre qui empesche que la



Lumiere ne tombe dedans, la premiere & la plus petite disparoist; tout de mesme qu'en couurant le deuant du Verre, la seconde &


la plus grande s'éuanouit.

Aussi ne paroissent-elles pas ensemble si le Soleil n'est en telle situation que ses rayons puissent en mesme temps tomber sur la surface de l'eau & sur le deuant du Verre; car lors qu'il est trop bas pour pouvoir jetter ses rayons sur la surface de l'eau & les faire passer iusques au sonds, la premiere Iris ne paroist point; non plus que la seconde quand il est trop esseué, & quand sa Lumiere ne peut penetrer en trauers le corps du Verre.

Il est encore certain que les rayons qui forment l'vne & l'autre se reiinissent en certains points au delà du Verre où ils font vne grande clarté, & que de là ils se respandent en Arc qui est plus grand ou plus petit selon que le corps qui les reçoit est plus ou moins esloigné du Verre. Et cette vnion vient des diuerses cheutes que les rayons font sur la superficie concaue ou conuexe du Verre, lesquels venant à passer dans l'air, se rencontrent necessairement l'vn l'autre & dans le point de cette rencontre se fait l'ynion dont est question.

Mais comme cette rencontre ne se peut faire qu'ils ne se coupent & ne se croisent en allant plus auant, c'est vne necessité que ceux

qui tiennent le desfus auant qu'ils s'vnissent, prennent le dessous apres que l'ynion s'en est faite. De sorte que le rayon B, qui estoit le plus haut auant qu'il se croisast auec le rayon A, est le




plus bas apres l'intersection, & A, devient le plus haut.

Pp ij

298 DE LA FIGURE DE L'IRIS,

Cela se peut confirmer par l'experience. Car si l'on couure peu à peu le deuant du Verre en commençant par le haut, le Rouge

de la grande Iris disparoist le premier; au contraire en començant par le bas, le Pourpre est le premier qui se cache. Et dans la petite Iris si l'on couure le costé droit de l'ouuertu-



re du Verre, la corne de l'Iris qui est à gauche disparoist, comme celle qui est à droit se perd quand on couure le costé gauche de l'ouuerture. De sorte qu'on ne peut douter que les rayons ne se coupent & ne se croisent en sortant du Verre.

Cela estant ainsi posé,il est facile de trouuer la cause de la Figure & de la Disposition des Couleurs qui se voyent en ces deux Iris. Car comme dans la premiere les rayons tombent obliquement sur la concauité du Verre qui leur est opposée & qui fait vne portion de cercle; quand ils viennent à passer au delà, il

faut qu'ils conservent la mesme Figure qu'ils ont prise dans cette cheute, puisqu'ils vont tousiours en droite ligne & qu'ils gardent tousiours la mesme inclination des angles de la Refraction qu'ils y ont soufferte; et par consequent ils ne peuvent former vn cercle entier leur cheute ne se faisant que sur vne portion de cercle. Il n'en est pas ainsi quand ils passent à trauers vne bouteille d'eau, car l'Iris qu'ils sont est toute ronde comme la bouteille, par ce qu'ils tombent sur toute la rondeur & qu'ils sont contraints apres l'intersection de garder la mesme Figure.

La mesme chose se fait à proportion dans la seconde Iris quand les rayons tombent sur le deuant du Verre qui fait aussi vne portion de cercle : car apres auoir trauersé tout le Verre & s'estre croisez en passant au delà, ils conseruent la mesme Figure qu'ils ont en


leur premiere cheute.

On void donc par ce discours la raison pour laquelle ces deux Iris sont courbes & n'ont qu'vne portion de cercle, et il est facile encore d'en tirer celle qui montre pourquoy l'vne est plus grande que l'autre. Car comme les

Pp iij

rayons qui frappent le deuant du Verre trauersent l'eau plus horisontalement, il faut qu'ils tombent au dessus de ceux qui passent par

l'ouuerture du Verre & qui descendent au fonds; et
par consequent ils
enferment ces derniers dans le cercle
qu'ils forment &
font vn plus grand
Arc, comme on
peut voir dans cette Figure.



tance au delà de laquelle ils s'escartent les.

vns des autres & ne representent que confusement les Couleurs. Or cela procede de la cheute & du ramas qui s'en est fait au fonds du Verre: Car dans le grand nombre qui y tombe & dans les diuersitez de l'incidence que chacun y fait, quand ils viennent à en sortir, ils s'vnissent en diuers endroits & par tout où cette vnion se fait, elle fait voir les Couleurs; mais quand il ne s'en fait plus, ou quand elles se fait de peu de rayons, elles disparoissent. Et c'est encore la raison pour laquelle la grande Iris est plus estroite que la petite, par ce que la Figure conuexe du Verre qui reçoit les rayons ne les ramasse pas en si grande quantité que la concaue & que l'vnion ne s'en peut faire qu'en vn petit espace.

Or ce ramas & ce concours de rayons rend les Couleurs sensibles qui ne le sont plus quand ils s'escartent & ce des-vnissent. Car bien que la Couleur soit vn affoiblissement de Lumiere, cela s'entend d'vn affoiblissement & d'vne diminution interieure & essentielle, & non de celle qui est accidentelle & exterieure comme nous auons dit page 105. Ainsi la Lumiere se doit affoiblir interieurement pour former les Couleurs de l'Iris, mais il faut

302 DES COVLEVES DE L'IRIS, qu'elle ait assez de cette force exterieure qui la rend plus claire & plus esclatante afin que les Couleurs paroissent; c'est pourquoy la clarté des chandelles en trauersant le Triangle ne fait paroistre aucun Iris: De sorte que les rayons qui ont passé à trauers le Verre plein d'eau se doiuent reiinir au lieu où son Iris paroist autrement ils sont trop foibles pour rendre D'où vient sensibles les Couleurs qu'ils portent auec eux.

la di positio des couleurs Verres.


Quant à la disposition des Couleurs, predel'Iris des supposant ce que nous auons dit cy-deuant, que les rayons les plus forts & qui par consequent sont les plus clairs forment les plus hautes Couleurs; d'où vient que dans les Couronnes & dans l'Iris que l'on fait en esparpillant de l'eau au deuant du Soleil, le Rouge est en dedans, par ce que le rayon qui le forme est plus fort & plus clair estant plus prez du corps lumineux lequel est comme le centre à l'entour duquel l'Îris est compassée; qu'au contraire dans le Triangle le Rouge est en dehors, le rayon qui le produit passant par la pointe du Triangle qui est moins opaque & plus esclairée que la profondeur. Apres auoir disie presupposé ces veritez, il sera facile de remarquer; que la Lumiere tombant oblique-

ment

ment sur l'ouuerture du Verre, tout le deuant qui est plus proche du Soleil est plus esclairé que le derriere & que par consequent les rayons qui passent plus prez de cet endroit se ressent de cette clarté & sont plus clairs que les autres qui passent vers le derriere du Verre. De sorte que B, est plus fort & plus clair que A, & doit par consequent sormer le Rouge; comme A, qui est plus essoigné de la partie la plus esclairée est plus obscur & plus foible & doit produire le Pourpre.

Au contraire quand la Lumiere frappe le deuant du Verre, tout le haut de l'eau qui


est plus proche du Soleil & qui est plus esclairé que le fonds, est cause que le rayon C, qui est plus prez de la surface de l'eau est plus fort & plus clair & doit par consequent former le Rouge, & D, le Pourpre.



304 DE LA FIGURE DE L'IRIS;

Mais par ce que tous ces rayons se croisent en sortant du Verre, il faut de necessité qu'ils changent de situation & que ceux qui es-

prennent le dessus prennent le dessus & partant que A, qui fait le Pourpre dans la petite Iris soit au dessous apres l'intersection puisqu'il tenoit le dessus en trauersant l'eau : et que B, qui forme le Rouge soit au des-




sus: comme dans la grande Iris le rayon C, qui cause le Rouge doit estre en dedans apres qu'il s'est croisé, & D qui fait le Pourpre, en dehors. Ainsi les Couleurs de ces deux Iris seront placées au contraire les vnes des autres & le Rouge qui occuppe le Cercle interieur en l'yne, sera l'exterieur dans l'autre.

Pour ce qui est de la viuacité des Couleurs qui est plus grande dans la petite Iris, cela procede non seulement de ce que les rayons y sont plus courts, l'experience nous faisant voir que plus ils s'alongent & plus ils s'affoiblissent; c'est pourquoy l'Iris du Verre plein d'eau s'éuanoiiit à la fin quand elle est trop esloignée: mais cela vient encore de ce que les rayons sont plus ramassez dans celle - cy qu'en l'autre qui est plus grande, par ce que la Figure concaue sur laquelle ils tombent, a la vertu de les reunir dauantage que la conuexe qui est au deuant du Verre. Aussi l'vnion s'en fait en vn point ou ils concourent tous, au lieu que dans la grande, l'vnion se fait en vne ligne qui est parallelle au diametre de l'eau exposé au Soleil comme on peut voir en mettant vne feüille de papier au derriere du Verre.

Il est maintenant question de sçauoir si l'on peut appliquer à l'Arcanciel ce que nous venons de dire de ces deux Iris; car s'il ny a rien qui le puisse empescher il seroit inutile d'aller chercher aillieurs les causes de la Figure & de la Disposition des Couleurs que nous y remarquons; et ce seroit obscurcir la verité si apres nous auoir paru clairement dans deux phenomenes qui nous sont si connus & qui sont si

so6 DE LA FIGURE DE L'IRIS, semblables à ceux de ce Meteore, nous la voulions tirer d'autres principes moins éuidens, & l'establir sur des raisons imaginaires, au prejudice d'une experience si certaine & si conuaincquante.

Premierement il est certain que la Nuë qui est deuant le Soleil peut receuoir ses rayons de la mesme sorte que le Verre plein d'eau, & comme celuy-cy les reçoit de haut en bas, ou de trauers selon que le Soleil est plus ou moins esleué, cette Nuë aussi se peut trouuer en telle situation que les rayons tomberont sur elle de la mesme maniere; de sorte que si le Soleil la regarde seulement du costé qui luy est opposé les rayons la trauerseront horisontalement comme ils font en tombant sur le deuant du Verre; mais s'il la regarde en sa partie superieure, leur cheute sera plus verticale & ils la trauerseront de haut en bas comme quand ils tombent sur l'ouuerture du Verre. Enfin si le Soleil peut esclairer en mesme temps le deuant & la partie superieure de la Nuë, il la trauersera par ces deux differentes cheutes de rayons & les vns iront de haut en bas & les autres de trauers.



On ne peut aussi contester que la Figure de cette Nuë ne puisse estre semblable à celle du Verre. Car comme ces sortes de corps prennent facilement la Figure ronde au jugement mesme des yeux, la partie qui sera exposée au Soleil sera conuexe tout de mesme que le deuant du Verre, & celle qui luy sera opposée aura sa concauité interieure comme le fonds du Verre. De sorte que si ces Figures causent quelque alteration à la Lumiere qui trauerse le Verre, il faut de necessité qu'elles fassent le mesme effect dans la Nuë & par consequent qu'elles fassent croiser les rayons en sortant hors d'elle, qu'elles les fassent respandre & se terminer en Arc sur les corps qui se trouueront dans leur passage, & qu'elles disposent les Couleurs dans le mesme ordre

Qq iij


308 DE LA FIGURE DE L'IRIS, qu'elles se voyent dans l'Iris des Verres pleins d'eau.

Or cette Rondeur de la Nuë est absolument necessaire pour former l'Iris en Arc, puisque la Figure de toutes les apparences de Couleurs que la Lumiere produit dépend du milieu par où elles passent comme nous auons dit; et c'est sans doute la raison pour laquelle on void rarement ce Meteore quand il fait de grands vens; par ce qu'ils corrompent cette forme ronde par l'agitation & le mouuement qu'ils causent dans la Nuë. Et de là vient encore qu'il y a souuent des Nuës qui apparemment sont propres à changer la Lumiere en Couleur, qui pourtant ne produisent point l'Iris, par ce qu'elles n'ont pas la Figure qui est necessaire à sa production, & font seulement paroistre ou les verges ou quelques confusions de Couleurs que l'on remarque souuent dans ces corps-là.

Il est encore necessaire que les rayons s'vnissent & se croisent en sortant de la Nuë, autrement il faudroit que le Rouge sist tousjours le Cercle interieur de l'Iris & que le Pourpre sust toussours en dehors comme il arriue quand elle paroist double. Car puisque


CHAPITRE III.

l'Iris simple se fait ordinairement quand la Lumiere du Soleil trauerse le bas d'vne nuë qu'elle ne peut penetrer dans sa plus grande profondeur à cause de l'espaisseur qu'elle a, comme i'ay souuent obserué; il faut que le rayon qui produit le Rouge soit le plus clair & par consequent que ce soit celuy qui passe par le bas & par l'extremité de la Nuë, par ce qu'il rencontre moins d'opacité & qu'il est plus esclairé que ceux qui la trauersent par le haut; tout de mesme que dans le Triangle celuy qui passe par la pointe est le plus clair & forme tousiours leRouge. Or si cela est ainsi le Rouge sera au dessous des autres Couleurs,& fera le cercle interieur de l'Iris: cependant il paroist au dessus & est tousiours exterieur; il faut donc qu'il change de place & cela ne se peut faire que par l'intersection & le croisement des rayons.



310 DELAFIGURE DE L'IRIS,

On en peut dire autant de l'Iris redoublée qui a toussours le Rouge en dedans, car le rayon qui le produit est le plus haut en tra-uersant la Nuë: Mais venant à se croiser il prend le bas & forme le cercle interieur.



Auec tout cela, il faut que le corps de la Nuë soit d'une consistence esgale & vnisorme sans qu'il y entre des parties qui soient plus espaisses que les autres & qui soient de diuerse Figure; car cela rendroit la Refraction inegale & corromproit les Couleurs & la Figure de l'Arc, tout de mesme qu'il arriue à l'Iris des Verres quand l'on met dans l'eau des pieces de chrystal de differente Figure.

II

Il faut encore que le corps de la Nuë soit assez grand & estendu; car commè vn petit Triangle quoy qu'il produise les mesmes Couleurs qu'vn plus grand, ne les rend pas neantmoins si esclatantes que celuy-cy; et que plús il y a d'eau dans le Verre, plus l'Iris est viue & se jette plus loin: Aussi quoy que la Nuë pour petite qu'elle soit puisse former les Couleurs de l'Arcanciel, neantmoins elle ne les peut rendre assez fortes pour se respandre sur les nuës qui luy sont opposées, si elle n'a vne masse considerable qui soit assez ample pour receuoir beaucoup de rayons, lesquels deuenus plus forts par le nombre & par le concours qu'ils font, se portent & se respandent plus loin. Et c'est pour cela sans doute que toutes nos Iris artificielles ne se voyent que de fort prez, par ce qu'elles se font toutes en des corps qui sont de petite estenduë & qui ne reçoiuent que fort peu de rayons.

Cette grandeur de la Nuë doit pourtant estre proportionnée à la force des rayons, car si elle est si profonde ou si espaisse qu'ils ne la puissent penetrer, il ne se formera point d'Arcanciel: c'est pourquoy on le void moins souuent durant l'Hyuer qu'au Prin-temps & à l'Automne, par ce que les Nuës sont trop grandes & trop espaisses en cette saison. Et c'est en cela que l'Iris est vn signe naturel que la pluye ne peut estre grande ny de longue durée, par ce que les Nuës qui le forment ne sont pas assez grosses ny assez chargées d'eau pour produire cet essect.

Il arriue neantmoins tres-souuent que la Nuë se trouuant sort grande & sort espaisse, la Lumiere ne laisse pas d'y trouuer passage par ses extremitez; de sorte que quand elle trauerse le bas de la Nuë, elle produit l'Arcanciel ordinaire qui a le Rouge en dehors; et lors qu'elle passe par le haut, l'Arcanciel a le Rouge en dedans pour les raisons que nous

auons dites.

Mais on pouroit objecter, que si cela estoit veritable l'on pouroit voir l'Iris toute seule ayant le Rouge en dedans; car il se peut faire que la Lumiere trauersant le haut de la Nuë & ne trouuant point de passage par le bas, produira l'Arcanciel qui aura le Rouge en dedans; rout de mesme que passant seulement par le bas elle le produit ayant le Rouge en

dehors. Cependant il n'y a aucune observation qui marque que l'on ait veu l'Iris simple ayant le Rouge en dedans & le Pourpre en dehors.

Mais quoy que nous ne trouuions point dans les escrits des Philosophes qu'on ait veu cette Iris, il ne s'ensuit pas pour cela qu'il ne s'en soit formé souuent de pareilles dans les Nuës. Car puis que la grande Iris des Verres pleins d'eau qui a ses Couleurs disposées de la sorte, paroist souuent sans que la petite se voye, il en peut autant arriuer a l'Iris celeste; et il ne faut pas s'estonner si lors qu'elle a paru on n'a pas pris garde à l'ordre de ses Couleurs, puis que ceux qui ont dit en auoir veu vne troisiesme qui enuironnoit les deux autres, auoüent ingenuëment n'auoir pas remarqué comment les Couleurs en estoient disposées. Comme c'est vn Meteore qui est de peu de durée, on ne s'aduise pas tousiours d'en considerer tous les accidens, ny toutes les circonstances; et ie m'asseure qu'il y en a beaucoup qui ont veu l'Iris des fontaines, des chandelles & des Verres, qui ne sçauroient dire l'ordre & la disposition de leurs Couleurs.

Apres tout s'il en faut demeurer aux obser-

DE LA FIGURE DE L'IRIS. 314 uations communes, on doit dire que comme la seconde Iris qui a le Rouge en dedans, se fait quant les rayons trauersent la Nuë horisontalement, tout de mesme que lors qu'ils passent par le deuant du Verre; il est impossible si la Nuë est grande & fort espaisse, qu'ils la puissent trauerser ainsi; par ce qu'il faudroit qu'ils penetrassent toute sa profondeur dans laquelle il est certain qu'ils seroient offusquez. Ainsi elle ne sçauroit paroistre que lors que la Nuë est mediocre; et alors la premiere & la plus petite la doit accompagner; Ainsi elle ne peut estre remarquée toute seule comme l'autre.

On pouroit encore adjouster à ces conditions que la Nuë doit auoir la mesme consistence que l'eau qui est dans les Verres & par consequent qu'elle se doit fondre en pluye. Mais puis que les Couronnes qui se voyent à l'entour des chandelles & que les Couleurs qui paroissent au leuer & au coucher du Soleil se sont dans les vapeurs toutes simples; il n'est point necessaire que la Nuë se change en cau pour former l'Arcanciel qui paroist souvent sans qu'il pleuue. Il est vray que lors qu'elle est en cette disposition elle produit de

CHAPITRE III.

315 plus viues Couleurs, & par ce que la transparence en est plus vniforme & par ce que la Refraction y est plus grande, l'eau estant plus dense que les vapeurs.

Concluons donc que l'Arcanciel se fait de la mesme sorte que l'Iris des Verres pleins d'eau, et que les mesmes causes & les mesmes conditions qui sont necessaires à la production de celle-cy, se doiuent rencontrer à la naissance de ce Meteore. De sorte que la Nuë doit receuoir la Lumiere de la mesme maniere que le Verre, & doit auoir la mesme Figure pour faire croiser les rayons, pour les disposer en Arc, & pour mettre les Couleurs dans l'ordre qu'elles ont.

Et certainement quand il ny auroit autre Laz. Irisne conformité entre ces deux phenomenes, que sefait point le redoublement de l'Iris qui se fait en l'vn & kion. en l'autre; et que pour sçauoir la cause du second Arcanciel on n'est point obligé de recourir à la Reflexion du premier, puis qu'il est certain que la seconde Iris des Verres ne se fait point ainsi; quand il ny auroit disie que cette seule conformité entre ces deux pheno-

Rr iii

316 DE LA FIGURE DE L'IRIS, menes, elle suffiroit pour faire croire qu'ils se font tous deux d'vne mesme façon. En essect il n'y a rien de si peu soustenable en tout ce que l'on a dit de l'Arcanciel que cette Reflexion pretenduë. Car il faudroit puisqu'elle est la cause du renuersement des Couleurs, qu'elle le fust aussi du renuersement de la Figure & qu'ainsi le second eust les cornes vers le Ciel comme le premier a les siennes vers la terre. Daillieurs il faudroit que la Nuë sur laquelle se fait cette Reflexion fust vn miroir parfaict ce qui est contre la nature des vapeurs : et quand elle le seroit, il faudroit que les rayons qui font les Couleurs de la premiere Iris se reflechissent esgallement vers la Nuë où la seconde se fait, & vers l'œil qui les regarde. Ce qui est tout à fait impossible; vn miroir ne pouuant reflechir vn mesme object en des lieux opposez: rar ce qu'il faut que l'angle de la reflexion soit esgal à celuy de l'incidence, et que le rayon qui fait telle couleur n'ayant qu'vne incidence, ne peut se reflechir que vers vn seul endroit. Enfin il faudroit que la seconde Iris fust tousiours esgalement distante de la premiere; par ce que la reflexion se fait en des angles determinez qui ne se peuuent changer: Cependant les observations que l'on a faites nous apprennent que la distance qui est entre elles, est tantost plus grande & tantost plus petite.

Quelques-vns qui ont veu les absurditez de cette opinion ont tasché de trouuer d'autres causes de ce redoublement; mais quelque effort qu'ils y ayent fait ils n'y ont pas mieux reissi; et quoy qu'ils satisfassent à quelques-vnes de ces dissicultez, il en demeure tousiours d'autres qu'ils ne peuuent resoudre. Mais il n'y en a pas vne qu'on ne leue en le rapportant à la mesme cause qui fait le redoublement de l'Iris des Verres pleins d'eau: de sorte que ce seroit vn aueuglement ou vne opiniastreté, si dans la recherche d'vne verité si cachée on ne se laissoit pas conduire par vn phenomene si sensi-

Ramassant donc ensemble ce que nous en auons dit en diuers endroits, nous pouuons asseurer que l'Iris ne se forme iamais qu'il ny ait vne Nuë entre le Soleil & le lieu où elle paroist; que cette Nuë ne doit pas estre si grande ny si espaisse que la Lumiere ne la puisse penetrer, ny si petite qu'elle ne soit capable de receuoir beaucoup de rayons; qu'il faut qu'el-

DE LA FIGURE DE L'IRIS. le soit exposée au Soleil de telle sorte que ses rayons la trauersent obliquement de haut en bas, comme quand ils tombent sur l'ouuerture du Verre; et qu'elle doit estre ronde comme il est en son fond. Car ayant toutes ces conditions la Lumiere venant à la penetrer, s'affoiblit en certaines proportions & prend les Couleurs de l'Iris par la Refraction & par les diuerses Reflexions qu'elle y souffre. En sorte neantmoins que le rayon qui passe par la partie la plus proche & la plus esclairée du Soleil, se teint en Rouge; et celuy qui passe par la partie la plus obscure, se change en Pourpre & celuy du milieu en Verd: mais tous ces rayons rencontrant le fond de la Nuë qui est rond, se croisent quand ils en sortent, changent ainsi l'ordre & la disposition des Couleurs mettant le Rouge au dessus qui estoit auparauant au dessous, & se respandent en Arc qui est plus grand ou plus petit selon qu'ils s'esloignent du point où ils se sont croifez.

Que s'il arriue que la Nuë ait du costé qu'elle est exposée au Soleil, vne Figure inesgale & irreguliere, comme si elle est plate en vn endroit droit & ronde en l'autre, ou qu'elle ait deux differentes rondeurs; alors l'incidence des rayons fe change & il faut qu'vne partie des rayons la penetre de haut en bas & l'autre en trauers; comme il arriue au Verre plein d'eau: Ainsi il se fait vn double Arcanciel qui a ses Couleurs disposées au contraire du premier, à cause que le rayon qui passe par la partie superieure de la Nuë estant plus esclairé produit le Rouge, & celuy qui la trauerse par le milieu se change en Pourpre; et tous deux venant à se croiser, changent de situation, le Rouge se mettant au dessus; forment vn plus grand Arc estant plus esleuez que ceux qui tombent de haut en bas; & font les Couleurs plus terniës, les rayons y estant moins ramassez & frappant la veuë de plus loin.

Ces veritez ainsi establiës ne saissent aucune difficulté en cette matiere qu'on ne puisse facilement resoudre & mesme font voir clairement les causes des apparences les plus extraordinaires qu'on ait remarquées en ce Meteore.

Car quand l'Iris paroist sur les arbres, sur le roist ailbrouillard, sur la terre, cela vient de ce que surla Nues

Pouranoy: Piris paces corps se rencontrent dans le passage des rayons qui sortent de la Nuë. Et il arriue quelquesois que le Soleil & cette Nuë sont si proche du Zenit que l'Arc tombe immediatement sur la terre, ne rencontrant point d'autre corps en l'air qui le puisse receuoir : souuent aussi l'Arc passe au delà des Nuës qui le sous-tiennent & descend iusques sur les arbres, sur les maisons & sur la terre mesme où il paroist estendu.

Il peut paroiftre heaucoup d'Iris ensemble. Daillieurs on void par là que l'Arcanciel peut paroistre vers le Midy le Soleil se couchant, comme a obserué Lycetus; qu'on en peut voir mesme iusques à trois pendant l'Hyuer, l'vn à l'Orient, l'autre au Nort, & l'autre à l'Occident comme Albert le Grand, Auersa, & autres ont remarqué; quoy que l'on ait tenu cela comme vne chose impossible à cause que les centres du Soleil de l'Iris & de l'œil doiuent estre à ce qu'ils disent en vne mesme ligne; mais ce sondement est saux comme nous auons montré. Le premier de ces phenomenes despend donc de la situation de la Nuë qui doit estre vers le Midy & en auoir d'autres plus auancées où les Couleurs s'arres-

CHAPITRE III.

321

tent & se fassent voir : Et pour l'autre il demande autant de Nuës differentes & diuersement placées qu'il paroist d'Arcanciels.

Deux Iris

Ce que l'on dit mesme qu'il s'en est veu se peuvens deux sur vne mesme Nuë qui se croisoient & l'autre se couppoient l'vn l'autre, n'est pas contraire ànos principes, quoy qu'il ne se puisse soustenir dans les autres opinions. Car cela peut estre arriué par la rencontre de deux Nuës qui se sont trouvées au deuant du Soleil, chacune ayant donné passage aux rayons en differens biais, & en ayant causé l'intersection en deux diuers endroits; d'où il a fallu qu'il se soit fait deux Iris, lesquelles ont deu necessairement se coupper sur la Nuë ou ils ont paru; par ce que deux cercles dont les centres sont renfermez dans la circonference de l'vn & de l'autre doiuent necessairement se croiser s'ils se rencontrent sur vn mesme plan.

On peut encore rendre raison de l'irregularité des Figures que l'on a remarquées dans l'Iris, car Vitellio asseure d'en auoir obserué quelques-vnes qui formoient vn cercle entier; on en a veu qui auoient les cornes en haut

d'autres qui auoient vn costé plus courbe que l'autre; d'autres qui estoient en demy cercle ouale.


L'Iris peut paroistre toute ronde.

Pour le premier, ou Vitellio a pris les Couronnes pour des Iris, ou bien cela est arriué par la rondeur parfaite de la Nuë sur laquelle la Lumiere est tombée, de la mesme façon que lors qu'elle passe à trauers vne bouteille d'eau toute ronde, elle forme vne Iris dont le cercle est entier, mais dont le diametre est plus petit que celuy de l'Iris des Verres.

L'Iris peut paroistre renuersée. Quant au renuersement des cornes de l'Arcanciel, i'approuue bien ce que quelques-vns ont dit que cela se fait par la Reslexion des rayons du Soleil donnant sur l'eau de la Mer ou de quelque lac: Mais cela ne sussit pas pourtant si l'on ne montre comment ces rayons se colorent: Car la seule Reslexion ne ses change pas en couleur, & ils ne la prennent pas aussi dans la Nuë où l'Arcanciel paroist renuersé, autrement il faudroit qu'il eust la mesme Figure qu'il a ordinairement. De sorte qu'il est necessaire que l'Arcanciel se fas-se premierement dans vne Nuë comme il se

CHAPITRE III.

323 fait d'ordinaire & que ne se trouuant aucun autre corps qui le reçoiue que l'eau de la Mer ou d'vn lac, il réjaillisse apres sur quelque Nuë qui se trouue proche de la surface de l'eau, ou plustost sur les gouttes de pluye dans lesquelles elle se resout, & qui estant de nature speculaire represente l'image de l'Iris qui est tombée sur l'eau, à la maniere que font les miroirs, c'est à dire auec la Figure & les Couleurs renuersées.



324 DE LA FIGURE DE L'IRIS,

Vne des. cornes de l'Iris peut estre plus courbe. Enfin quand il y a vne des cornes qui paroist plus courbe, cela procede de la Figure irreguliere de la Nue sur laquelle elle paroist: car si elle a des eminences & des profondeurs considerables, l'Iris qui se couche sur elle & qui suit le plan qui la doit soustenir, cache quelques-vnes de ses parties dans les concauitez qu'elle rencontre & fait ainsi paroistre son cercle moins ouuert en ces endroits.

L'Irisoua-

Et quant à la Figure ouale qu'on y remarque elle se fait par les rayons qui ont coulé sur des Nuces estendues en long, lesquelles en allongent le cercle, comme il arriue à l'ombre d'vn globe qui prend la mesme Figure quand elle s'estend sur quelque plan.

Le cercle de l'Iirs n'est pas tous jours esgal.

Ce qui poura faire plus de difficulté c'est que le cercle dont l'Iris fait vne portion, semble estre tousiours de mesme grandeur. Car si elle se fait comme nous auons dit, par le croisement des rayons, il faudra que l'Arc qui s'en formera paroisse plus grand ou plus petit selon qu'il sera plus ou moins essoigné du point de l'intersection. Mais cette supposition est conuaincue de faux par l'experience & par le tesmoignage de ceux qui ont traité de ces

matieres: car les anciens Philosophes ont creu que le demy diametre de l'Iris estoit de 42. degrez, Vitellio & quelques autres l'ont fait de 45. Porta n'en a trouué que 32. I'en ay obserué vne qui en auoit plus de 60. comme ie diray cy-apres: et mesmes Aristote & tous ceux qui sont venus apres luy asseurent que l'Arcanciel qui paroist proche de l'orison, quoy qu'il soit plus petit que lors qu'il est plus esleué, fait tousiours vne portion d'vn plus grand cercle. De sorte que c'est vne chose certaine & qui ne peut estre contestée que le cercle de l'Iris n'est pas tousiours esgal & qu'il est tantost plus estroit & tantost plus large, tout de mesme que celuy des Verres pleins d'eau, des fontaines, & des Couronnes.

Il faut neantmoins confesser que cette difference n'est pas grande & que c'est en cela qu'on pouroit objecter auec quelque apparence de raison que le principe que nous auons posé, ne peut estre veritable. Car si les rayons se croisent en vn certain point, & que delà ils s'escartent & se respandent en Arc; il faudra que cet Arc prenne toutes sortes de grandeurs selon qu'il s'esloignera de ce point; et que les Nuës qui se trouueront en son passa326 DE LA FIGURE DE L'IRIS.

ge, comme cela peut souuent arriver, le sassent voir non seulement de 45. degrez de demidiametre, qui est sa plus grande hauteur a ce qu'ils disent, mais encore de 20. de 10. de 5. & de moins encore, qui sont des choses que l'on n'a iamais veuës.

Mais il est facile de leuer cette difficulté si l'on considere que le point de l'intersection se fait au dessous de l'espace où les Nuës sont rensermées & qu'ainsi les rayons tombant de haut en bas comme nous auons dit, ne se peu-uent croiser au sortir de la Nuë qu'en vn endroit qui soit encores plus bas qu'elle. De sorte que venant à se respandre dans l'air, ils ny peuuent rencontrer aucune Nuë que celle qui est opposée à ce point d'intersection & au Solieil.

Et c'est la raison pour laquelle l'Arcanciel fait vne portion d'vn cercle qui pour l'ordinaire est de mesme grandeur; par ce que l'espace où les Nuës sont rensermées, estant esgalement essoigné de la terre selon les saisons, est en quelque saçon spherique, & que l'on ne peut assigner d'endroits opposez en vn cercle qui ne soient esgalement distans l'vn de l'autre.

Mais aussi comme cette sphere de Nuës n'est pas si reglée en sa Figure, qu'il n'y en ait quelques-vnes de plus basses ou de plus hautes, il peut arriuer qu'il y en aura de plus ou de moins essoignées du lieu où les rayons se coupent, & en ce cas l'Iris fera vne portion de cercle vn peu plus grand ou vn peu plus petit.

On peut rapporter icy la Figure de cette Iris redoublée que Fromond dit auoir remarquée en 1625, laquelle paroissant sur vne Nuë essoignée d'enuiron vn quart de lieuë, vne de ses cornes vint à s'approcher si prés de luy, qu'il n'y auoit pas plus de 30. pas de distance, & vint. enfin iusques à prés de dix pas; en sorte neantmoins que la seconde Iris sembloit s'estressir & s'approcher de la premiere à mesure qu'elle s'auançoit. Car cela ne venoit que de la pluye qui tomboit entre luy & la Nuë qui la soustenoit; Laquelle à mesure qu'en tombant elle s'approchoit de luy, faisoit paroistre la partie de l'Iris qui estoit receuë sur les gouttes plus proche & en suitte plus estroite; le point de l'intersection estant alors moins esloigné: c'est pourquoy quand la pluye fust cessée, elle reprit sa premiere place & sa pre328 DE LA FIGURE DE L'IRIS, miere Figure comme il remarque luy-mesme.

Il y a neantmoins vne autre chose qui peut eslargir le cercle de l'Arcanciel, à sçauoir quand les rayons tombent moins obliquement sur la premiere Nuë: Par ce qu'en venant à la trauerser, ils s'estendent & s'essargissent: Et alors non seulement le cercle s'augmente, mais encore les bandes des Couleurs paroissent plus larges. Car cette verité outre qu'elle est demontrée dans l'optique, se peut prouuer par l'experience des Triangles & des Verres pleins d'eau; puis que si l'on tourne le Triangle, ou si l'on fait pancher le Verre en sorte qu'ils reçoiuent les rayons moins obliquement qu'ils ne faisoient, le cercle & les bandes des Couleurs qu'ils produisent s'essargissent. Et c'est là sans doute la raison pour laquelle l'Arcanciel qui est fort proche de l'orison fait vne por-L'Irisqui tion d'vn plus grand cercle; pautant que le est plus lar. Soleil deuant estre fort haut pour produire cette Iris, & la Nuc où elle se doit former se trouuant proche de luy, il faut que ses rayons la penetrent moins obliquement, et par consequent que la masse de la Lumiere qui passe à trauers & qui s'est rompuë, s'esten-

rasel orison ge & fait partie d'un plus grand cercle.

de, s'essargisse & rende ainsi le cercle plus grand & les bandes des Couleurs plus larges.

Ie sçay bien que l'opinion commune asseure que cette apparence est vne pure tromperie de l'œil qui reduit tousiours autant qu'il peut les lignes courbes aux droites, d'où vient que la terre & la mer quoy que rondes semblent estre plates; et qu'ainsi nous faisant paroistre l'Arcmoins courbe qu'il n'est, il nous fait croire aussi que le cercle en doit estre plus grand. Mais cette raison seroit peut-estre bonne s'il n'y auoit que la grandeur du cercle à considerer; Il y a encore la largeur des bandes, où l'œil ne nous abbuse point, estant en effect plus grande en cette Îris qu'elle n'est aux autres: De sorte que cette raison qui ne satisfait pas à cette apparence, n'est point receuable & ne montre point la veritable cause de ce phenomene.

Quelques-vns ont creu que l'espece & l'image de cet Arcanciel se rompt en passant par les vapeurs qui sont entre nous & luy,& que cette Refraction le fait paroistre plus grand, comme il arriue aux Astres qui se leuent ou qui se couchent. Mais si cela estoit veritable, il faudroit que les cornes de toutes les Iris qui 330 DE LA FIGURE DE L'IRIS,

tombent sur l'orison parussent plus larges que le haut de l'Arc, puisqu'elles doiuent auoir la mesme Refraction & trauerser les mesmes vapeurs; ce qui neantmoins est contraire à l'ex-

perience.

Et l'exemple des Astres est inutile icy, parce qu'il n'y a pas tant de vapeurs entre cette Iris & nous, qu'il y en a entre les Astres; la Nuë où elle paroist estant fort proche, & le plus grand essoignement qu'on ait remarqué dans l'Arcanciel ne passant point trois milles de distance; de sorte qu'il n'y a pas assez de vapeurs dans si peu d'espace pour causer vn si grand changement comme il paroist dans la grandeur du cercle & dans la largeur de ses bandes. Il faut donc en reuenir à la cause que nous en auons donnée qui est indubitable estant fondée sur les maximes de l'optique & consirmée par l'exemple des Couleurs des Verres & des Triangles comme nous auons dit.

Qu'elle est la plus grande hauteur de l'Iris.

Il ne faut pas oublier icy à dire ce que nous pensons de la plus grande Hauteur de l'Iris, c'est à dire de combien elle s'esseue sur l'orison quand elle paroist au coucher ou au leuer du Soleil. Car les observations que l'on en a faites estant differentes, il faut ou qu'il y en ait de fausses, ou qu'estant toutes veritables on trouue la raison pour laquelle la mesure de ce phenomene est diuers en diuers temps. Tous les anciens Philosophes l'ont faite de 42. degrez, Vitellio, Kepler & Maurolicus l'ont mise à 45. Porta n'en a trouué que de 38. Et ie suis asseuré d'en auoir veu vne en 1625, qui alloit iusques au delà du soixantiesme. Car quoy que ie ne l'aye pas mesurée exactement, si est-ce qu'au jugement de mes yeux il s'en falloit peu qu'elle n'occupast la moitié de l'hemisphere: Desorteque ie tiens pour certain qu'elle passit de beaucoup la plus grande mesure qu'on luy a donnée. Quoy qu'il en soit il n'y a pas d'apparence que tous les Anciens se soient trompez dans leur calcul, & que Porta qui a esté fort expert & exact observateur, se soit mesconté au sien. Et partant il faut tenir pour constant que la hauteur de l'Iris qui se forme quand le Soleil se leue ou se couche, n'est pas tousiours esgalle & qu'elle est tantost plus grande & tantost plus petite; et que cette diuersité vient principalement de la situation de la Nuë qui est deuant le Soleil; car bien qu'il soit en son Occident & qu'il rase tout à fait

Tt iij

l'orison, cette Nuë peut estre plus esseuée & former vne plus grande portion de cercle, comme elle en forme vne moindre, si elle se trouue plus basse. D'où il sensuit que la maxime que l'on a posée, que l'œil void tousiours l'Iris par vn angle demidroit & qu'il est autant essoigné du cercle de l'Iris que son centre est essoigné de la circonference, n'est pas tousiours veritable comme d'autres ont dessa remarqué.

Qu'elle est la distance des deux Iris:

Vne pareille difficulté se trouue pour la distance qu'il y a entre la premiere & la se-conde Iris, que l'on tient communement estre tousiours esgale. Mais puis que Maurolicus la fait de 7. degrez & ; oue Porta ne luy en donne que 4. Que Formond confesse qu'elle luy paroissoit plus petite à mesure qu'il voyoit les deux Iris s'approcher de luy; et que mesme Auersa en a obserué qui n'auoient aucune separation entre elles; il faut tenir pour asseuré que cét espace n'est pas tousiours esgal & qu'il est tantost plus large & tantost plus estroit. Or cette diuersité vient de deux causes, la premiere est le different passage que les rayons sont à trauers la Nuë où l'Iris se forme, car selon que

ceux qui font la seconde passent plus prés ou plus loin de ceux qui causent la premiere, la distance en est plus grande ou plus petite. Et ce different passage procede en partie de la diuerse incidence qu'ont les rayons en tombant sur la Nuë; en partie de la diuerse Refraction qu'ils souffrent quand ils en sortent : ce qui prouient des diuerses Figures qu'elle peut auoir. L'autre cause est l'essoignement du point de l'intersection; car plus l'Iris double est esloigné de ce point, plus les cercles en sont grands & plus la distance qui est entre l'yne & l'autre, est large. C'est ainsi que l'espace que Fromond remarquoit entre ses deux Iris luy paroissoit plus petit quand elles s'approchoient de luy par le moyen de la pluye, & qu'il retourna à sa premiere grandeur quand elles reprirent leur premiere place, la pluye estant cessée comme nous auons dit cy-deuant.

Il nous reste deux choses à examiner dont les causes sont à mon aduis plus cachées que la quatriefde quelque autre apparence qu'il y ait en ce me bande Meteore. La premiere, pourquoy lors que l'Arcanciel est fort vif & esclatant, il s'y fait vne quatriesme bande de Couleur Iaune qui

334 DE LA FIGURE DE L'IRIS, est entre celles du Rouge & du Verd. Car si l'on considere l'ordre naturel des Couleurs le jaune n'est pas en sa place & ne garde pas le rang que le partage de Lumiere a donné à toutes les autres; puis qu'il est constant qu'il est plus lumineux que le Rouge, & qu'il deuroit par consequent estre au dessus de luy, comme le Rouge est au dessus du Verd & le Verd au dessus du Pourpre. La raison mesme qu'on a donnée de cét effect & qui est generalement approuuée de tous les Philosophes, augmente la difficulté: car ils disent tous apres Aristote que cette Couleur n'est pas du genre des autres & qu'elle n'est pas reelle comme elles; mais que c'est vne tromperie de l'œil qui juge que l'extremité du Rouge qui touche le Verd, est blanche; la proximité d'vne couleur plus obscure luy faisant paroistre l'autre plus claire qu'elle n'est: et qu'il en arriue comme dans les nuances, où le voisinage des Couleurs abuse souuent les yeux seur faisant paroistre vne couleur pour vne autre.


Mais s'il faut juger de la nature de cette Couleur par les Iris artificielles, on trouuera qu'elle est aussi reelle que pas vne des autres. Car

Car dans les Couleurs du Triangle entre le Rouge & le Verd, il y a tousiours quelque espace qui est jaune, & qui est incomparablement plus clair & plus lumineux que le reste; En sorte que les objects qui sont dans cet espace sont plus esclairez & se font voir plus distinctement que ceux qui sont soubs les autres Couleurs. Or si ce n'estoit qu'vne erreur & vne tromperie de l'œil, cet espace ne seroit pas plus esclairé que celuy qui occupe le Rouge; puis que dans la supposition, le Iaune que l'on y void n'est rien que le Rouge qui semble estre plus clair à cause du voisinage du Verd; mais qui en effect ne l'est pas dauantage. Dailleurs si ce voisinage estoit cause de ce changement, il faudroit que ce mesme Rouge parust Iaune du costé qu'il est enuironné de la Nuë, aussi bien que du costé qu'il touche le Verd; parce que la Nuë qui doit estre fort espaisse & fort noire pour faire paroistre cette quatriesme couleur, est plus obscure que n'est le Verd & doit par consequent rendre le Rouge plus clair que celuy-cy ne peut faire. Il faudroit encore qu'en regardant les objects à trauers le Triangle, le Rouge qui tient le milieu & qui est immediatement

336 DELAFIGURE DE L'IRIS, au dessus du Bleu, eust ces extremitez jaunes puis que le Bleu est vne Couleur plus brune que le Verd. Si c'est donc vne Couleur veritable, d'où vient qu'elle n'est pas en son rang? Et pourquoy toutes les autres estant placées se-Ion l'ordre que l'affoiblissement de la Lumiere leur donne, celle-cy change-t'elle cette disposition & prend-elle la place qu'yne Couleur plus brune deuroit occuper? Voyons si le Triangle qui fait voir quelque chose de ce phenomene nous en pourra donner quelque connoifsance. A ce dessein nous presupposons que puisque le Iaune a plus de portions de Lumiere que le Rouge & le Verd, les rayons qui le produisent doiuent estre les plus forts; et parce que la Refraction est celle qui principalement affoiblist la Lumiere en ces rencontres, il faut que s'ils sont plus forts ils souffrent moins de Refraction; et par consequent qu'ils soient moins obliques que ceux qui forment les autres Couleurs. Si nous pouuons donc montrer que les rayons qui sont entre le Rouge & le Verd tombent moins obliquement sur le Triangle, nous montrerons en mesme temps pourquoy le Iaune est entre le Rouge & le Verd. L'observation que nous auons apportée

cy-deuant des Couleurs que l'on void à trauers le Triangle dont les plus hautes s'obscurcissent quand on couure peu à peu le bas de la premiere face du Triangle; rout de mesme qu'il arriue à celles qui sont les plus basses quand on couure peu à peu le haut. Cette observation disse fait voir euidemment que de tous les points du corps lumineux il y a des rayons qui tombent sur toutes les parties de la face du Triangle & par consequent que de A, qui est la partie droite de l'object & dont le rayon tombe sur C, il y en a vn autre qui tombe sur D: par ce qu'en couurant D, on obscurcit A.Or il est certain que le rayon AD, est plus oblique à l'œil E, que BD, par ce que l'angle A D C, est pluspetit que BDC, faisant partie de celuy-cy; et comme tous les

rayons qui tomberont apres, de A, vers C, feront des angles plus larges, il s'ensuit qu'ils doiuent estre moins obliques; et par consequent ceux qui toberont surF,



338 DE LA FIGURE DE L'IRIS,

seront moins obliques que ceux qui tomberont sur D. Or les rayons qui tombent sur F, sont le Iaune; il faut donc que le Iaune se fasse par des rayons moins obliques qui par consequent sont plus forts.

D'où il faut tirer cette consequence que la bande Iaune qui se void dans l'Arcanciel se doit faire par de semblables rayons puis que les Couleurs de ce Meteore sont produites de la mesme façon que celle des Triangles com-

me nous auons montré.

On nous pourroit neantmoins objecter que si cette raison estoit bonne, il faudroit que cette bande Iaune parust en toutes les Iris, quoy qu'elle ne s'y remarque que lors que la Nuë est fort espaisse & fort noire. Mais si l'on considere bien les Couleurs de l'Arcanciel on verra tousiours le Iaune entre le Rouge & le Verd & la noirceur de la Nuë ne sert qu'à le faire paroistre dauantage. Car comme cette Couleur est la plus lumineuse de toutes, elle se consond facilement auec la Lumiere, si le subject où elle est receuë ne l'empesche par son obscurité: C'est pourquoy si les Couleurs du Triangle tombent sur vn lieu fort esclairé, elles ne paroissent point du tout, vne grande

CHAPITR III. 339 Lumiere absorbant celle qui est plus petite.

La resolution de l'autre difficulté que nous auons à proposer, à sçauoir, pourquoy le Rouge de l'Iris se change en Iaune quand l'Iris commence à s'éuanouir & à se dissiper, depend du principe que nous venons d'apporter; ce qui sert mesme à le confirmer. Car ce changement de Couleur ne vient que de ce que la Lumiere qui formoit le Rouge, vient à tomber moins obliquement sur le lieu où paroist l'Iris; Le mouuement du Soleil ou celuy de la Nuë à trauers laquelle il passe changeant la situation des rayons. Car si le Soleil par exemple estant esleué sur l'orison, rencontre vne Nuë plus basse qu'il trauerse obliquement, lors que cette Nuë montera & qu'elle s'approchera de luy, il faudra que la cheute de ses rayons soit moins oblique & que la Refraction en soit moindre & par consequent la Couleur qu'vne grande obliquité & vne grande Refraction causoient, se changera en vne autre qui procede d'vne moindre obliquité & d'vne plus petite Refraction: c'est pourquoy non seulement le Rouge se change en Iaune, mais toutes les autres Couleurs de l'Arcanciel, et

V v iii

340 DE LA FIGURE DE L'IRIS, à la fin elles paroissent toutes blanches quand les rayons passent tout droit & ne souffrent plus qu'vne legere Refraction.

VOILA où finit ce Grand & admirable Mcteore, & c'est là où doit finir nostre discours. Car quoy qu'il nous reste encore beaucoup de choses à dire sur ce subject, & que mesmes il y en ait de celles que nous auons proposées. qui meriteroient plus d'esclaircissement que nous ne leur en auons donné: Nous auoüons franchement que nous ne sommes pas capables de chasser toutes les tenebres, & de leuer tous les voiles qui cachent le secret de cette merueille. Mais quelque obscurité que nous y laissions, c'est tousiours beaucoup à mon aduis d'y auoir porté quelque nouuelle clarté & d'auoir adjousté quelque chose à ce que tant de siecles, & tant de grands hommes ont si soigneusement examiné. Aussi est-ce le destin de la verité qui est cachée dans la nature, qu'elle ne se découure que peu à peu, & qu'elle est quelquefois plustost apperceuë par les esprits mediocres que par les plus esleuez & les plus clair-voyans.

FIN.



TABLE

DES CHAPITRES,

ET ARTICLES.

CHAP. I. Du lieu où se fait l'Iris.
Que l'Iris ne se fait pas dans l'œil. p. 1.
Que l'Iris ne se fait pas dans la nuë où l'on la void. 2
Que l'Irisne se fait pas dans les gouttes de pluye. 12
Que l'Iris ne se forme point dans les vapeurs qui sont
dans la nuë.
Qu'il y a vne nue entre le Soleil & le lieu où l'Iris paroist
dans laquelle l'Iris se fait. 18
Comment se fait l'Ivis des fontaines. 22
Quelles Iris paroissent au lieu où elles se forment. 23
Qu'ily a deux sortes de reflexion. 24
CHAP. II. Des couleurs de l'Iris.
ART. I. Asçauoirsiles Couleurs de l'Iris sont de veritables
Couleurs. 28
ART. II. Asçauoirsiles Couleurs de l'Iris sont de mesme
espece que les autres.
ART.III. Quelle est la nature de la Couleur.
ART. IV. Asçauoir si toutes les Couleurs se font de la lu-
miere du Solesl comme les apparentes.
ART. V. Que la Couleur naturelle des corps ne procede point
de la lumiere exterieure.
La saueur en la couleur ne viennet pas d'une mesme cause. 54
La figure ronde n'est pas la cause de la blancheur. 55

(manual)	4					-								
TA	BL	E	D	E	S	C	H	A	P	Ι	T	R	E	s.

La figure triangulaire n'est pas la cause de la noir	ceur. 55
Queles Couleurs ne viennent point du meslang	e de la
lumiere & de l'obscurité.	18
ART. VI. Qu'il y a une lumiere interieure en tous l	les corps
& que cette lumiere est leur Couleur natur	
Rapports qu'il y a entre la lumiere exterieure &	
1/31	.71.72
La lumiere est diuersement partagée.	73
La lumiere interieure rexterieure sot de même est	
Pour quoy les Couleurs ne se voyent point du	
nuict.	76
Pourquoy les Couleurs se voyent de iour.	82
La lumiere ne se mesle point auec l'opacité.	83
ART. VII. D'où vient le differend partage de lumi	ere qui
se trouue dans toutes les couleurs.	89
ART. VIII. Quelles sont les causes qui affoiblissen	t la lu-
miere dans les couleurs apparentes.	95
Ily a deux sortes d'affoiblissement dans la lumier	e. 105
La Reflexion toute seule ne change pas la lumi	ere en
Couleur. 107. Ny la reflexion. 109. Mais	toutes
les deux ensemble.	II 2
Comment se font les Couleurs de nacres de perle.	116
Comment les Rayons qui passent à trauers les arb	res se
colorent.	ibid.
Comet se fot les couleurs des bouteilles d'eau sauon	20,117
Comment les fils d'araignée se colorent.	ır9
D'où viennentles Couleurs des petits poils & des	rayes
faites sur l'argent.	114
Quelles sont les causes qui affoiblissent la lumiere da	ins les
Couleurs fixes.	12.7
	u'elle

ET ARTICLES.

Quelle est la disposition necessaire à la lumiere.	129
La transparence est le suiet de la lumiere.	130
D'où vient la Transparence.	131
Que sert l'égalité des superficies à la transparence.	133
La lumiere a habitude auec la surface.	134
Il y a deux sortes de diaphanes.	137
Il y a deux sortes de corps opaques,	141
Toute lumiere n'est pas sensible.	ibid.
La mesure de la lumiere suit les degrez de la trans	paren-
ce.	142
Pourquoy des corps de pareille consistence ont de d	liuerses
Couleurs.	147
A sçauoir si le soulphre estle premier suiet de la coule	ur.150
ART.X. Quel est le nombre & l'ordre des Couleurs.	155
D'où se tire le nombre des Couleurs.	157
Toutes les Couleurs sont simples.	160
Les Couleurs ne se font pas du blanc & du noir.	163.
Les Couleurs de l'Iris sont les modelles de toutes les	
leurs	166
ART.XI. Quelle est la mesure & la quantité de lum	iere qui
se troune en chaque Couleur.	184
Toutes les qualitez sensibles ont les mesmes mesures	que le
$\int \! on_*$	185
La cause de l'agréement est egale en tous les sens.	186
Les proportions qui sont dans le mouuement des	sons ne
sont pas cause des harmonies.	196
Les proportions qui font les harmonies font les belle	es Cou-
leurs.	203
D'où vient l'excellence de quelques Couleurs sur	les au-
tres.	216

Xx

TABLE DES CHAPITRES

Des Couleurs lumineuses.	224
ART.XII. Pourquoy certaines proportions rendent	lessons
60º les Couleurs agreables.	235
ART. XIII. Comment se font les Couleurs de l'Iris.	262
Comment se fait l'Iris des Triangles de Chrystal.	263
CHAP. III. De la Figure de l'Iris.	283
L'Iris ne se multiplie par le nobre de ceux qui le voy	ēt.285
La figure de l'Iris monstre qu'elle ne se fait pas dans	les va-
peurs qui sont au deuant de la nuë.	292
L'Iris n'est pas circulaire à cause que c'est l'image	du So-
leil.	293
La figure de l'Iris monstre qu'elle ne se fait pas	dans les
goutes de pluye.	294
Comment se fait l'Iris des verres pleins d'eau.	295
D'oùviet la disposition des couleurs de l'Iris des vers	res.302
Quelles sont les dispositions que doit avoir la nuë	ou l'Iris
	6. 6°C.
La feconde Iris ne se fait point par reflexion.	315
Pourquoy l'Iris paroist ailleurs que sur la nuë.	319
Il peut paroistre beaucoup d'Iris ensemble.	320
Deux Iris se peuuent croiser l'une l'autre.	321
L'Iris peut paroistre toute ronde.	312
L'Iris peut paroistre renuersée.	322
Une des cornes de l'Iris peut paroistre plus courbe.	324
L'Iris peut faire une portion d'un plus grand cerci	e. ibid.
Le Cercle del Iris n'est pas tousiours esgal.	ibid.
L'Iris qui est proche de l'orison est plus large, of	ait por-
tion d'un plus grand cercle.	328
Quell' est la plus grande hauteur de l'Iris.	330
Quelle est la distance qui se trouue entre les deux Ir	15. 332

ET ARTICLES.

D'où vient la quatriesme bande iaune qui paroist souvent dans l'Iris.

333
Pourquoy le Rouge de l'Iris se change en Iaune.
339

Fin de la Table.

De l'Imprimerie de la coves Langlois, Imprimeur ordinaire du Roy.

EXTRAICT DV PRIVIEGE DU ROY.

CHAMBRE, Conseiller de sa Majesté en ses Conseils, & son Medecin ordinaire, de faire imprimer en telle marge & charactere qu'il voudra vn Liure intitulé, Nouvelles Observations & Coniectures sur l'Iris, auec dessens à tous Libraires, Imprimeurs & autres d'imprimer, faire imprimer, ny vendre ledit Liure durant le temps & espace de dix ans, sans le consentement dudit sieur de LA CHAMBRE, sur peine de trois mille liures d'amende, consiscation des exemplaires, de tous despens dommages & interests, comme il est plus au long contenu esdites Lettres de Privilege. Donnéà Paris le dernier iour de Feurier, mil six cens cinquante.

